



rt  
is  
rt  
g

Nicht im VD 16; nicht b. Merländer.

VK 94: Exple in Tübingen u. Münster,  
35 B = Verlust

**Nicht ausleihbar**

+4017 260 01



2te zweenite Auflage des im Jahre  
1535 bei Ivo Schöffer in Mainz  
anonymus verfasst von Trüffel:  
Eyn gottesdienst...

Vgl. F. W. E. Roth, Die Mainzer  
Buchdruckerfamilie Schöffer  
(Centralbl. f. Bibl. Beiheft 9) S. 191.

# Ein Rürtzer Auszug vnd

überschlag/ Einen Baw anzustellen/ vnd in ein Regi-  
ment vnd Gidenung zupringen/ mit denen so dar-  
auff mit aller arbeit seyn wurden/

Durch den Edeln vnd Wolgebornn Herrn Reinharten Graue  
zu Solms/ vnd Herrn zu Mingenberg zc. beschrieben/  
vnd jzt gar newlich in Truck ausgegangen.



Zu Cöln/ durch die Erben Arnoldi Byrckmans/  
Anno 1556.

Mit Kaiserlicher Maiest. Priuilegio, in sechs jaren  
nicht nach zu trucken.

LANDES-  
UND STADT-  
BIBLIOTHEK  
DÜSSELDORF

20 T.W. 221 (2<sup>o</sup>)  
v. 16

M. 9 357

# Der Edel vnd Wolgeborn

Herr/Reynhart Graue zu Solms/vnd Herr zu Wintzenberg 2c. der dieses Besprech geordnet vnd gestelt/ vnd im Jahre 1535. zu Wetz durch Guonem Schöffer/ hat trucken lassen/ doch nit in einen gemeinen ausgäg/sonder solchen abtruck bey sich behaltē/ so hat doch seine Gnade mir Arnold Birekman solches in den gemeynen ausgäg zutrucken bewilliget vnd zugelassen/ vff daß solches den Bau vñ werckleuthē zu gutem/mitgetheilt werde/dieweil so vil vñ mancherley Baumeister auffstehn/ Damit dieselbigen mögen wissen/was einem/ein solch werck anzunemē/daruff steht wurth/ vnd dester besser fleis fur sich nemen möge/ Damit sie den herrn/so sich in solche schwere gebewe geben/ vñ bereden lassen/recht vnd wol versorgen möchtē/ vnd daß die Obrigkeiten/die solche gebewe machen wollen/sich auch dester baß zubedencken/vnd zuberatschlagen haben/ehe dann sie also ein groß werck anfahen/vnd sich mit den verstendigen vnd guten werckleuthen zum besten versehen/ vnd gefast machen mögen.

**Daß ich** GraueReinhart aber/dieses Besprech der Architectur/ noch nit in die gemeyn in Truck hab ausgehn lassen/ist die vrsache/ daß solches noch nit/wie es seyn soll/vollfertigt ist/daß dieses ist das geringste theil/von diser beschreibung/Sonder wie der alt Michel Etto in diesem Besprech/dem iungen Hansen Willig einen grundlichen bericht/der vestenung zumachen verspricht/ So ist dasselbig zuuolfuren lang in werck gewest/ vnd vil stuck schon darzu geschnitten/vnd noch vil darzu zuschneiden seyn/daß wann dieselben alle zusamē komen/nit vil vnder hundert stucken seyn werden/ Vff daß solches mein gesprech der Architectur/souil zu den beuestigūgen gehört/ zu

A ij grunde

grunde beschriebē/ vnd in Figuren gestalt/ zu beiden theiln  
schriffelichen/ vnd in augenschein gebracht werde/ So wil  
es zeit haben zu beschreibē vnd zu schneiden. Dañ/ geliebtes  
Gott/ so soll es mit einer andern gestalt/ vnd berichte (sowil  
die beuestigungen antrifft vnd belangt) dann ich noch bey  
andern bißher in schriffen gesehen hab/ gemacht werden/  
Sunsten andere heuser vnd kyrchēgebewe/ vnd der perspe-  
ctiue/ der moler vñ steinmetzen kunst/ der wil ich mich ni-  
chts vndernemen/ Es seyndt maler vnd steinmetzen gnug/  
solche schmoecke wercke zumachen. Alber dises mein werck/  
vnd vorhabends beschreiben/ soll nit weiter vornemen/ dann  
was Schloß vnd Stet zu beuestigung bedarff/ mit allerley  
mauren der wehren/ von Maurwerck/ Schutwerck/ grabē/  
vnd streichen/ alles zusammen geordnet/ vnd mit seiner rech-  
ten maß/ vñ theylung durch den maßstab in grundt gelegt/  
vnd solche alle grunde/ von wasserley sortē/ seyndt fort alle/  
vnd ein ieder besonder/ in den Augenschein auffgezogē/ aus  
seinem grundt perfect vnd gerecht/ darmit solches mag in  
grundt/ zu den seiten vnd oben gesehen werden/ vnd ein ie-  
des stuck besonder beschriben. Darumb were dem Doctoꝝ  
von Nurnberg/ der von der Architectur schreibt/ die er al-  
lenthalben zusammen geflickt/ vñ dises mein Bespreech beko-  
men hat/ vñ in sein flickwerck auch mit eingeprecht/ von  
vonnöden gewest/ sich dessen anzunemen/ sonder hett es bil-  
lich vnderlassen mögen/ vnd mich mit dem meinen/ die zeit  
in die volendüg zupringen/ geworden lassen. Dann ich wil/  
wils Gott/ dem wol seinen rechten verstandt vnd berichte ge-  
ben/ baß dann von imre/ der es nit verstanden/ bescheen ist.  
Darumb wölle der Leser/ dises mein kurtz angefangen ge-  
spreech/ ein weil mit gedult annemen/ biß Gott die zeit ver-  
leihen wurt/ biß ich das ander vollent ausgemach/ vnd in  
das werck gebring/ das ich/ wils Gott/ mit fleis thun wil/ so  
balde Gott ein fridlich zeit verleihen wurt.

Hans



## Hans Willig



**L**eber Zeugmeyster mein gü-  
ter freunde/dieweil ich euch nunn  
eyn lange zeit zu kriegpleuffen als  
einen erfahren vnnnd gebrauchten  
kriegsmann erkant / vmb ewer ge-  
geschicklicheyit willē/durch mech-  
tige herren ehlichen haltē vnd herfür ziehen sehen/  
hab ich mich geflissen mein wesen auch dermassenn  
zurichtē/damit ich als eyn armer gesell/ bei grossen  
herren auch gnad vnd ehrl erlangen möcht/ vnnnd bin  
deshalben nit anheimis hinder dem wein gelegenn/  
sonder hab eyn zeit lang vast alle züg in Teutschen  
vnd Welschen landen gesücht. Darumb mich meint  
S. H. zu im erfordert / mein verstandt höher dann  
der an im selbst ist geacht / vnd mich zu seiner gna-  
den batomeyster verordnet. Dieweil sein S. allerley  
red gehört von grossen vnd dapffern beuestigungenn  
Welsch landts/den er in disen geschwinden leuffen  
gern zum theyl nachfolgen / vnnnd etlicher seiner S.  
Schloß vnd Stett zu befridung sein vnd seiner vn-  
derthanen beuestigen wolt. Vnd wiewol ich mich zu  
solchem ampt zügering erkenne/so hat mich doch die  
ehrl oberwunden/das ich solch ampt angenommenn  
hab/kom̄ darauß zu euch als meinem gutem freude/  
bittent ir wöllet mein fürnemenn hören/ vnnnd mir  
ewern gecreuwen rath mit theylen/das wil ich wi-  
der züuerdienen geflissen sein.

Michael Gcc

B

Lieber

## Eyn gesprech welcher massen eyn

**E**geber Hans ich hab dein begern verstanden / vnd ist ann eynem iungen menschen nichts löblicher / dan der sein iugend auff künstlich / ehrlich vnd nützlich sachen legt / vnd dem nach gedencet / dan was lassen wir hinder vns in diser welt bessers / dann ein ehrlich gedechtnuß? hab auch keynē zweifel du habst in disen mangfelligenn ehrlichen feldtziügen / allerley / das dir zū solchem ampt dienstlich sein mag / gesehen / iedoch als dein güter freüdt / möchte ich leiden du best solch schwer ampt nit so leichtlich auff dich geladen / dan warlich darzū gehört vil / gereth dir die sachen / so magst du ehz / lob vnd nütz erlangē / Solt dir das aber mißrathen / vnd deinen herrn der vn nütz kostē rewen / vnd der spott wee thun / hostu selbst züermessen / was nachtheyl dir darauß erwachsen würd. Doch dieweil du auff güten trawen zū mir kompst / vnd meins kleynē raths begerst / bin ich willig dir den mit zütheylen doch wirt van nöten sein / dich allerley züfragen / des wöllest keyn beschwerte tragen.

## Hans Willig

**E**geber heer Zeugmeyster ich bin darumb zū euch kommen / von euch zū lernen / vnd vnderricht züuer nemen / Darumb ir sonder alle beschwernuß vnd scheuhen alles das / so euch gefelt mit mir frei reden mögt / dan einen iungen keyn schand ist / von alten erfarnen leuten zülernen / das lob ich aber nit / daß eyner nichts kan / vnd noch nit lernen will / vnd bedanck mich ewers freuntlichen ehzbiettens / vnd damit ich euch weiters nit aufhalt / wil ich euch mein fürnemen in kurtz anzeigen. Als mich mein G.  
Heer

## vester bawe fürzunehmen sey.

Heer/wienor erzelt gefordert/vnd mich was ich inn  
kriegsleuffen gesehen gefragt/sein wir etlicher beue-  
stigungen / als des Schloß Meylande / beyder stett  
Bern vnd Herer zu reden worden/die ich seinen gna-  
den hoch berümbt/als sie auch warlich fürümē sein  
deshalben sein S. darauff gefallen/ in seinem lāde  
auch etliche flecken zu beuestigen/ welchs zuuersehē  
mir wienor steht beuolhen ist/das ich auch angenom-  
men hab/doch mit den fürworten/ daß sein S. mir  
zwo geschickte personen/nemlich eynen Steynme-  
tzen vnd güten Maler wöll zugeben/mit denen wöl  
ich in Italien ziehen/inen die gebewe / weeren vnd  
schießlöcher augenscheinlichen weisen/vnd auch dar-  
nach eygentlichen ab conterfeyen lassen/ damit sein  
S. selbs solche beuestigung sehen/ vnd alsdan irem  
gütbeduncken nach den baw fürhandt nemen mög/  
meins achtens solchs solt mir nit vnnütz sein.

## Michel Gtt.

Ich hab dein erbiettens wol verständen/ ich möcht  
aber wol leidē/du hest das bawampt deinem herren  
noch nit zugesagt/sonder eynen bedacht darüber ge-  
nommen/wer wol für deinen herrn / vnd am höch-  
sten für dich gewest auß folgenden vrsachen. Lieber  
Hans zeyg mir erstlich an was sein das für flecken  
die dein herr beuestigen will / sein das Schloßer od  
Stett/ legen sie in der eben oder auff bergen.

## Hans Willig.

Ein Schloß das leit auff eynem zimlichen hohen  
berg/so ist das ander eyn Statt in eynen ebenen/vnd  
B ij hat

Eyn gesprech welcher massen eyn  
hat inn der mawren ein schloß liegen.

Michel Gtt.

Ist Neylandt ein bergkhauff/ oder ist es ein was-  
ser eben hauff das keyn bergk vmb sich hatt.

Hans Willig.

Es ist ein eben wasser hauff vnd ich weyß keyn  
bergk dabei/ es hat vil starcker mawren/ groß thürn  
vnd dieff gräben/ vnd daruor wider ander zwingen  
thürn vnd weer/ vnd wider ein grossen wassergrabe  
dardurch laufft ein groß wasser vnd starck/ das es in  
dem graben mülen treibt/ vnd laufft mitten durch  
das rechte Schloß/ vnd das Schloß ist mitten zwerch  
mit bawen gescheyden/ also das es drei grosser plätz  
inwendig aller weeren hot / vnd das wasser ist innen  
mit zünemenn.

Michel Gtt.

Dweil es nün ein solcher grosser baw ist / wie du  
mir anzeygt host/ vnd also mit wasser beschlossen/  
vnd du zeugst gleich also mit dein maler vnd steyn  
metzē hinein/ vnd kuntherfeyest es ab/ vnd kommest  
wider/ bedunckt dich aber/ das et wan ein stuck dien-  
lich/ oder doselbst zümachen sei inn dines herrn baw  
des gib mir bericht.

Hans Willig.

Wie kan sich das züsamen gereimen / ein wasser-  
hauff/ wie Neylandt auff einem bergk/ auch ist Ney-  
landt

vester bawe furzunemen sey.

landt so groß mit sein weeren / als meins herrn  
Schloß vnd berg darauß es ligt / dreimal.

Michel Gtt.

Was ist es dan not mit solchem kosten in Italien  
zuziehen / dan wann du gleich alle ding eygēlicher  
besichtigt / ab conterfeyt / vnd in dein gemüt alle be-  
uestigungen in Italien wol gefast hettest / vnd dann  
wider heym zu deinem herrn komest / im relationn  
vnd die conterfeyung fürgelest / vnd er darauß würd  
spüren / daß solcher Welscher baw sich zu seinē für-  
haben nit schicken wolt / wie würstu dan bestehn / ge-  
schweig was würden dein mißgünner darzu reden /  
ist wol möglich das du dardurch gnad vnd achtung  
bei deinem hern verlieren würdest.

Hans Willig.

Ich gestehe das die Welschē gebew sich mit meins  
herrn fürhaben nit vergleichen / iedoch vermeint ich  
wo ich einen berichten Steynmetzen vnd Maler ditz  
nen hett / die das augenscheinlichen sehen / ich wolt  
noch allerley an solchen gebewen finden / das sich an  
meine herrn baw auch schickē würd / als ein thurn /  
etlich weeren / schießlöcher vnd anders / welches alles  
in die meyster wann sie das zuuor nit gesehē haben /  
schwerlich zubringen ist.

Michel Gtt.

Einem anzeygē nach / so seind die thürn zu Wey  
landt vast groß vnd dick / vnd stehn dieß in dem gra-  
ben

B ij

ben

## Eyn gesprech welcher massen eyn

ben/vnd ist ein thurn wol so groß als ein viertheyl  
an deines herrn schloß/darzu so würdestu sie nit ver  
sencken können in den gräben wie zu Weylandt.

Hans Willig.

Es ist ia war/ ich wolt sie aber nit so groß machenn  
wie zu Weylandt.

Michel Gtt.

Hans wöltestu die thürn kleyne machen/so werden  
sie schwach vō mauren vnd stehn frei zu allē geschütz  
das wil sich nit schickē. Nun ich muß dich fragen ob  
du auch wissest was eyn gut werlich schießloch sei.

Hans Willig.

Ich halt die schießlöcher am schloß Weylandt für  
gut/darumb werden sie onzweiffel hie aussen auch  
gut sein/der thürn halben/ wann ich inen gleich an  
der groß etwas abbrich/so will ich inen doch ire rech  
te dicken an den gemewr lassen.

Michel Gtt.

Wiltu sagen daß die schießlöcher zu Weylādt gut  
seien/so seien die alhie auch gut/ist weit vō ein/Die  
löcher zu Weylādt stehn in der dieffen/ do sie mit dē  
geschütz nit zureychē seind/das wirt nit seiē in deis  
hern bawe/dan do selbst müssen sie frey stehn/vnnd  
mögen dir leichtlich zūschanden geschossen werden.  
Auch gibt keyn dick mawer eyn gut schießloch/ dan  
soltu ein schießloch in ein dick mawren brengen / so  
müstu

## vester bawe furzunemen sey.

müstu die schießlöcher inwendig mit weiten kammern machen/ daß ein büchs hinein mög gehn/ dā auß ey nem geraden engen loch in eynen dicken mawern ist nit zu schiessen/ ob du schon wol heraus sehen magst/ solt du inen dan die kammern lassen/ vnd machest d zwey oder drei in ein thurn neben eynander/ so gehn die kammern seer nah zusamen/ vnd kanstu gedenc ken daß die mawer vnden durch die löcher schon die hálfft entzwey ist/ was hilfft dich dā daß die mawer oben dick ist/ vnd vnden schwach/ kann ich dich von außzen solchen thurn mit dem geschütz gereychen/ so will ich den thurn zwischen den zweyē löcher schies sen/ alszdan ist er in löchern vorhin schon entzwey. So kanstu nūn wol selbst achten was darauß wer den will/ so der kegel zwischen den zweyen löchern entzwey ist wie lang der thurn stehn würde/ er sei o ben so dick wie er wöll/ weiter als du sagest du wölst an deins hern bawe die thurn nit so dick im bezirck machen/ wie zu Weylāde/ vnd doch dick am mawer werck/ darauß wirt ein außgefülter thurn werden/ inwendig enge/ darinn sich niemants regen künd/ was wiltu dan mit der büchsen darin außrichten/ vnd wo ein verstendiger büchsenmeyer keme / der sich darin üben solt/ vñ künde seiner notturfft nach sich nit gebrauchen/ wie sich gebürt/ außz vor ange zeygten vrsachen/ wie woltestu gegen deinē herrn be stehn/ vnd er sich gegen dir gehalten.

### Hans Willig.

W Ein meynung wer ich wolt den thurn zum hal bē theyl gewelbē/ das obertheyl schlitten/ vñ mein ge schütz darauß vnder dē himmel schiessen/ auch einē  
gütem

## Eyn gesprech welcher massen eyn

güen graben darfür füren / daß die vndern weeren  
in dē graben giengen / vnd mit keynē geschütz möch-  
tē erreycht werden / sonder warten auff dem sturmb.

### Michel Gte.

**D**u redest von einer sachen die woll eyn meynung  
hett / es hot aber noch vil fehels / dan wilt du dē thurn  
welben vnd darauff schiessen gegen dē legern / so mü-  
stu rechen was du vor büchsen auff dem gewelb brau-  
chen wilt / die müssen nit zū kleyn sein / wilt du an-  
ders eynen im leger mit deinē büchsen auffschiessen  
So du nün eyn starck büchsen auff dē gewelb schies-  
sen wilt / so bedencck wie lang die büchs mit der laden  
ist / vnd wievil du körb vor dich setzen müst / oder wie  
dick eyn brüst weer sein soll / dā glaub mir wer schies-  
sen soll der wil auch bedeckt sein / daß er nit so bloß  
stehe / er würd anders nit lāg schiessen / so müssen die  
leut in eynen besatzung anders zū rath gehalten wer-  
den dan haufen / dieweil sie nit in eynen besatzung  
züersetzen sein / als haufen / So rechen die büchsen /  
ire laden / die brüst weer / vnd irē lauff / so sie geschos-  
sen ist / auch dem raumen zū der ladenschauffel auß  
vnd in zūladen / vnd bedencck was das für ein platz  
sein will / machst du dem platz seinn groß gantz wie  
daruō geredt / so wirt der thurn vast groß. Ist er nün  
so groß vnd du wilt auch noch ein graben daruor ma-  
chenn / so sich ob du auch platz genug habst / ob es der  
berg erleiden möge / vnd ob es deinem herrn gelegen  
sei also eyn grossen weicleufftigen bawe zū machen.

### Hans Willig.

So

vester bawe furzunemen sey.

**S**ich mich lenger bedenck/ so will es sich ie lenger ie weniger schickē/ besorg es werd alles vmb sonst sein mit dem schloß.

**Michel Gtt.**

**I**ch halt es auch daruo: daß diser dein anschlag vergeblich sei / darumb hab ich vor gesagt / ich wolt das du vor der zusage eynen bedacht genommen hettest/ wir wollen aber diß ietzund faren lassen vnnnd von eynem andern reden/ ich hab von dir verstanden daß dein herr eyn Statt vnd Schloß die anenyand leigen/bawen wolt/was ist deins herrn vnd dein anschlag vnd bedencken darüber gib mir berichte.

**Hans Willig.**

**E**s ist meins herrn meynung die statt vnd schloß zu bawen beyde zusamen / so hab ich im gesagt / daß Bern vnd Verer die berühmsten stett mit schlossen seien die ich weyß/demnoch solt ich sie anlegen vnnnd machen.

**Michel Gtt.**

**H**ans berichte mich ob es ein bawe von erdē oder vō steyn gemacht sei/vnd was er vor weern hab.

**Hans Willig.**

**W**en grossen dicken mawern ist er gemacht/ vnnnd mit seiner brüstweer samptlich vnd in gleicher form mit quader gehawen/schirm recht vnd gewelbt vnnnd weit löcher darinnen/auch an etlichen enden ist hin

**E**

**der**

## Eyn gesprech welcher massen eyn

der der mawer geschüdt/ Es hat weiter hinder mawern plätz auffgemawert/ vnd auff beyden neben seitten etwas anleg also/ daß man mag eyn büchsen an eynē ort hinauff führen/ vnnnd an dem andern wider abe/ vnd daß man von dem platz mag über die rechte mawer hinauß schiessen/ vnd geht vor den rechten mawern ein groß weit wasser her / daß heyst der Pfadt/ vnd am andern ort seind es gräben/ vnd stehn groß thurn an dē mawern im wasser/ die seind auch gehawen van quadern/ vnd groß weydlich deckenn vor thurn/ vnd ist vast ein groß statt.

### Michel Gtt.

Schul ich von dir gehört hab / so gefelt mir diser statt bawe besser dann der ander/ doch muß ich dich fragen ob er auff ein grosse oder kleyne besatzung gemacht oder geordent sei.

### Hans Willig.

Ich hab keyn verstandt was eyn grosse oder kleyne besatzung erfordert/ dan ich laß mich beduncken/ so eyn Statt oder Schloß grösser sei / so es ein grösser besatzung erforder / weiter weyß ich nit zu antworten.

### Michel Gtt.

Al du sagst wol in eynen weg daruon / aber in andern weg hör ich wol daß du es nit verstehest/ domit du des einen verstandt habest war nach ich gefraget hab/ so ist das mein frag.

Wan

## vester bawwe furzunemen sey.

**E** Man kann ein baw gemacht der vor schiessen wol verwarth is/ vnd doch nit weerlich / das hat ein verstandt. Ich laß ein schüdt machen mit einem graben die nit zu schiessen ist/ vnd hat keyn weerr dā alleyn vor schiessen wie gehört/ darhinder gehört ein grosse starcke macht zustehn / ob mann schon zu inen über die schüdt fallen würde/ so stehn die inn der besatzung hinder der schüdt inn der ordnüg / als ob sie im felde stünden/ vnd sich schon mit inē schlagen solten/ vnd müssen die so überfallē wollen außhalb der ordnung zu inen lauffen/ das dann vngewönlich ist zuthun/ darzu gehört dann ein gewaltiger grosser hauff in die besatzung/ dann rechen auß solt du hinder ein schüdt die keyn weer hinder ir hot leut zu der weer stellen/ müst du ein an den andern so lang die schüdt ist / wie ein zaun ordnen / damit ist es nit verwarth/ sond sie müssen auch hinder eynander stehn/ glidßweis wie inn einer ordnung/ also das sie ein druck leiden können. Nun rechen was ein seitten an der schüdt obgemelter massen zu besetzen für ein volck erforderen wöll / Solc nun an einem andern ort auch dergleichen angefallen werden vnd gestürmt/ so will dergleichen versehen sein/ darzu gehört auch ein hauff volcks/ Nun reche auch was fürwacht inn die beuestigung vnd obs gewegsam seinn will/ darumb acht ich das fur keyn nutze besatzung wie die gehört nit weerlich ist/ sonder mit dem grossen hauffen sich weeren müß.

**E** Nun wil ich dir sagen was ein weerlicher baw ist/ darvor ich es halt / vnd nit so eyner grossen besatzung bedarff/ Das ist so ein schud oder mawer wenn hot vor ir vnd hinder ir die zusamenn sich

**E ij** weeren

## Eyn gesprech welcher massen eyn

weeren vnd die leut darinnen verwart seind / also  
daß sie nit zü überfallen / noch mit dem geschütz dar  
auß getrieben werden / vnd dei hinein fallen / vor sol  
chen weeren stehn mogen / vnd zü inen mit dem ge  
schütz zwerchweiß auß den weeren schießen lassen /  
vnd sich zwischen den weeren trennen müssen / das  
halt ich für weerlich besatzung / das mir mein leut  
verwart stehn / vnd sich sicher weeren künden / vnd  
das eynex souil versehen kan als xx. oder xxx. vnd  
noch mehꝛ / das an dem andern gemeltenn baw der  
keyn weer hat nit sein kan / dan dieselben alleyn für  
schießen seind / nün gedencck darnach was deinē her  
ren am gelegesten sein will / vnd ob sein gemüt auff  
eyner grossen oder kleynen besatzung stehe.

## Hans Willig.

Wer red hab ich zü güter massen verstanden / vnd  
müß euch von notwegen zufallen / das ich es nit ver  
standen hab vnd noch / dann ich het nit gemeynit daß  
es so weitleuffig vnd vil bedencckens habenn solc / als  
ich nün höꝛ / wer wil das alles versehen?

## Michel Ott.

Ich sag dir das / diß alles will wol bedracht seinn  
vnd noch vil mehꝛ / dem / der ein bawmēsch sein wil /  
vnd des selben sich vndernemen / auch wol versehen  
will wie sich gebürt / ich müß dich noch mehꝛ fragen /  
domit du versehest was züm baw gehört / des sich ei  
ner zübedencken wol zeit vnd rath bedarff wer sich  
solchs ampts zutragen vnderwinden will / dan die  
weil du einen vertragen zü mir hast / wolt ich dich  
auch

*Arzt*

## vester bawe furzunemen sey.

auch gern alles was mich dunck/ dir von nöten sein  
will/ zu mein besten fleiß vnd verstandt vnderrich-  
ten/ dan es hot noch gar vil anhenge die einem baw-  
meyster züersehen gebüren / dan ein bawmeyster  
vnd ein angeber des bawes seind weit von eynander  
als du hören solt/ man nimbt auch vil nach freunde  
schafft inn besatzung die von gutem hertzen seind /  
aber des spiels nit gebraucht noch gewont/ vnd solt  
es inen erstlich durch vnuersorgte weerē geschwindt  
vnder augen gehn/ ist zu dencken daß sie der sachen  
bald müd werden/ sein die weern aber noch fortheyl  
verwarth vnd zügericht / so ist es nit erschrecklich/  
vnd kan einer mit der zeit im handel des buffen ge-  
wonen vnd keck darüber werden/ vnd in dē hädel ge-  
fallen lassen vnd willig werden/ ist dā einer willig  
so thüt er alle ding gern/ vnd mehꝛ dā er thün müß/  
vnd gewindt lüst den sachen nach züdenckē / dan ein  
vnwillig man denck nit weiter dan er thün müß/  
das geht im doch halb ab / das ein willg ma nn nit  
thüt/ dem müß man nach dencken.

**¶** Weyst du aber verstehst du dich auch vmb die Me-  
toloret als vmb aller gattüg der büchsen vormögen/  
was eyn iede gattung ein tag vnd fort von mawren  
brechen kan/ mit dem vndersheyd an dickē vnd dün-  
nen mawren/ ein iedes besonder hat seinn rechnung  
vnd maß zügeben.

## Hans Willig.

**M**eyn ich inn warheyt ich hab solches nie gebraucht  
dan ich bin ein hauptmann der knecht geweest / vnd  
hab mit den selben vmbgangen daß ich mein knecht

C ij hab

## Eyn gesprech welcher massen eyn

vnd beuelh gehalten/ich bin auch mehr dan eynmal mit den hauptleuten vnd obersten in radtschlagen/ doman schlachten / schiessen / in schlachten vnd forin Stetten vnd Schlossen verordnet hat/ desgleichen zu schantzen vnd die büchsen zu lägern/wā ich aber soll warsagen so ist gemeynlich besehen worden vnd geordēt/ durch die zeug aber Artoloreimeyster vnd der Büchsenmeyster/ besonder die schantz vnd der büchsen leger/da bin ich wol vil bei gewesen/ aber doch sie geworden lassen vñ wil recht sagē das ich die zeit nit hart nachfragēs/ aber nachdeckens auff das geschütz oder Artolorei gehabt/ wie ich noch weydlich dapffer hauptleut weyß vnd hoch berümbt die sich darumb nicht bekummern/ lassen die zeug vnd büchsenmeysters das versorgenn / die man dan pflegt bei den sachen zu haben / dan als wenig ein Artoloreimeyster mit sein Büchsenmeystern ein Hauptmāschafft versorgen kan/ vnd zu im gehört / also wenig gebürt eym Hauptman das auch züersehen.

## Michel Gte.

Wn wolan ich will das dises mal nit disputieren was eym ieden in den sachen zuthün gebürt/ dan es ist war/ es ist getheylt vnd eyner ieden partheiē/ daß sein züersehen beuolhē/ es gebürt aber ein obersten dem Artoloreimeyster beuelh zuthün/ daß dem Artoloreimeyster nit gebürt dem obersten zubeuelhen/ das mich bedunckt wo ein oberster sich des auch verstünd/ solt im nit übel dienenn / der gleichen ob ein Hauptman sich des auch fliß zu lernen sole im kein schad sein/ dā gemeynlich hoffen die hauptleut auch oberstenn zu werden / wie die Thümb herrn Bischoff

vester bawe furzunemen sey.

schoff/ so acht ich so ein hauptman meh: wiß in sol-  
chen sachen so er meh: stimmen zu einem obersten  
bekommen mag/wir wollen diß bleiben lassenn/ es  
thue nichts zu vnser sachen.

**I**ch müß dir denn grunde sagen so du dich nit  
auff die Artolorei verstehst/ was wilt du dich dann  
des bawß verstehn/ dan das ist das hauptstück eines  
bawß anzulegen/ dan die anlegung eins bawß will  
durch die Artolorei geschehen vnd scharff / dann sie  
müssen do mit eynander kempffen mit gewalt/ dan  
die Artolorei ist im bawe getheylt / die ein ist dauß  
form bawe/ die ander im bawe/ darzu müst du einn  
platz behalten/ Nun bedencck wilt du ein güte baw  
machen / so müst du der Artolorei dienenn die im  
baw ist/ vnd nit der die haussen dargegen ist/ so deck  
das du der Artolorei darinnē den baw also machest/  
daß sie im baw raum vnd versiecherüg hab / daß sie  
der Artolorei hier aussen heer werde/ darnach biß be-  
dacht/ dann es steht alles darauff.

Hans Willig.

**G**eber Zeugmeister ich weyß euch disenn vnder-  
richt nit zuwider legen/ dan ir bringt mir so vil sa-  
chen herfür/ das ich grüntlich daruo: hab/ solt dises  
alles bedacht sein/ es würden wenig bew gemacht/  
wie ist es wol müglich das ein hauß den raum ha-  
ben mög/ als eyn er haussen hat / also vill büchsen  
zu lägern / das einer möchte den lägern hieaussenn  
starck gnüg sein/ bedunckt mich es sei nit gegen ein  
ander zuuergleychen.

W

## Eyn gesprech welcher massen eyn

Michel Gtt.

**E**geber Hans das ist all mein sagen vnd anfechtung  
daß es sich nit wil vergleichen/darumb will es mit  
hochem fleiß bedacht/vñ nit so leicht geacht sein/ als  
dein herr vnd du es anschlagt/ Nun will es bedacht  
sein wie ich daruõ gered hab/vnd noch vil mehr/ dan  
glaub mir so das zum handel kombt/ so wil es gegen  
eynander handelt werden wie ich gesagt hab.

**N**un machstu dir ein beschwerung/ die wol zube-  
dencken ist/ daß die läger vor eyner besatzung star-  
ker zumachen seien dan inn der besatzung/ durch vñ  
sach wie du daruon gered host / ist es aber nit mö-  
glich vnd natürlich/ daß eyn man der sich mit har-  
nisch wol angethan hat/vnd steht inn eym fortheyll  
zwen oder drei schlagen möge/ die nacktet zu im inn  
fortheyll wollen/vnd inen herauß treiben/ vnd iren  
fortheyll begeben müssen.

Hans Willig.

**E**geber Zeugmeyster wie soll ich dise gleichnuß ver-  
stehn mit dem geharnischten in seim fortheyll vñnd  
die nackenten sonder fortheyll?

Michel Gtt.

**D**as will ich dir sagen so salstu machen dein vest-  
nung der massen/das dir dein geschütz so verwarth  
vnd bedeckt leig in seim fortheyll/nit über höh vñnd  
dergleichen wie das an der gelegenheyt sein kã/ daß  
eyn büschen in der besatzung so gut ist/ mit irem for-  
theyll

vester bawwe furzunemen sey.

theyl/ daß eyn büchß der gleichen hauffenn gegen ir  
nit schaffen kan/ noch liegen mag bleiben.

Hans Willig.

Das hab ich vil gesehen das eyner mit eyner büch-  
sen hatt so wol gelegen in eyner besatzung/ das man  
mit eyner dargegen nit hat mögen schaffen/ was ist  
das mehꝛ/ so hat man alwegen hauff sechs vnd mehꝛ  
do man dinnē nit ein hat/ vnd lege der drei oder vier  
dargegen/ daß er sein vortheyl verlieren müß vnd  
weychen/ was wolt ir darzü thun?

Michel Gtt.

Ich laß es sein wie du daruō redest / daß ich wey-  
chen müß einmal/ darumb wil ich noch eināder ort  
haben/ den du noch nit gesehē hast/ da wil ich hin rü-  
cken in einer nacht/ so ist dir den morgen dein schantz  
oder läger der büchsen nichts nütꝛ/ dann du müßt sie  
mir nach rücken/ dein korb anders setzen/ die schantz  
anders machē/ wiltu anders weiter zü mir/ darauff  
wil ich acht habē/ vnd ander gering geschütꝛ darauff  
richten/ ehe du dein korb/ schantz vnd büchsen wider  
gerichstest vnd lägerst soll es kegel geben haben/ mitt  
dē daß du die zeit verleust/ das ist meyn vortheyl ei-  
ner/ da manig geharnisther mā in steht. So du nün  
meynst du habst dich wol gelegert/ vnd mich herwun-  
den wid zü schiessen/ so hab ich noch etwā ein zwerch  
weer/ do schieß ich dir dan allererst in die seitenn/ so  
mustu noch mehꝛ darressen/ das kost aber leut vnd  
zeit/ das wil auch in eym baw gesücht sein/ vnd es  
ist nit der geringsten stuck eins im baw zü bedēcken.

D

Hans

## Eyn gesprech welcher massen eyn

Hans Willig.

**E**geber Zeugmeyster ich weyß mich nit mehr oder weiter mit euch in disputaciones zugeben / dan ich befind bei euch / wan ir wolt / so seit ir auff des bawes seiten vnd kündt dem helfen mit vornemlichen vrsachen vnd so / habt macht ir die durch ander argument weiter nicht / also würd es nimmer keyn ende nemē / so weyß ich auch nit darauß zukömen / ich wil der ding müßig stehn ich weyß dise anfechtung nitte alle züuersorgen ich wil es eym beuelhen der es kan.

Michel Ott.

**M**eyn lieber Hans wilt du ein kriegsmā sein wie du bist / vnd wilt dich so bald erschrecken lassen / das will nicht dögen / du hast doch vorgesagt du wöllest gern lern du habst lust darzü / Nun wild lernen sonder dar od fürgeben nit geschehē / nun ist es noch nit an dem / es hat noch vil fragens das du wissen müst / wilt du dieser ding meyster sein / darüb laß es dich nit beschweren / das ich dich frag / dan dises wil sein / du solt es aber nit erschrecken / der sach ist noch woll zühelffen.

Hans Willig.

**I**ch wolt warlich das ich es wol verstahn kündt / ich wolt auch gern die arbeyt thun / ich weyß aber in worheyt nit weyter darzü zusagen / ich wil aber gern euch weiter daruon hörn reden / vnd zü meinē besten fleiß weiter darnach denckenn / Aber dismal mich keyns bawes vndernemen / dan ich weyß nit d sachen gnüg zuthū / so hab ich auch nit gern nachred vñ spot.

Michel

vester bawwe furzunemen sey.

Michel Gtt.

Darumb lieber Hans sag ich das nit alle kriegs-  
leut bawmeyster gebenn / die gleich lang krieg ge-  
braucht habē / vnd wol berumbt sein vor kriegfleut /  
dan ich bin wol darbei gewest / das sie gerathetragt  
worden seind / das ich gehört hab das sie gar schlecht  
daruon gerech haben. Vnd in summa vō eyner mey-  
nung gesagt obenhin / Aber in warheyt hett man irē  
radtschlag sollen nach machen / glaub ich das wenig  
gewest sein von werckleuten die sie verstanden het-  
ten oder mögen nach machen / vnd hetten sie es selbst  
sollen machen / das sie nit hetten mögenn darauff  
kommen / aber gewist was ir selbst angeben wer ge-  
west. Darumb lieber Hans laß dich nit beschwern  
die eyn rede vñ widerred / die ich mit dir gehabt hab /  
dan ich hab es in dem besten gethan / dan glaub mir  
in warheyt das es noch weit mehr bedencen haben  
will dan ich dir gesagt hab / dann eyn vest baw der  
müß nit alleyn schön vnd ernstlich seinn / er müß  
auch können / dan ich hab der wol gesehe die vast ern-  
stlich vnd gewaltig gesehen haben / vnd mehr darann  
gelegt dann von nöten gewest ist / vnd hat doch nit  
kündt das er hat können sollen / wer wol mit eym ge-  
ringern weerlicher zumachen gewest. Darumb ist  
es keyn kunst das eyner mit eym überentzigen kosten  
eyn starck werck macht / dan das ist wol zuthun so  
man nicht sparē will / ich halt aber das vor ein kunst  
das eyner an eym baw nit mehr thut / dann das die  
notturfft erfordert / vnd dem doch seinn gnügsame  
sterck gibt / vnd weerlich macht / vnd also vortheyl vñ  
sterck mit einander sucht.

Hans Willig.

D ij

Da

## Eyn gesprech welcher massen eyn

WAl ir sage mir von fortheyl zusuchen/wo das auch  
so sein kã/ist es wol etwas/wer sagt eym aber die all

Michel Gcc.

Ich hab dir vor gesage daß du es nit vor übel vonn  
mir wollest auffnemen/das ich dir dein sach nit loß  
güt sein vnd einrede/ das seind die vsachen darann  
einer lernet/solt ich dich gelobt haben in deinem fürne-  
men/so werstu also mit freuden in baw geblatzt/vñ  
hest dein kopff vñ dunccken also blind gefolgett/  
weern vnd anders gemacht auß deinem sin/hettest ver-  
meynt es wer wol bedacht/vnd wer recht gechã/vnd  
so es in die höch kompt/so geht es gar nit/wie eynex  
vermeynt/das es solt gethan haben/das korapt auß  
dem vnuerstandt/vnd das einer sich nit mit reissen  
vnd schneiden geübet hot/an andern dassel'big gelex-  
net/vnd so es dan also geht was wirt dā dar auß/ So  
die außgemacht seind/so kommē Herrn/ Kriegbleut  
vnd andere die wöllen den baw sehen/ auch so führen  
die herrn selbst leut darauß/was geschicht dan so sa-  
gen die/die des verstandt haben/ so sie darauß kom-  
men/ so sagt eynex wan es also / o' der aber darzü ge-  
macht wer/ so wer es güt. Der ander sagt / man kan  
das nit darauß thun/vnd also / so wirt dā auß dem  
baw die disputation gebraucht/wie ich dir ietzund ge-  
sagt hab/so müstu dann dar sehn vnd das höre/vnd  
darzü zweigen/das wer schädlich vnd spölich. Nun  
bedeck wo es dermassen also gehn wirt/ob es dan nit  
besser sei daß man vorhin daruon rede/vnd lern mit  
râthen vnd visierungen/ dan wie gemelt/darüb laß  
dix nit verschmahenn/was ich dir ietzund gesage  
hab/dan es wirt dir begeggen wie ich dir gesage hab.

Hans

vester bawe furzunemen sey.

Hans Willig.

Geber heer Zeugmeyster ich hoffen ir werd es nit dahin achten das ich ewern trewlichē vnderricht zu vngut auffneme / noch eines verschmahens darinn hab / sonder ich bedanck mich ewers trewen raths vnd warnung / dā ich befind das ir mir recht saget / vnd ist war / wie vil seind ir aber der bew die mit diesem allem bedacht vnd versehen seind?

Michel Ott.

Geber Hans der weyß ich gar wenig / die also sonder dadell / oder mit allem fortheyl gemacht / das sie nit anzüfechten seien. Ich sag aber das es gut ist das einer die anfechtung daruon wir geredt / all wiß vnd sich darnach richt so vil im möglich ist / vnd die walstadt leiden will / vnd so er ein weer machenn muß nach gelegenheyt des platz do er es besser wißt zumachen vnd platz halben nit sein kan / das er doch wiß rede vnd antwort zugeben warumb es nit anders hat sein mögen / so hört sein heer doch woll das er es baß versteht. Dann glaub mir so einer gleich alle fortheyl vnd geschicklichkeyt auff dem bawenn weyß vnd versteht / so fordert doch alwegen ein ander platz oder walstadt ein andern baw vnd art / das einer anders lernē muß / darumb ist gut das eyner der sich bawes vndernimbt das er alle zeit sich fleißig mit visiern übe / vnd was er gemacht das inn gleich gut bedanck / so soll er sich selbst mit allē fleiß das widerlegē vñ allen fel zu sūchen üben / vnd so er ein fel daran finden thūt / so soll er sich dan wider be arbeytē den zu fürkōmen / also wil stets dise hādług

D ij inu

## Eyn gesprech welcher massen eyn

inn disputierung gehandelt werden / so finde sich durch die contrarien / vil das eyn an das nit wol zu finden ist / vnd ich bleib noch darauß wie ich vor daruon geredt hab / daß eyn bawmeyster aber angeber eins vesten bawes not sei daß er sich des geschütz vnd Artolorei wol versteh.

### Hans Willig.

Ich befinde auß ewern vilfaltigen bericht / daß es nit anders ist / dan daß das geschütz will das best hauptstück im baw sein. wo nunn ein walstadt nit darnach ist / das man plätz die meng machen / daß man das geschütz wie ir daruon geredt habt / so gewaltig vnd an vil orten brauchen kan / so wer es besser gelassen den baw zu machen / dan ich versteh / so ich schon ein plätz oder zwen güte hab vnd nit mehr / vnd man wer mir hie aussen mit der meng des geschütz über legen / also daß man mich von plätzen oder weere abschüß / so wer es aber nicht / so wer mein baw verlor.

### Michel Gec.

Wen sag mir eins so du mich nün schon von allen weern scheust / daß ich mein geschütz nit mehr brauchen kündt / vnd ich mein geschütz müst von den plätzen abthün / lauffen mir dann auch die büchsen die mir die weer genommen habē nach / also daß sie mir mein büchsen darnach nemē vnd mit sich wech fürn

### Hans Willig.

Sollen die büchsen lauffen über gräben / schüdten  
vnd

vester bawe furzunemen sey.

vnd mawern/was das nün ist/ vñnd die andern holen/vnd mit inen nemen/als weer es den leuten zü uergleichen das kan nit wol sein.

Michel Gcc.

Als ist mein geharnischer mā do ich vor vō sage/wan er nit weiter kan daß er zü ruck drett auff sein fortheyl do er sicher steh/ also ziehe ich mein büchsen hinder ein weer do sie siecher stehn vor dē schiessen/dieweil sie sich nit mehr wern kan/so ist sie mir noch vngenommen.

Hans Willig.

Gedenckt ir auch so ich euch die weern neme / mit meinem geschütz/ daß ich dan mag mit dē kriegsvolck anfallen vnd den baw erobern / dieweil ich euch die weern genommen hab/vnd den geharnischen man holn mit mein leuchen / dan es steht nit alleyn auff dem schiessen.

Michel Gcc.

Al es ist war wie du daruon redest/ so gedencck daß du machest weern die verborgen seind vor dē geschütz hie außen/ vnd so du mir mit deinem kriegsvolck hinein lauffen wilt daß sie die noch finden frei vnzerbrochen/vnd daruor stehn müssen vnd mit in reden lassen daß sie daußen bleiben vñnd wider abziehen/ das ist mein Chüris vnd noch ein güc harnisch vnd vortheyll.

Hans Willig.

Es

## Eyn gesprech welcher massen eyn

**E**s ist wol darvon zureden/ aber zu machenn das ist mir ein kunst/wiewol ich gesehen hab/das durch geringe weern stürm erhalten seind worden/ Hett man sie aber gewist/es weer auch darvor zuthun gewest. Aber also frei weern zumachē die nit zunemē seien/so man sie weyß/hab ich keyn verstande daruō

### Nichel Ott.

**A**l das seind die principal stück eins festen bawes/wer das nit weyß der bawet / wie ein dem es gedraumbt hat / Nun wolan ich will dir etlich stück die zu eynm vestenn baw gehōrē / zu frag stücken auff zeychen / do geb mir auch bescheyd auff / dann es wil sich in solchen stücken geübet sein mit hochem fleiß / dann es will ein solcher grosser baw hohe bedenccken haben / damit er keyn weer mach / es seien schießlöcher oder anders / das er so er darumb beredt würd / wiß red vnd antwort zugeben / Also darumb hab ich es also gemacht / das soll es thun vnd dergleichē / dan alle fundament vnd anleg wöllē auff dem bawmeyster stehn / vnd alle verantwortung der werckleut. Darumb soll ein bawmeyster alle handtwercck die darzu gehōrn wol verstehn vnd auch an steller sein / wo er das nit versteht so ist er d werckleut spott / so muß er in gehorchen wie es in gefelt / dann sol er sie heysen vnd weyß nit wie / das reimbt sich übel / also muß er dan mit sorgē mit in handeln vnd von inen bericht sein als wer er ir knecht / das thut nitt gut / darumb will warlich züforn gelernt sein / Aber we dem der die leer iungen an ein solchen grossen baw zu meyster werden lest / wo sie nitt ein leermeyster haben.

**Ich**

vester bawe furzunemen sey.

Ich will dir nun zweyntzig fragstück wie ich die  
gesagt hab fürgeben/ in welche du berichte aber ver-  
stendig bist das sag mir/ das seind dise wie volget.

Frag stück.

i. Item erstlich die walstade zubesehē ob die lieg  
daß sie wasser hab/ das nit zu nemen sei.

ij. Item ob man müß auff allen seiten den baw  
gleich herumföhren / oder es auff einer seyten oder  
mehr etwā behelff hab das solcher sterck nit bedö:ff/  
als durch gemos oder wasser / das mann keyn läger  
dahin kün legen/ oder das geschütz.

iiij. Item zubesehen ob es berg vmb sich hab / die  
es über höhen/ das es nit daruor zu decken sei.

iiij. Item ob man schon eyn seittenn vor solchem  
berg decken möcht/ ob man dan auch möcht über die  
selbige weern sehē oder schiessen in die ander weern  
auff der ander seiten in rücken.

v. Item ob man etwan eym mög zwerch inn die  
weern sehen/ vnd ob das auch zuuerdecken sei durch  
schütten oder blenden.

vi. Item so es ein eben erden baw ist/ ob er gleich  
eben vnd wol leg / ob man auch steyn darbei habenn  
kan/ oder nit/ dergleichen ob man schütten machenn  
wolt/ ob mann auch möcht die erden darbei bekom-  
men/ oder ob sie zuweit züholen sei / dann es kompt  
offt das ein hauß wol eben leit vnd ist voll gebrüch

E

vnd

## Eyn gesprech welcher massen eyn

vnd wasser darumb daß die erden doselbst nit zügen  
winnen ist/ auch nit in die dieff zukommen.

vij. ¶ Item zubesehen ob die erden darbei auch zu  
schütten dög oder nit/ dan vil erde die nit gut schüdt  
gibe sie werd dan gefast mit mawern vnd mit was-  
fern/ vnd ob auch wasser darzu zubekommen ist.

viii. ¶ Item ob auch solt vō mawerwerck daselbst  
gemacht werden/ ob man auch mög darzu grüdt fin-  
den/ oder ob man es pfelen muß.

ix. ¶ Item so du nun alle gelegēheyt recht finden  
würdest/ ob du auch wissest deinn streichweern vor-  
sorgt vorm schießen zudecken/ vnd daß es die streich-  
weern an irem schießen vnd streychen nit hinder.

x. ¶ Item weystdu dein thoz oder pforten zümachē  
daß sie dir nit zūschießen seind vnd du doch auß vnd  
ein magst.

xi. ¶ Item weystdu dein weern also zūrichten  
wan einer sich gegen einer zūschießen legert / daß  
im beyde seiten gegē deinen andern weern bloß ligē  
vnd daß er sein seitten so wol decken muß vnd be-  
schwerlicher dan vnder augen.

xij. ¶ Item weystdu auch so du ein ort an ein baw  
hast der eben ligt doman dir das wasser nemen kan  
wie du das verwarn solt daß es mit beschwer zügen  
muß/ vnd vil leut darüber bleiben müssen.

xiii. ¶ Item weystdu dein streichweern zümachē daß  
sie

vester bawe furzunemen sey.

sie hinder ein wal vnd vorn wal streichen/ vnd der in den euffern ist der ist auch in dē inderen/ vnd wer in den inderen ist/ der ist auch in den euffern / vnnnd ist gleich wol verwart / daß sie nit mögen überfallē werden.

xiiij. ¶ Item weyst du die schütten zū scheidē ob man schon ein ort oder schüde heet daß sie nit auff die ander mögen kommen/ als vō einer zūlauffen auff die ander/ vnd daß du plätz host/ darauff mann frei stehn mag/ daß man sie mög wider vom wall herab schiessen.

xv. ¶ Item weyst du ein Schloß vnd Statt die bey ein ligen außen in ein gleichen baw zūbringen vnd doch innen vnnnd draußen zūscheidenn / also daß das Schloß gegen der Statt vest ist/ vnd die Statt dagegen offen/ vnd daß man das hie außen nit gesehen kan.

xvi. ¶ Item kanst du dein löcher in den streichen machen daß dich der rauch nit hinder.

xvij. ¶ Itē weyst du dein löcher in streichen zūmachen daß sie zūm sturm zeug auch so wol dienen als zūm schlechten schiessen.

xviii. ¶ Item weyst du büchsen machen zū lassenn die zūm sturm zeug dienen.

xix. ¶ Item weyst du den sturm zeug in bie büchsen zūmachen zūm schiessen vnd werffen.

xx. ¶ Item weyst du auch was ein kleyn besatzüg erfordert oder ein grosse so die gleich von eyner weit gemacht sein soll.

## Eyn gesprech welcher massen eyn

**N**un hastu alhie zweyntzig fragstück die an ein  
baw zübedencken seind/ doch kan ein baw sie nitt al  
gehaben/ doch wollen sie am baw gesücht sein/ vnnnd  
was man der gemacht kan daran/ ist güc/ wiewoll  
ich dir dise stück züuor auch züm theyl fürgehalten  
hab/ dieweil sie dan beieinander gehörn / so hab ich  
sie dir wider beieinander gemacht / do bedenck dich  
auff/ ob du die all verstehest/ vnd in ein baw zübrin-  
gen weyst/ oder darnach anzulegen.

### Hans Willig.

**G**eber herr Zeugmeister ich hab euch vorgesagte  
daß ich mich des bawes noch zürzeit auff mich züla-  
den nit vndernemen will/ ich will das meinē herrn  
wider ab sagen/ vnd sein gnad bitten daß er euch an  
mein stadt dohin nemen wöll/ so bin ich des erbie-  
tēs daß ich euch getrewlich helfen will vnd euch der  
arbeyt über heben/ die ich auff ewer angebe außrich-  
ten kan/ vnd will also ewern bericht vor mich nemē/  
vnd es mit fleiß bedencken/ mich darinnē üben mit  
reissen vnd was mich darinnē vnderrichten möcht/  
so würd ich zü Gott verhoffen/ wo das ich also möcht  
ein iar oder etzlich bei euch sein / vnnnd ein baw sehe  
vnd helfen machen/ ich wolt es begriffen/ dan es solt  
mich keyn arbeyt verdriessen / darumb lieber herr  
zeugmeister wo mein herr euch darumb ansüchenn  
würd/ wil ich euch gebetten haben/ ir wolt euch nitt  
weern/ ich wil euch mit d arbeyt getrewlich helfen.

### Michael Gec.

**I**ch will dir sagen daß ich nit gesind bin einichen  
baw

## vester bawe furzunemen sey.

baw mehꝛ über mich zūladenn / du sichte auch woll/  
was ich für ein ampt hab / daß ich mein selbst nit bin  
dan ich muß meins ampts warten / do hab ich gnüg  
mit zuchū vnd mehꝛ dan ich wol vermag / aber dir  
zügefallen / wan es dein heer leiden möchte vnd an  
mich begert / so wil ich gern mit dir zū deinem herrn  
vnd dich helffen entschuldigen / vnd mein güc bedüc  
ken dein herrn mittheylen zūm besten / ich kan wei  
ter dir nit zūsagen.

## Hans Willig.

Geber Zeugmeyster ich wolt daß mein herr vnser  
rede gehört hett / zweiffelt ich nit er würd es zūm ho  
hem bedencken nemen / vnd der sachen weiternn rath  
pflegen / ich bit euch so ir zū meinem herrn kompt vnd  
sein gnad mit euch darvon reden würd / so begegnet  
im mit solchem vsachen wie mir.

## Michel Gcc.

Geber Hans ich will mich mit deinem herrn dar  
umb zweyhen / nach inrede inlossen / die herrn mö  
gen es nit all leiddenn / ich hab aber dir zūgesagt ich  
wöll dir ein kurtzen bericht von ein baw zūstellen /  
auch ein baw oder zwen inn ein visierung stellenn  
mit eym vnderricht wie der zūuerstehn ist / vnd was  
beileufftig eins Bawmeysters ampt ist / vnd sein be  
uelh sein will / deßgleichen eines angeber eines hauf

Nun wil ich dir sagen was eines bawe angebers  
wissen sein soll / vnd auch eines bawmeyster der den  
baw fort vnder handen nimpt vnd versorgen soll.

E ij

Ein

## Eyn gesprech welcher massen eyn

**E**in baw angeber ist ein person der raht gibt wie der baw gemacht sein soll/ vnd von im geordnet mit allen weern/ vnd warumb ein iede weer auff seinr angeben also gemacht/ vnd wie die zugebrauchen mit allem dem das darein gehört gemacht werden soll. Zum andern soll ein angeber wissen alle maß einem baw zugeben vnd zu ordnen nach gelegenheyt des platz/ nemlich daß er den platz wiß zümessen nach aller seiner gelegenheyt/ vnd fürter wiß alle weern darauff zu ordnen/ auch mit iren maßen/ die der platz leiden kan/ doch auch weerlich vnd starck weeren/ das muß er künden durch den iungen maßstab/ züueriungē nach dem grossen platz/ auch dasselbig augēscheinlich züreißen vñ fürte züscheidē / oder züuerstechen lassen / in das kleyn maß das er durch den Circel schierst auff den kleynen schnidt oder riß züfinden sei/ wie man das groß am rechten baw dar nach nemen vnd anlegen soll/ dardurch der herr des bawes sich züuersehen vnd zu überschlagen hat/ rach derhalben zühaltē/ vnd die werckleut die den machen sollen auch darinnen züuersehen haben/ ferner dardurch sich wissen zürichten/ Das bedünckt mich sei eyns angebers stück die er selbst wissen soll mit vorgemelten fragstücken/ oder eynerebei im hab/ der im das auff sein angeben wiß zü reißen/ züuerstechen oder züschnneiden.

**E**in Bawmeyster muß sich rechnungen vnd außmessens verstehn.

**E**r muß auch können überschlagen wievil rüden erden ein stück schüde von eynere gemessen maß/ des gleichen ein stück mawern haben will oder bedarff/  
vnd

## vester bawe furzunemen sey.

vnd wiewol fütter steyn darauß beileufftig gehn von  
aller gattung/ desgleichen den sandt vnd kalck.

¶ Auch besteller den werckzeug der darzu gehört zu  
eyner iedlichen arbeyt vnd dergleichen.

¶ Das gehört einem Bawmeyster zu/ wer aber ey-  
ner in dem ein angeber vnd bawmeyster verstehn o-  
der vertreten künde/ also daß derselbig dise stück al-  
le verstünd vnd wist die anzurichten/ wer so vil desto  
besser / vnd noch vil mehr: daß sich in d arbeyt finde  
zubesstellen vnd zuuersehen von nöten/ vnd sein vill  
do nit von zuschreiben ist / dann wer es nit versücht  
hot der weyß nit darvon/ als einer der ein baw oder  
etliche gemacht vnd vnderhanden gehabt hat.

¶ Dan welcher redlich vnd trewlich das versehē wil  
als einem der das annimbt gebürt / der darff woll  
daß er sich versehe/ dieweil das sein heer solchen ver-  
trawen in inen stellet/ vnd ob schon eyner diser sachē  
aller wol erfarn ist/ so acht ich doch vast beschwerlich  
sein solch ampt sich zu vnderfahen darff glücks vnd  
fleissig auffsehens/ wan er gleich einē herrn hat der  
des einenn verstande hat selbs rāth vnd hilfft/ ge-  
schweig so er einen vnuerstendigen herrn hat/ daß er  
seinen baw on tadel vnd nachteyl voln fürn mag /  
wie dan dick manchen begegnet ist. Darumb wer  
ie besser von dem werck mit sorgen abzustehn / dann  
darnach vngnad vnd schaden zuerlangen.

¶ So du das nün verstehest vnd kanst oder magst es  
zu danck außrichten mit allen fragstücken/ wie wir  
darvon geredt/ so gönne ich dir der ehren vnd gütes  
für eynem andern/ das geb ich dir für meinen rath  
wie du gehört hast/ durch bemelte beweglichkeyt.

## Eyn gesprech welcher massen eyn

Hans Willig.

**I**ch bedanck mich ewers getrewen raths / dan ich hab souil gehört / daß es mein wesen nit sein will / es ist gleich wol die warheyt / dast ich nie keyn baw hab gemacht noch helfen machen / aber mit fleiß sehenn machē / daß ich acht auff solche ding gehabt hab / darumb will ich es müßig gehn / dan ich weyß den dingen nit allen vor zusein / wie ir daruon gered habet / Bitt euch wollet mir gerachē sein / wie ich mich des an meinem herrn mit fügen wider entschlagē mög.

Michel Gte.

**H**alt auch dein herr vñ du euch bedacht oder berede wie ir den bew machen wolt / auch die walstade besehen vnd angeschlagen was ir an iedem ort für weeren vnd starck machē wöllet / oder aber weither rath darüber gehabt.

Hans Willig.

**M**eyn / wir haben nichts weiter dan ir von mir gehört habe gehandelt.

Michel Gte.

**I**ch sag daß dein heer vnd du es nit wol bedachte habt / vnd besonder hastu gantz nârrisch gehandelt vnd dir beschwerlich / Nun wolan ich weyß keyn andern weg dā daß du deinem herrn wider absagest / dan es ist besser ein kleyn nachtheyll dann ein größers / domit aber du mit fügen wider magst daruon kommen

vester bawe furzunemen sey.

mē vnd dein herr auch befinden sol/das du es gut vñ  
recht meynst mit gefüglichen vrsachen die auch für  
inen seind vnd am höchstē/ So hab ich ein vorschlag  
den ich mich versehen er soll dein herrn gefallen  
vnd soll es dir zu gnaden kommen lassen vñnd dises  
ist mein rath.

**I**ch will ansehē das du dein zūflucht zu mir hast  
vnd will dir ein vnderriete eins baws mit allen be  
griffen vnd zum fleissigsten ich das kan/alle vrsachē  
mit vnderriete stellen/darinnē zūbefinden ist war  
aus ein vester baw genommen soll werden / vnd wie  
fürter mit dem zūmachen mit allem gehandelt wer  
den soll/sond zweiffell so dein herr mit fleiß ersicht  
so wirt er darinnē befinden das ewer beyde anschleg  
nichtig/vnd besser ist vnderbleiben / vnd soll solchs  
dein bedencens ein gnedigs gefallen habē/ Darum  
sag im frei/das du der sachen seit der zeit habst nach  
gedacht vnd gefragt/auch bericht dauon der massen  
entpfangen/wo ewer beyder rath nach solt fürgefarn  
sein worden/ so werd ir beyde in nachtheyl vnd scha  
den gewachsen/ das er dann also in dem rath vñnd  
anschlag den ich dir machen will gantz ware vñnd  
gegründet finden wirt/ Darumb halt die sachen ein  
weil auff/bis ich mit meinem rathschlag reyd wer  
de / dann ich will fürderlich darzū thun vñnd will  
dich damit erinnert haben/ das du dir dises ein war  
nüg sein lest/vnd dich fürter solcher eh: nit lest über  
tragen/ solche schwere sachen über dich zū nemenn/  
denen du nit mit gutem beistandte wiffest vorzū sein/  
dann es nimpt mancher vmb cyner kleynen eh: wil  
len solche grosse sachē an der er nit weyß vor zūstehn  
das im zū lest zū dreifechtiger schande erwechst.

Hans

## Eyn gesprech welcher massen eyn

Hans Willig.

**I**etz befind ich das ir mir trewlich vñ mit allem fleiß gerathen/ auch wol an meinem herrn vnd mir gefarn habe/we yß auch nit war in ich es gegen euch vergelten mög/wiewol es vō mir nümmer mehꝛ in vergeß gestalt sonder weiter hierin vnd in mehꝛern sachen ewers getrewen raths pflegen will.

Michel Gte.

**H**alt diß deinē herrn mein ratschlag für/ vnd be- rede dich mit im / was dir begegnet sag mir wider/ dan dein herr möchte sich also darinnen hören lassen das ich dir nit rathen wolt das du es gar abschlagen soltest/sonder wolten etwan ein ordnüg finden / das wir den baw theylen wolten in mehꝛ person vnd mit beschriebenen ordnungen mit rath vñnd wissen deines herrn vnd andere/ als dan möchte er wol anzünemen sein züuersehen/ vñnd die ordnung zü halten/ so kanstu mit der zeit wol gelernen/ vñnd die ordnung die man darüber machen wirt mit sampt meinem rathschlag vor dich genemen / vnd dich darinnen übenn/ vnd im weither nach dencken/ so möchte wol dir gerathe das du es begreiffen möchtest/ vnd dar zü geschickt werden/ dan keyn ding lernet sich sonder angreiffen/ also macht übung vñnd fleiß meyster/ darnach hab dein gedencen/ so du lusten dar zü host vnd dich des vñnd dergleichen wilt vnderwinden/ vnd biß nit vn- uersücht meyster/ dan es geht swerlich zü vñnd mit grosser sorg.

Hans Willig.

Ich

vester bawwe furzunemen sey.

**I**ch will ewers raths volgen/ vnd mit ewern rath  
ferner handeln/dan ich hab ein grossen lust darzu/  
vnd mich bedunckt so ich wiß was ich thun soll es  
würdt mich keyn arbeyt noch mühe verdriessen / vnd  
so ich darzu kan/will ich mich nit weiter/sonder ew-  
ern rath vnderwinden/d züuersicht ir werdent mich  
auch nit lassen/dan ich stell mein vertrawē in euch

Michel Gcc.

**W**er es sach daß dein herr vñ du euch eins mosters  
eins bawws/verdragen hett vnd ich den sehen möcht/  
stünd dan derselbig etwann vnformlich so wolt ich  
dir helffen so vil ich des mich verstüde in ein bessern  
form zustellen/damit du wider mit dein herrn inn  
disputation kommen möchst / darauß würdt volgen  
daß der baww möcht mit andern geschickten vnd bes-  
sern wegen fürgenommen werden/vnd du mit fragen  
auf bericht die sich darunder zücragen werdenn/ es  
mit einer andern maß möchst annemen / dieweill  
das aber nit ist/so will ich dir ein par visierung ma-  
chen die zeyg dein herrn mit vnser disputation das  
wirt es doch noch in ein andern weg vnd bedenkens  
dreiben/ damit du mit fragen von ewern ersten an-  
schlag kommen magst.

**A**uch so will ich dir ein drewliche warnung ge-  
ben / ob du würdest des bawwes als ich verhoffen ein  
verstandt bekommen vnd mit vmbgehn wollest daß  
du dich mit fleiß besehest / wo das ein platz darnach  
gelegen wer/daß er nit vest zümachē ist/daß du dich  
des nit vndernemen wollest/ dan do ist nit züerlan-  
gen/ dann schad vnd spott vnd ungenade.

Das

## Eyn gesprech welcher massen eyn

**D**as ander/ ob du schon vom eym herrn erforderet würdest im ein baw zümachen / vñnd der wall oder platz gleich güc weer/ vñnd dein heer der wolt den etwan anschlagen vmb geringe kostes willen / daß er nit geschickt gemacht würde/ als offte geschicht / daß man ein baw so nerlich an hept/ so der auß gemachte wirt/ daß mā nicht darauß dar in aber darauß thun kan/ vñnd steht da/ vñnd ist gantz vnweerlich/ vñnd ist dan der platz auch vergraben/ ob mā im fürter gern helfen wolt/ so kan es dohin nit sein/ vñnd ist das gelt das daran verbauet verlorn / vñnd was güter gesellen darin gedeydinge werden zü der zeit der not / die seind oder werden verfürte. Also ist es zü nicht güte vñnd wer besser gelassen/ dan es do steht vñnd gilt über redens/ vor solchem hüt dich/ dan hettest du schon inn eym andern baw ein ehz oder güc geschrey erlangt/ so würff dieses/ so du ein solchen verlornen baw machen würdest / dich wider zü rüick/ ob es schon nit dein schuld were/ daß weyß nit ein iedermann / darumb laß es ein andern machen/ dā es ist besser erst im abgeschlagen/ ein kleyne vñndancck verdient/ dan hernach ein grossen vñnd ein bösen rüff.

**V**ñnd so du zü eym baw mit zürathen erforderet würdest vñnd darumb gefragt/ so frag züm ersten ob er soll vor gewalt gemacht werden/ vñnd vor ein kleyne besatzung oder zü einer grossen/ vor ein anlauff oder schlecht vor ein schein/ darauß ist dā auch zü rathen wie hievor daruon angezeygt ist/ alsdan so kan einer nach gelegenheyt rathen/ vñnd sein meynüg destobaß gerathen/ doch so hüt dich vor verdorben bewen.

Ein

vester bawwe fürzunehmen sey.

## ¶ In vnderricht eines ve-

sten bawes anzulegen/vnnd auß was grundt das  
genommen/ geschehen/vnd wie der im reis  
sen verstanden soll werden.

¶ Erstfenglich so will der platz besehen sein/ er sei  
eben oder nie vnnd gemessen/ wie weith er mit  
dem gantzen bezieck soll fürgenommē/ wo vnd war  
auff er gemessen soll werden / wie dan hernach ey-  
genlich mie gutem vnderricht dargethan wirdet.

¶ Zum andern/so sollē alle leger die darumb seind  
die den baw erreychen mögen mit allem fleiß durch  
die sich schiessens verstehn besehen sein/vnd also ein  
leger nach dem andern fürgenommen / vnd was vor  
stück büchsen auff solchen läger zugebrauchen vnnd  
zu legen sein/bedacht/vnd von was groß sie sein kön-  
nen gerings umbher eygēlich auffgezeychnet werdē

¶ Zum dritten/so wil besehen sein/wo daß etwann  
zwey oder drei läger wolten auff ein platz an der ve-  
sten sich schicken/ also das vonn den beyden lägern  
würdt ein platz an der veste züschießen sein.

¶ zum vierdten/so will darauff gesehen sein/ so ich  
nich für einen läger mit dem baw verwart vnd ver-  
bawt hett/das der ander läger einer oder mehr nitte  
darauff in rüek schiessen mögen/das will in dē baw  
gar wol bedacht sein.

¶ zum fünfften/soll eygēlich auff die überhöhe ge-  
sehen

## Eyn gesprech welcher massen eyn

sehen/wie die im̄ baw souil möglich / gedeckt mag werden/das bedarff eines besondern hohē fleißigers auffsehens vnd nachdenckens/das mit schreiben nit angezeygt werden mag/ dan es will im̄ augenschein geschehen.

**Z**um sechsten so wil ein jedes läger wider für die hand genommen werden vnd überschlagen sein/ also als solt eynex mögen gebrauchen auff eynem läger vier scharpffen metzen/vnd will rechen wie offte die einen tag mögen geschossen werden/auff das aller meynst/ vnd souil schüß mögen so dieff inn ein mawern oder schüdt darnach ein jedes ist/brechenn/ Darnach wil der baw ann dem ort / es sei mit schüden oder mawern angelegt sein oder werdē/ das mit solchem geschütz an dem baw in acht/ viertzechen tagen oder drei wochen sie nit schaffen mögē/ ob gleich alle tag wirt so offte geschossen wie oben vermeld vnd also will allen lägern geschehen/mit dem überschlagen ein jedes nach seiner zal vnd groß der büchsen/ das muß durch ein geschehen der sich schiessens / legern hinaus vnd herein versteht/ vñ wil fürwar nit auff die werckleut gestalt sein/dan solcher verstande vnd die moß zunemen vnd anzulegen ist nit bei den werckleuten/ sond es muß geschehen durch die solchs verstehn vnd gebraucht haben/ Vnd so das im̄ grund in die recht maß angelegt ist/ Dan so ist es dē werckleuten vnder handen zugeben/ daß sie dasselbig fleißig vnd wol machenn/ so eynex dan besser verstendiger werckleut hat/ so besser. Doch wil alzeit woll darauff gesehen sein/ daß nit auß den moffen gegangen werd/ vnd vor allen dingen so rathich daß zūtor rechte visierung auß den iungen oder kleyn maß soll gemacht


## vester bawe furzünemen sey.

gemacht werden/dan es ist baß auß einer visierung  
züendern vnd zü besseren dan an dem rechten baw/  
dan an einer visierung ist nit grosser kost verlornn/  
ob der eine schon nit gar gerecht / dann es ist ein alt  
sprichwort/es hab nie keyner keyn hauß so wal geba-  
wet/solt er es noch ein mal bawen / er bawet es an-  
ders/darumb soll ein ieder der ein grossen baw thun  
will/sich nit tawren/ein visierung schneiden vnd  
machen lassen züuorn/wie obē angezeygt ist/Aluch  
so wirt einer darauß bericht mit allem anstellenn/  
vnd auch die werckleut/ vnd so ein werckman felehn  
würd an der arbeyt/so ist im destobaß einzüreden /  
dieweil er es geschnitten für im hat/Darüb so rath  
ich noch wie vor einem ieden ber bawen will zü visie-  
rung/die mit fleiß in die recht maß erstlich gerissen  
vnd dan geschnitten seind.

**Z**üm sibenden/sollen auch gerechnet werden alle  
leger mit iren überschlagen büchsen/ die man mey-  
net darauff zübrauchen / vnd so die seer vnd fleissig  
geschossen werden/vnd die schuß gerechent wie hie-  
uor dauon angezeygt was für ein sum puluers trag  
vnd doch nit damit außgericht würd/so macht es ey-  
nem wider ein hertz/vnnd ist züdencken daß einer  
dann desto lustiger zü bawen ist/vnd sich nit tawren  
läst/daß er sterck gnüg daran legt/damit er sein wi-  
dertheyl oder feind darmit mit macht vnd auß har-  
ren mög/ daß soll alles inn ein baw zümachen ge-  
sücht sein/es sei was das wöll/damit man den fein-  
den nür vil züschießen gebe / dardurch geht im das  
puluer vnd die zeit auff / vnd ist zügedencken was  
im zü vnderhalten des kriegspuolcks vnd anders für  
ein vnkosten lauffen wirdet.

¶ ij

züm



In dieser Figur ist zuſe beide vnder vnd ober  
grunde durch beſtzug / darauff mit  
iren heraten linien.

## Eyn gesprech welcher massen eyn

**Z**um achten/wie vnd damit man den abriß ver-  
stehn mag/vnd alle maß darauß nemen sol/hab ich  
erstlich hie vorn ein figur gerissen/darinnen zūfin-  
den alle maß vnd was vnden vnd oben ist / vnnnd be-  
deut einer schüt grundt vnden vnd oben vnd wie mā  
mag das eußer in einander bringen / was oben oder  
vnden ist oder gehört/dan es leigen beyde grund vn-  
den vnd oben bei einander/deßgleichen die chor oder  
lendung das zeychent vnd weist sich auß durch denn  
außzüg/als wā die schüdt auffgericht stünde/als hie  
vnden steht auff dem grundt schüd auffzogen/vnnnd  
die striechen die vorn dem oberm grūd herab gezogen  
seind/die gehn auff die vndern strichē die im bodem  
leigen/vnnnd zeigen dieselbigen die hinauff inn dem  
oberm grundt gehören. Vnnnd wie ein jedes genent/  
wirt bei einem ieden geschrieben / wie die figur das  
alles anzeygt/was im grundt ist / vnd wie man das  
auffzeychen sol/das findt man inder andern figurē  
den driangel. Also so nem die dick von der schüdt/vñ  
mach ein driangel darauß/vnd stech die maß all in  
driangell auff die ünnderst linien / wie sie in die vi-  
sierung im grundt leigē/sonder der graben vnd zeug  
die zwerch an beyden orten in den driängel wie hoch  
die schüden vornen mit der borst weer werden wür-  
de/deßgleichen hinden doch daß die streichen winc-  
kel recht werden auffgezogen von der vndersten lini-  
en/also streich dan als von einem strich zū dem an-  
dern/so finstu die schüdt mit irer form vud massen  
auffgericht/würd aber die schüd in matern gefast/  
vnd die matern würd an eynem ort höher dann die  
ander/so lest es sich nit in driangel brēgen/es laufft  
darauß/wie du das mit dem anfang am gerissen dri-  
angel findest / mit dem büchstab A. verzeychent/  
dan

## vester bawe fürzunehmen sey.

dan so vil die mawer an einem ort höher wirt dann an dem andern/ so würd die schüdt halb souil/ dann der driangel vnd durch das strichlein das schier leitt hinden an der brostweer / wann dasselbig sich recht schert vnd legt sich in driangel hinder der brostweer oben biß auff die recht schüdt/ vnd die brostweer oben ir recht breyte behelt wie angezeygt im reissen/ Vnd so dieselbige schon hinder sich leyffe gerecht/ vñ triffe den andern auffgezogen strich ein an seinem rechtē ort / vnd zeyget dā die höhe der schüdt do er den andern triffe oder zūsamē kommen/ do ist die recht höhe/ den ziege dan hinder sich über zwerch so weit sich die breyte in der visierung angeygt/ über den driangel/ vnd dan so zeug den schüwstrich hinab neben dē driangel alles inn einer weit vom driangel so finde er sich/ dann wo der best auffgezogen strich denn andern triffe vnd gibt die höhe der hinder mawer vonn im selbst/ das lest sich in schrifften nit so verstendig angeygen/ als mit dem zirckel zūzeygen ist.

**Z**um neunten/ so ein schüdt würd abgemessen wie hieuo: darvon gemele/ ist es gleich der obergrüde vñnd dem obergrunde nach oder der vndergrunde/ auch gesücht vñnd die maß genommen / so soll der vndergrunde auff dem bodem/ darauff die schüdt gehört vñnd stehn soll/ die maß abgezogen vnd verzeychend werdenn/ vnd soll alsdan die schüdt gemessen werden vñnd überschlagenn / wievil rüten erdens sie bedörffen ist/ vnd der selbigen zal rüten nach soll der graben auch fürgenommen werdenn mit seiner weiche vñnd dieffenn daß es gleich die erden ertrag die man zū vñnd auff die schüdt bedarff / damit der  
graben

## Eyn gesprech welcher massen eyn

graben nit wirt zuweith fürgenommen daß er zuvil erden gebe/ damit man inen nit möcht tieff genug machen/ der überigen erden halb/ Darüb will zuuor dasselbig wol überschlagen sein vnnnd besehen wie tieff er vnder sich kōmen mag mit dem graben vnd haben will/ darauff sol die weithe angelegt vnd genommen werden/ wo das nit also geschicht / vnnnd es leyfft eynem zu vil oder wenig erden/ so macht es einem ein groß vnordnung/ mühe vnd kosten das zuuorkommen/ mag geschehen durch den weg wie oben gemelt vnd angezeygt ist.

## Zu Verdingen.

**I**tem so einer die erden zuschütten verdingenn will nach der rüten/ das soll mit diser maß für genommen werden/ So er wann volck zu dir kompt vnd dingen will/ so mach rotten vnder inen als xx. oder xxx. in ein rott vnd nit darüber / auß diser vrsach wie volgen wirt.

**I**tem so mann hat xx. personen in einer rott/ so mach vnder denen einen rotmeysteren denn schreibe er ein mit seinen namen/ vnnnd die namenn seiner knecht/ vnd mach im sein eygē register/ vnd geht mit im auff die arbeyt vnd mist im ein stuck erden für/ daß das selbig stuck erdē über dē graben überzwerch vnd nit so groß sei/ dan so sie ein groß stuck fürhabē geht es nit von statt vnd kompt die schüdt langsam in ein maß/ so sie groß stuck auß machen sollen/ die weil so bleibt die schüdt am selben ort langsam auß gemacht/ do das stuck erden eingehdt/ dā so ein rott auß der arbeyt geht so bleibt es liegen/ hetten sie ein  
Eleyt

## vester bawe für zunemen sey.

Kleyn stück gehabt/so wer dasselbig baß außgemacht  
gehn sie schon darauß/ so ist doch nit vil damit ver-  
lohn/ Arbeyten sie es aber auß so gibt man in vonn  
stundan wider eins/ vnd also für getrüct/ so kompt  
ein rott ein mol an ein güc stück / das ander mal an  
ein böß/ wie sich die gelegenheyt zütregt / so dörfen  
sie nit klagen daß einer für den andern werd in das  
güt oder böß stück eingestelt/ dan wie sie die rei ver-  
ruckt/ als ein vmb den andern/ darüb soll man inen  
auff ein mal ein ieder rot ein kleyn stück fürgeben/  
vnd die rotten neben einander stellē / welche rot dan  
sein stück hot am ersten außgemacht/ die stelt man  
also fürbaß wo die rei erworren hot/ wider an vnd  
also für vnd für.

**¶** Vnd so man einer rott ein stück nach dē andern  
verdingen will/ so soll man vorhin der ruten eins  
sein/ was ir lone soll sein. zum andern so soll es  
inen verdingt werden nach der stracken elenn vnd  
nit nach der schälen. zum dritten so soll inen ver-  
dingt werden/ das gemessen stück erden vnden vnd  
oben außzuführen in einem geding / wie es die rutt  
tregt/ vnd zulegen vnden vnd obenn auff die schüde  
wie sich das zütregt gegen seinem stück / damit sein  
erden auch auff in die höhe kome vnd nit in die brey-  
te wie in der meyster das weist/ Das soll alle woche  
einer ieden rotten sein arbeyt überschlagen werden/  
wie vil er auß gearbeyt habe / darauß soll inen alle  
wochen ir bezalung geschehen/ also daß im doch alle  
wochen werd noch etwas ann seiner beschehener ar-  
beyt inbehalten/ vnd das nit gar bezalt / ob er wolte  
auß der arbeyt gehn/ vnd het die oberste erden weg  
geführt vnd nidergelegt/ vnd wolt die dieff erden in

B

die

## Eyn gesprech welcher massen eyn



die hohe züfürhen ligen lassen/ so im die außgefürte erden nit gar bezalt ist/ so müß er die andern auch auß arbeyten oder das gelt/ das im ingehalten sich erwegen/ damit kan mā alsdan dem andern der im solche gelegte erden trecten wirt züstatten kommen. Arbeyt einer aber sein stück in eym gar auß / alsdā soll im sein stück gar bezalt werden mit sampt seinē inhalt/ vnd sein register/ darmit einmol beschlossen auff ein grundt außmessung vnd bezalunge vnd nit mehr dan mit dem rottmeyster gehandelt/ vnnnd nit mit seiner burß oder knechten/ vnd zü der annehmung/ bestellung oder geding dises fürbehalten vnd nür nit darauß gangen/ ob sy sich schon des beschwerten/ vnd stellen sich als wolten sie es annemenn / ist sich nit daran zükereen/ dan es ist ir gebrauch/ man halt nür gut bezalüg/ vnd mach das geding / daß es die armen auch mögen erleiden vnd zükommen/ vñ stelle sie nür geschickt ane/ vnnnd für allem dem der das zuthün hat oder haben will/ der sehe vnd ordene inen daß sie mögen ire speiß in irer vnderhaltung haben vmb ein zimlichen pfennig/ daß sie damit nit übersetzt werden/ so künden sie auch liederlich vnnnd geringe dingen/ dā so besser es zü zerē ist / so sie auch leichter vnd baß dingen mögen / das ist des herrenn bester nütz.

**¶** Darumb ist hoch von nöten daß ein herr der bawen will/ vnd es ein zeit langk harren müß / daß er für das erst versehe vnd ordnen / vnnnd solt der herr gleich die vnderhaltüg auff solche leutche selber kaufen vnnnd seine leutche darüber setzen / daß die selbigen/ daß den arbeytern vmb ir geordēt gelt ein jedes nach seim werth reichē/ es wer speck/ hering/ bütter krauth/

vester bawe fürzünemen sey.

Krauth/ keeß/ birr/ broot/ vnd detsgleichen/ wie die  
lande das vermögen vnd der brauch ist/ dan wo man  
mag die dünne vnd liederliche speiß haben/ das ist  
fürsolche arbeytern/ doch so soll mit denē arbeytern/  
vnd mit denen die solche spießung in reychen / diese  
ordnung gemacht vnd gehalten werden/ daß die/ die  
solche vnderhaltung inen reychē/ daß sie die rottmey-  
ster auffschreib/ vnd was bei inen außgenömen wirt  
daß sie nit so bald bezalen/ daß sie das durch die rot-  
meyster thun/ vnd mit eynem ieden rottmeyster auff-  
schreiben vnd anschneiden/ vnd auff welchen tag in  
der wochen inen ire bezalung angesetzt ist/ der dan  
inen zügliche gehalten werden soll/ daß auff solchen  
tag die verordeten über solchen vnderhaltungē auch  
seien/ vnd ir register dar legē/ vnd mit eynem ieden  
rottmeyster rechen/ vnd auff ire rechenung / so sollen  
die selbigen für das erst bezalt werden/ vnd was übe-  
rig/ daß dasselbig werd den rottmeyster laut seyner  
gesellen arbeyt gegeben/ also sollen mit denen rott-  
meystern gerechent vnd bezalt werden/ vnd nit mit  
eynem ieden besonder/ so treiben sie selber eyander  
zū der ordnung/ vnd hüten sich für überiger zerun-  
gen vnd außnemen. Darumb ist bedacht rotten vnd  
rottenmeyster zū machen vnd doch nit groß rotten/  
vnd ist denen die den baw züuersehen vnd zū rechen  
haben güte richtig vnd leicht/ vnd dem herrn müssen  
güte rechenung darüber geschehen/ dann ich acht bei  
mir daß die anstellung an einē baw/ so die geschick-  
lich vnd fürderlich angericht geschehē mag oder für  
genommen/ daß es einem herrn gar groß fürtreulich  
sei/ vnd allen den die darmit vmbgehn/ so sie anders  
gern from sein wollen/ darumb ist von nöten solche  
anstellung vnd dem/ dem von einem herrn ein bawe

S ij züuer-



●	
●	
● ● ● ●	● ●
	● ●
	●
	●

In diesen dreien Figuren ist zu finden wie ehrt  
 wall oder dam zuergleichen/ zu messen vnd zu  
 rechen sei/ die rücten zal darinnen/ wie  
 hernach das durch die schrift ver  
 stendlichen wirdet dar  
 gethan

## Eyn gesprech welcher massen eyn

zuersehen beuolhen wirt/das er solchs wol versehe  
vnd wiß auß vnd darzü messen / vnd bei solchē auß  
vnd darmessen fleißig sei/vnd die rechnung alle wo-  
chen selber vnderhanden neme vnd vom baw schrei-  
ber die er hot vnd zü im nemen/vnd das sie nür vill  
auff der arbeyt sein/ so geht es von stadt/dan es kün-  
den nit alles dinger oder bestender sein / sonder es  
müssen auch taglöhner vnd ander da sein/die habenn  
das zusehen nit gern. Dan ich beschließ dißmal hie  
mit/das güc anstellung fleißig bei sein will/bei dē  
baw vnd den herren vil nütz bringt.

### ¶ Zü lenden oder messen find man in diser figur.

**D**em so eynen ein schüde lēden oder messen will  
das er weyß wie vil rütten erden er darin hott  
oder darauff haben muß / dem ist kürtzlich also zu-  
thun. Ich nem für mich ein stuck schüde also wer  
die dick am bodem hundert schüh / vnd wer hoch  
vierzig schuh / so behelt sie oben an der dick sechzig  
schüh / dann alwegen so ein schüde einer elen hoch  
wirt auffgefürt / so gehört auff ein ieder seitten ein  
halb elen / so man die rütten zall dan gern wissen  
will / so thü im also / Dieweil die schüde hot vnden  
hundert schüh vnd oben lx. so ist sie vnden lx. schüh  
dicker dann oben / so thüt man vndenn xx. schüh ab  
van den hunderthen / vnd gibt sie oben den lx. schü-  
hen zü / so bleibent vnden vnd oben lxxx. schüh das  
ist verglichen.

¶ So ist sie nün vergleicht wie ietzüd gemelt durch  
auß lxxx. schüh dick so sol mā auch die schüde lxxx.  
schüh lang für sich nemen oder so langk als sie dick  
ist /

vester bawe fürzunehmen sey.

ist/dā es ein gefierter platz wirt/so ist der platz nūn ein weg wie den andern lxxx. schūhen/so legt wie vil lxxx. mol lxxx. ist/das macht sechs tausent vierhundert schūh.

¶ Item so man will rütten darauß machenn so soll man wissen/wie die rütten genommen werden sollen/das zūnerstehn/so ist im also wie volget.

¶ Es ist ein werck rūch acht elenn oder sechtzehenn schūg langē/so ist ein rütten leng rütten breyt / vnd ein elen oder zwen schūh dick oder hoch ein rütten erden gerechent/ Nūn so ist die rütten xvi. schūh lāgē so ist xvi. schūh ein weg vnd xvi. schūh den andern weg ein rütten vnd wirt gefiert/Nūn leigen in dem gefierten stück das mit den rütē also gefürht ist xvi. mal xvi. schūh / wievil schuh macht das? es macht dritthalb hundert vnd sechs schuh.

¶ Item so legt die sechs tausent vnd vierhundert schuh wider auff die linien/vnd hebt alle mal auff dritthalb hundert vnd sechs schuh / so ist es ein mall ein rūch/ die zeychent oder legt sie auff/vnd hebt so offte dritthalb hundert sechs schuh vonn den sechs tausent vierhundert schuhē biß daß nit mehr do bleibt so findet man xxv. rütte/das ist nur einer elen hoch/so ist die schūde xx. elenn hoch / darumb so legt die xxv. ruten xx. mal so treget das gantz stück schūd da lxxx. schuh langē fürgenommen ist/ ann ruten zall fünff hundert ruten erdens / so soll alwegen einr stück zūmessen fürgenommen werden/ als lang als es dick ist/so sie vnden vnd oben vergleicht ist/wie oben angezeygt/vnd so einer also ein schuh hot/so nē er die  
sommen

## Eyn gesprech welcher massen eyn

sonnen so oft als die schüdt diser stück langk ist/ Vnd ist ein brüstweer auff der schüdt / die mess er sonderlich/ wie die schüdt gemacht is vnd wirt sich zütrage daß ein rütten nit gleich were / so wurd die schüdt an einem ende höher dan an dem andern/ das will auch in ein gleych höhe gemacht sein/ gleich wie mit der dicken.

**E** Item es ist von nöten welcher sich reissens vnder stehn wil/ vnd besonder auff die veriüngung daß er güc acht habe/ daß alles was er mit der veriüngung im grundt legt/ daß er dem selbigen durch auß vnd einem ieden riß besonder sein rechte veriüngung vñ maß gebe/ vnd lege ein ieden riß auch gemessen / wo er gehört/ vnd theyl die mit der scharpffierung vnn einander domit eins für dem andern verstandenn mag werden was ein iedes ist/ vnd wie ein mol einn scharpffierung im reissen gebenn wirt / Also soll es ein iedes in dem riß sein scharpffierung behalten.

**E** Vñ so einer wie gemelt/ sich reissens vndernimbe besonder was zü vesten bewen gehört/ daß er nür güc acht hab / auff die öbern grundt besonder was vnn schüdten gemacht ist/ Alber das sich in der scharpffierung aller leng verleurt/ dan man handelt nit auff dem vndern bodem/ sonder es müß auß dem öbernn bodem fürgenommen/ vnd den platz oder weitung wol abgetheylt vnd gemessen sein/ auff vnd zü dem/ daß man darauß handeln vnd brauchen will/ dann es will darauß acht gehabt sein/ daß einer die gelegenheyt der plätz recht besehe/ vnd besehe was er für ein stück darzü gebrauchen van nöten habenn müß/ als wer es van nöten daß er do müß ein Cardaunn brauchen

## vester bawe furzunemen sey.

brauchen/ so muß er ein Cardaum mit sampt iren  
laden messen vnd veriünge die in dē maßstabe/ dar  
auß er dē riß thun wil vnd besehe darnach was noch  
für raum vor der büchsen sein wil / darauff er közb  
vnd anders stellen muß die büchsen zünerdecken/ er  
sehe so die büchsen geschossen wirt/ was er vor raum  
wider haben muß die züwiderladen vnd zürücken /  
vnd was die lad schauffel so die in büchsen gethan  
soll werden/ was sie für raum haben will/ das sol al  
wegen mit einer grossen büchsen auff ein platz ver  
sücht werden züuor/ vnd eygēlich gemessen/ so wirt  
sich alsdan finden der raum den man haben muß/  
vnd also nach einer iedē büchsen/ wie die darauff ge  
braucht soll werden/ Dēnach so findet sich dann der  
vnder boden selber im aberziehē vñ reißen/ darnach  
die schüdt hoch oder nider sein soll/ dann so sie höher  
wirt/ so sie alles vnden dicker leyfft / Darauff will  
es auch wol acht gehabt sein / so einer wil ein schüdt  
vmb ein flecken fürhen daß sie oben vmbher soll wo  
recht gehn vnd oben auch gleich ein dickung behal  
ten daß er eben darauff lüg/ daß der vnderbodem nit  
an einem ort mehr hancf dan an dem andern / Dan  
so ein bodem vnden nit gleich ist vnd wirt die schüdt  
vnden gleich einer dick angelegt/ so wirt sie oben vn  
gleich vnd kompt gar nit in ein maß / dan do der bo  
dem am nidersten ist/ das wirt schüdt am höchsten/  
vnd ie höher sie wirt gefürt/ so sie alles kleyner wirt  
Darumb wil das in dem anlegen geschehen vnd ver  
sehen sein/ dan wie es vnden wirt angelegt/ also gehe  
es hienach sein gang/ ob einer schon wolt es im leger  
oder schorn verkommē vnd es lassen daran lauffen /  
so wirt es wol oben gleich/ aber inn der bendung oder  
schorn ist es wider vngleich vnd falsch.

S

166

## Eyn gesprech welcher massen eyn

**E**s wil auch eygentlich besehen sein / so einer ein schüdt anlegen will daß er besehe auch nach allen legeren / dargegen die schüdt gelegt sein soll / wie hoch oder nider die von nöten sein will / dēnach solt sie angelegt werden / doch alles wie obē bemelt / daß es auß dem öbern grundt gesücht werde / dan es sichte oft einer ein schüdt an einem ort die gut vnd wolgemachte ist / vnd deckt wol / vnd so die moß dan genömen wirt vnd an einem andern ort der massen gelegt so soll sie wol zū hoch oder zū nider sein vnd nit deckenn / oder den platz erreychen mögē / darauß sie sich auch weeren soll / darumb acht ich daß alle weer noch gelegenheit der plätz fürgenommen vnd angelegt werden / es sei gleich noch der hoch vnd lang vnd stellung der streichweer / dan es tregt sich nit zū / an eym end als an dem andern / besonder mit dem streichweeren / dan es beückt sich eins hierumb / das ander anderß wo / darauß will auch gar wol acht gehabt sein / daß die wol auff einander gericht sein / daß eine die andern retten vnd zū hilff kommen mög. Dan es köpfe wol / daß man einn schüdt anlegt vnd sie verbeuche zwischen den weeren daß die streich darnach nit zūsammen zūbrennen seind. Darumb bedunckt mich es sei von nöten daß die streich weern für das erst geordnet / vnd dann die schüdt den nachgezogen werden vnd zwischen den streichweern strack / daß es keyn loch zū dem andern zūschießen verhindernn mög / wie das noch wol weiter zūmachen mag angezeygt werden.

Ordnung

vester bawe fürzunehmen sey.

## Ordnung zum bawe anzustellen mit dem vorrach.

**Z**erstlich so einer wil ein grossen Bawe machen  
oder ein vestnung geben/ vnd ein zeitlangk zu-  
bawen wern sol/ ist von nöten ein güte anstellüg/ es  
sei mit mawern oder mit schüdtē welcherley das sei  
so will es sein eygen bestellung vnd ordnung haben.

**Z**um andern so loss ein rüten mawern oder zwo  
machen/ do behalt gantz wol wieuil wägen vngeuer-  
lich darauß gehn/ vnd wie groß vngeuerlich ist / vnd  
wieuil kalck darzü kompt/ desgleichen der sandt / so  
man das hot so ist zu überschlagen bei einē beileuff-  
tigen/ was auff die gantz mawern vnd die rüde zal  
gehn wil vngeuerlich.

**Z**um dritten/ Nun muß man sehen wieuil wägen  
man haben muß ein tag auff souil mawern wieuil  
du der haben wilt/ vnd wieuil wägen die haben mus-  
sen/ die inen gnüg zufürhen künden.

**Z**um vierdten/ du must auch sehen wie oft du ein  
tag in den steynkauten gefarhen kanst.

**Z**um fünfften/ du must auch wissen wan du wilt  
souil wägen haben wieuil du person die zum steynn  
genug brechen haben must.

**Z**um sechsten/ du must habē doppel wägen/ daß al  
wegen der ein theyl bleiben in der steyn kauten stehn  
die eyn weil geladen werdē wan die wägen wider ko-  
men/ daß sie geladen wägen finden.

H ij

**Z**um

## Eyn gesprech welcher massen eyn

¶ züm sibenden/das gute zeuge in der steyn grüben  
seien/so anders groß steyn gefallen das die werden  
mit auff die wagen geladen/das geht von statt vñnd  
sein die leut dobei verwart.

¶ züm achten/das gut ordnung gehalten so die steyn  
bei dem baw abgeladen das sie nach vortheyl gelegt  
also das die grossen steyn dermassen gelegt werden  
das sie die kleyn nit bedecken / dan die grossen muß  
man für das erst haben/in die grundt vñnd in die ni-  
drige/dan die kleynen seind baß in die höhe züuerar-  
beyten dan die grossen.

¶ züm neundtē/es müssen auch die steyn gelegt wer-  
den bei die arbeyt so nohend als man kan / doch das  
sie nit hindern die grundt zügraben / vñnd desglei-  
chen auch sollen die steyn getheylt werden mit denn  
lågern/das sie sich nach der leng strecken/ wie sich  
das mawerwerck streckt/nit das sie alle auff einem  
hauffen ligen/vñnd so die mawern sich für streckt/  
das man die steyn dan muß nach fern dohinden ho-  
len/das wil der vnderzall vñ der summa der wägen  
nach vngewerlich gerechnet werden/kan sich so gantz  
nit zütragen/doch sol man mit fleiß acht habē souil  
man des kan/es kompt hindē nach alles zü vortheyl.

¶ züm zehenden/es kompt auch dan das man kalck  
holen muß / desgleichen den sandt das wil auch di-  
sem gleich geordnet sein/ darnach der weit züholenn  
ist/vñnd wievil man des habē muß / also das keynes  
das ander hinder/ dan es kompt wol das vnderwei-  
len im steyn bruch nit vil steyn gebrochen sein/ dar-  
durch sie die wägen zeitlich fertigē können/als durch  
abrammen

## vester bawe für zunemen sey.

abrawmen vnd anders etc. Alsdan so sollen die wägen ein weil im kalck/sandte vnd desgleichen gestalt werden/dieweil wirt wider ein vorroth steyn gebrochen. Es kompt auch wol/das einer sein kalcksteynn selber bricht vnd bränen lest/darzu er sein fürwerck auch bedarff/als die kalcksteyn bei dē ofen zufürher desgleichen das holtz zu brennen/das wil alles beeynand geschē/darauff ist von nöten gut achtung zühabē/das alles eins bei dem andern geordnet vnd zügestellt werde/damit wann das sich es begibe das eins nit zühün ist aber nit so hoch von nöten/das dan das ander geschirr nit müßig stehn / vnd inenn hernach eins auff das ander kommen. Darumb ist zu disem/so es anders vil zühün ist/ein gütter verstandiger fleissiger ansteller hoch von nöten.

¶ züm eylfften/so wil gut achtung gehabt sein auff die tag wie die ab vnd zunemen die geschirr oder fürwerck darnach mit irem auß spannen züordnenn/das der tag nit zu vnnütz gebraucht werde / vnd die pferde nit übertrieben/ als in dem winter so die tag kurtz seind/so ist bei der nacht nichts zuschaffenn/so stehn die pferde die langenn nacht in dem stal/darumb sollen sie zu mittag nit langen mittag machē/sonder so bald sie gessen/so sollē sie wider anspannē. Aber in dem sommer so sie die morgen frū einspannen vnd den obent langsam auß / dan so müssen sie zu mittag destobas rühen/Doch ist nit gut das man sie wol zu mittag zu lang stehn/vnnd den obent dest lenger arbeuten lassen/dan die pferd ruhen doch nit vil in fliegen/dan spandte man zu mittag bald wider in so komē die pferde den obend bald wider auff dē stal/so ruhen sie an einē stock vnd legen sich/vnd den

H ij      morgen bald

## Ein gespräch welcher massen ein

bald wider auff/so thünd sie die gröste arbeit in der  
füllunge/doch so soll es auff die summen der wegen  
gestalt werden/vnd angesehen was sie der ein tag wol  
thün können das soll in ein prob geben/darnach die  
tag ab vnd zunemen vnd mit fleiß darauß gesehen/  
daß die knecht die pferde nit mit der last iagen/son-  
der fein gemacht am züg gehn lassen so mögē sie har-  
ren vnd darauß gesehen daß der wol gewarth werdē

¶ Zum zwölfften so es ein rechter hauptbawe sein  
soll/ist von nöten das züvor ein gantzem winter zü-  
gestelt werd mit vorroht/besonder mit steynen es sei  
mit raw oder gehawen steynen/was von gehawen  
steyn ist/auch kalcksteyn zübrechen verdingt werdē/  
desgleichen das holtz darzū zühawen/dan alle tag-  
löhne souil möglichen ist sollen den winter abgestelt  
werden/dan die tag sein kurz vnd ist nit darinnen  
außzurichten/vnd den winter auch nit mehr geschir  
zühaltē dan sein will/das obgemelt bei die handt  
züschaffen/vnd es sollen solche geschir fleißig ange-  
halten werden wie hienor dauon angezeygt ist/vnd  
volgens weither geschehen wirt.

¶ Zum dritzehenden/so soll auch denn winter zü  
dem grundt geraumbt werdē/domit so es kompt auf  
den frülینگ vnd zü den wetter tagen/das mā mag  
so bald zü dem grundten thün/vnd anfahen zü ma-  
uern ob es schon noch ein wenig frewt leigt nit an  
grundten/doch das nit mehr speiß oder mörtel an-  
gemacht werde/dan auff den tag gehört/Dem mör-  
tell ist es nit güte daß er befreust ehe dann er inn die  
mauern kompt/vnd es ist güte so man es geschickenn  
kan/daß alles werde mit dem grundt für gefaren/  
dieweil

## vester bawe furzunemen sey.

dieweil es noch frewert. Ich acht es vnnnd halt es für güc daß mit dem mawerwerck werd zeitlich angefangen/ vnd ob es gleich frewert so hat es doch wider den forgē sommer für/ im/ vnd wirt zeitlich vor dem frost angefürte/ besonder was inder höhe ist vnd dünne mawern seind / daß man aber wol thün kan / so man einen schönen druckē somer hot/ vnd wasserichten grundten zuthün hett/ vnd der herbst drucken vñ güc wer daß man alsdan ließ die mawern in der höhe bleiben/ vñ sich wider in die gründe mächt/ der erden oder wasser gleich/ vnd deckt die dan mit erden zū/ den schadet im winther keyn frost vnd weer gegē dem sommer ein grosser vortheyl.

¶ Zum viertzehenden/ es will überschlagen sein / so wirt den sommer vil mawern anstellen vnd des vorraths nit gnüg dē sommer gefürht oder bei die hāde geschafft wie gemeynlich das geschicht/ vnd auch nit wol anders sein mag / das von nöten sein will mehr ge;ert zūhaben/ damit die arbeyter an der arbeyt erhalten/ daß die selben auch geordnet werden / vnd so die nün also geordnet werden/ daß auch die selbē mit steynen vnd anders was sie fürhen sollen nit geseüpe seihenn/ als durch steynbrecher oder kalckbrenner/ vnd deßgleichen/ also will das alles eins auff's ander geordnet sein/ daß keins auff das ander seihenn muß/ sonder das also für das andes fürdert vnd im gang bleib/ dan wann eins fehlet so fehlet es durch auß.

¶ Zum fünffzehenden/ so mann schüdtenn machte die in mawern gefast seind ist güc daß die mawer ein iar zūuort haben/ oder ein sommer / dann so mann  
maw

## Eyn gesprech welcher massen eyn

mawer vnd schüdt zü gleich an ein ort arbeyt / hinder gemeyniglich einer den andern / darumb ist güc die mawer alles für den schüdten weck arbeyten / so bleibt ein jedes in seiner ordnung. Es kompt aber wol daß mā es nit also sondern kan / sonder das mit einander gehn muß / das muß man thun wie es sein will / So man es aber also geschicken kan ist fürderlich vnd güc / man mag auch wol dē winther verdingen züschütten / doch also daß man feyn hiept zwischen die mawern züschütten schüdt / schadt nit so es trocken ist / so es aber regent vnd es naß ist / ist nitte güc hinder der mawern / dan naß erden ist der mawern nit güc / Darumb so truckener erden hinder die mawern vnd wol gedempt so besser / vnd ist darumb güc wolgedempt hinder der mawern / dan so man eilend hinder die mawern schüt vnd lück auff einander vnd wirt dan hoch darauff geschütt / ist züdencken daß die oberlast drucken / daß es sich hinder die mawern mit einem buck setzt das scheubt die mawern / so es aber erst hinder die mawer gedempt wirt / so bleibt es liegen vnd setzt sich nit / so es dan sich nit setzt / so scheubt sich es auch nit dā es ist selber hart / vnd bleibt von im selbst stehn / Darumb soll es also hinder die mawern in der erst gedempt werdenn / so hoch die mawern seind / ehe dā die recht last darauff kompt / dan grunde vnd newe mawern leiden nicht das alt mawern leident.

¶ Züm sechtzehenden / es sollen eygenn männer zü mawern geordnet sein / die steyn auff die mawern tragen / die sollen güc starck syln haben die inn über die achseln creutzweiß gehn / darein sie die tragbern mit den bawmen thun vnd doch auch in den henden behalten

## vester bawe furzunemen sey

behalten/dan es ist zu vilen dingen gut. Als erstlich/sie mögen vast schwer tragen mit den achseln vnd mit den henden. Zum andern so ist es inen auch sicherer vnd verwarlicher dann so einem ein handt auff geht so sie ein schwer last tragen/ so mögē sie es nit erhalten/als wā es noch in syle hieng/vnd so fallen lest/so müssen die andern auch fallen lassenn / Vnd also thut einer dem andern schaden / das nit geschehen kan so sie in den sylvn tragen/ es sollē auch nit alle tags andere zu solchem tragenn genommen werden/dann so ein ander darinn kommen/sein sie vngeschickt vnd vngewone/darumb so sollen sie darin bleiben/die darin zum ersten geordnet seind / die bleiben in dē gerick/vnd seind fürderlicher/ dan daß man alle tag andere lernen muß/ es gebürt auch disen ein eigener lone/ mehr dan den gemeinen arbeitern.

**S**ie sollen auch zweyerley tragbern haben / eynr theyl die starck vnd langk seind/daß irer sechs darinnen tragen mögen / vnd sollen die bawm von krummen holtz gemacht sein / also wan die bern auff der erden stehn daß die bawm auff beyden endē über sich stehn/so dürffen sie sich nit so seher bucken vnd die sylvn darunder brengen/dann es ist gut zudencken/so sich einer muß gätz nider bucken / daß in das haben schwerer an kompt/dan wan er sich nit so seher bucken darff. Es sollen auch solche tragbern fornen mit kerben vnd köpffen gemacht sein/daß die sylvn nit abschlüpffen / Auch sollen die selbigen tragbern ring haben an den bawmen gleich do die spangen in die bawmen gezeypft seind/ daß man mag an iedem ort ein spangen durch schliessenn über zwerch über die

**D**

bern/

## Eyn gesprech welcher massen eyn

bern/das man mög den daran helffen tragē/so groß steyn seind die zweyen oder vier zūschwer seind.

¶ Die ander tragbern sollen nit groß sein das nür zwen dar an tragen zū kleynen steynen vnd seer fürderlich/das die bawm daran krum seind zūm auffhebē ist alles fürderlich vnd kompt die arbeyter gering an. Darumb ist alles zūsuchē/das die leut verwart vnd gering ankumpt geht es alles destobas.

¶ Man soll auch machen schleiffen zū den grossen steynen bei die arbeyt zū den grundten do man nit mit dem wagen hinkomen kan.

¶ Man hot auch an etlichen orten diēst bei den vnderthanē/die mā auch zūm baw braucht bedünckt mich das die selbigen solten also zūbrauchen seinn / als nemlich zūm ersten die wägen vnd karn. Ich wil achten das man Dorff habe darinnen zehen wagen zūnemen seind zū dienen/die bescheyd mā alle auff eyn tag das sie sollen kōmen vnd zūm bawe fahren als steyn. Nun haben die selbigē leut eyn meil oder was das ist bis auff den baw / vnd so sie gleich denn morgen frū auff seind/so kōmen sie kaum zū neun vren/ vnd so sie kōnnen/ haben sie nit gute pferde/ auch böse geschirr vnd laden auch nit vil / thun eyn farht oder zwo/so gut sie seind/vnd können nit lang fahren/sollen sie anders wider heym/ Auch so halten sie da über eynem hauffen/vnd müß eynen auff denn andern warten/bis er geladen wirt / damit so geht der tag hin vnd ist nit vill mitt inen außgericht/vnd nit destoweniger/ so geht dem armen man  
der

## vester bawe furzünemen sey

der tag vnnnd die arbeyt darauff / vnd verseumbt sein  
arbeit gleich so wol als hett er vil außgericht. Mich  
bedeucht es solt auff dise meynung mit inen zū han-  
deln sein / als solten sie für ire zehen wägen ein wa-  
gen zehen tag da halten / der nit von dann komme  
biß die zehen tag vmb weren vnnnd vier güter pferde  
vnder inen außgelesen würden / die do blicbenn die  
müsten sie / des die pferde sein vergleichen / Vnnnd es  
soll auff solche vier pferde inen fūther vnd hewe not  
turfft gegeben werden / so künden die selbigenn wä-  
gen mit andern frühe vnd spat an der arbeyt sein  
vnd auch wol laden vnd etwas außrichten / das fü-  
ther das sie essen wol wider einkompt / vnd verseumt  
ten die armē leuth ire arbeyt doheym auch nit. Vnd  
so zehen tag vmb seind / sollen zūuorn einn ander  
Dorff bestelt sein / daß den obent do sei / so diser den  
wagen wege furt der soll auch so lang dableiben als  
sein wagen zal ist / also für vnd für / biß daß es vmb  
ist / vnd nit zūvil wägen auff ein mol dan es hindert  
alles einer den andern mit dem laden / vnd geht der  
kost doch darauff.

**D**esgleichen die andern die nit wägē haben / vnd  
müssen mit dem leib dienenn / bedeucht mich auch  
güt sein mit inen zūhandlen / daß sie gelt geben het-  
ten für ire dienst / so hett man taglōner für sie gehal-  
ten / der ist einer durch auß zū recht so güt als dret  
dienstmann / die kan man anhalten vnnnd ernstlich  
mit inen schaffen / dā so einer alle tag frembde leut  
hot / geht vil zeit vergeblich hin ehe dā einer die kan  
anstellen / vnd der arbeyt vnderrichten / wann sie es  
gleich gern thun. Darumb ist güt zūdencken wie es  
einem geht / mit den die vngeschickt seind / vnnnd die

## Eyn gesprech welcher massen eyn

es darzü nit gern thun / die mehr hindern dann sie schaffen / verderbē die andern auch / Darumb seind die dienst nit alle zeit so gut als mā meynet / besonder zū aller arbeit / Es kompt aber vnderweilē / daß ein arbeit zuthun ist / die nit guter leut bedarff / als raumen / steyn laden vnd dergleichē / darzü seind die zugebrauchen die nit gelt geben wollen für die diēst

¶ Es ist auch gut daß kleyne büben seind bei denn mewren die mültzerlein habē / damit sie kleyne steyn tragen auff die mawern zū stopffenn / das gibt gute mawern vnd spart vil zeugs / Darumb ist hoch von nöten den mewrern dar auff zusehē / daß sie fleissig stopffsteyn brauchē / vnd den oben so die mewrer abgehn / daß sie dan die zübe voll wassers thun / vnd die speiß die noch darinnen ist / zūsamē rüren zū eynem gūß vñ gießen es auff die mawern das leyfft die löcher hinein vnd theylet die speiß in löchern / das macht veste mawern.

¶ Wan soll auch eygen karn halten / die nichts thun dan daß sie stopffstein zufüren / darnach vil mewrer seind / darnach soll man inen gefärcht halten / dann man soll es nit mit stopffsteyn felen lassen.

¶ So man schüde in mawern fassen will / so sollen dieselbigen mawern ein wenig zū streb stehn als in zehen schüden hoch ein eingang / darzü sollen richte scheider gemacht sein / do ein blei anhengt vnd zeychen daran gemacht / darnach ein mawer seer ligen soll / and dem meyster dar auff gesehen werd / daß sie in der moß bleiben / damit die mawer nit an einem ort steiffer oder mehr leig dan an dem andern.

Es

## vester bawe furzunemen sey

¶ Es sollen die werckmeyster gut acht habenn auff die mawern/dohinder geschüdt soll werden / daß sie ire rechte sterck halten vnd darnach gut steyn sein/ die geben gute veste mawern / darnach müßenn die mauhern angelegt werdē / vnd darnach die mawern vnd schüdt hoch werden sollen/ wo daß man habenn mag gut groß breyt steyn vnd legerhafftig / die einander wol begreiffen/ vnd sich übereināder verwerren die geben gut mawern / die dörfen auch nit so sterck oder dick sein als die andern die von kleyner steyn gemacht seind/ vnd von küglichen steyn. Auch brechen sich eulich steyn/ vnd besonder wo sandstein seind/ die seind hernach gefiert vnd stückweiß wie quadern/ die seind böß zu mawern/ dan die steyn leigen mit den fügen eben widereinander auff allen seiten/ vnd verbinden sich nit/ darumb so tragen sie nit vnd scheiden sich.

¶ So einer des winthers nit gern vil pferdt oder geschirre haben will/ vnd vermeint gegen dem sommer zu den langen tagen destomehr zühaltenn/ laß ich mir nit übel gefallē/ doch daß den winther steyn gebrochen werden/ ein vorrath / dan so man vil wägen hat den sommer/ so wöllenn auch vill steynbrecher do stehn/ so seind die grüben nit alle dartzu geschickt/ daß der stein also fürderlich sich brech / auch zu souil leuten nit raum haben darin zustehn auch nit gelegenn souil wägen darein zufüren/ auch die stein nit darein leigen künden/ damit die wägen so man der vil haben wirt nit fürderlich verliegen kündt/ Alßdan so wer es kein vortheil/ sonder man wer geseumbt vnd gieng der kosten darauß. Das deucht mich wer aber zuthun / daß man den win-

J ij ther

## Eyn gesprech welcher massen eyn

ther hett für vnd für gebrochen an steynen/ vnd hett vier pferdt auff der grüben behalten/ die hetten abgeraumbt auff der kautten vnd die steynn hinweg gefürht auff ein gelegen platz/ do die wägen möchten bei vnd drumb farhen vnd laden/ darzü sollen besonder wägen gemacht werden/ die haben vier klein redlein der eins über haupt nür zweyer schüch hoch ist/ vnd der wagen soll kurtz sein mit wein beumlein die nit zü starck seind/ dann die haben nit lang zü tragen/ vnd vngewerlich einer span hoch von der erdenn/ Alber über ietz gemelten beumlein/ sollen auch klein beumlein sein mit spangen züsammenn gemacht/ die die steyn halten/ daß sie nit herab fallen/ vnd soll nit mehr darauß geladen werden / dan als vil als auff einen gehört/ Darumb soll der wagen nit langk sein noch hoch/ dan es gehören nit mehr dā zwey pferdt darinn züspannen / vnd der wagen soll haben ein span/ daß die pferdt für eynander gien gen/ solche wagen kan man wenden vnd gebrauchen in den grüben gleich wie ein schleiffen dan es redlin hat.

**E**s sollen auch dise pferde zü mittag auff der grüben bleiben vnd ire fütcher daselbst essen vnd so bald sie gessen/ wider einspannen / dan der tag ist kurtz/ vnd die nacht langk/ wie oben dauon gemelt / vnd so die pferd den obent heym gehn werden/ daß sie dann ein rechten wagen mit steyn heym bei den baw fūxhen/ vnd den morgen so sie wider auff die grüben farhen/ so sollen sie ire wägen mit nemen vnd also so sollen solche pferde wie angezeigt thun/ was auff der grüben zuthun ist damit ein vorrach zü wegen bracht werd/ alßdan so mögen/ gegen den wetter oder langen tagen/ vil wägen angestellt werden. Vnd

so

## vester bawe furzunemen sey

so es im winther schneit/ regent/ oder ist wetter daß die steynbrecher nit brechen nach schaffen mögenn/ alßdan sollen die pferd steyn hinweg fürhē/ vnd besonder was von grossen steynen ist / Wan mag auch im winther so steyn im vorrath seind/ die dienstwägen die hinein fürhen lassen/ Auch möcht man mit den Dorffern die solchē dienst thun ein geding machen/ vnd inen darnach ein jedes wer ein somm wägen zufürhn auffsetzen vnd so sie die gethan/ so wolt man sie zu friden lassen/ den somer werden sie sich selbst schicken vnd treiben/ damit sie ire zal gethün möchten vnd so sie das thun werden/ daß man mitt inen anschneid vnd sehe daß sie wol laden/ Vnd so man Dorff hot/ die weit gelegen seind / die diest nit mögen erreychen/ denen mag man/ die bestelte wägen den zu halten zu ordnē wie hievor das angezeyt ist/ Doch so ist nit dauon zureden oder zuordnen / es sei dan daß einer weyß die gelegenheyt aller/ Darumb so will nach gelegenheit darzu geschickt sein/ vnd dasselbig alles mit fleiß besehen/ deßhalb ist dieser vnderricht nit mehr dan ein anzeygung warnach der bawen wil sich erfarn soll.

¶ So du nun weyßt vnd hast überschlagenn was vngewerlich auff ein rüden mawern gehört zubrechen vnd mit allem so käftu dich ein ander iar darnach richten/ vnd die mawern die du machen wilt/ vnd überschlagen was sie beileufftig tragen will / darnach zu rechnen mit dem beudell/ was du ein iar zuerbawenn leidenn magst / darnach so nim vill oder wenig für / vnd ordnen dasselbig mitte wall/ dan es ist keyner nümmer mehr so wol eins bawens anzurichten vnd anzustellen vnderricht / als wan  
er

## Eyn gesprech welcher massen eyn

ein iar gebawet hat/ vnd das mit solcher aufzeygū-  
gen wie hie oben daruon geredt ist geschehen/ vnd ich  
halte rüdes langk vnd rütē hoch vnd ein schüch dick  
für ein rütē/ ist es ober seer dick so hat es desto meh-  
r rüten/ das bedunckt mich die schlechste vnd gewisse  
rechnung sein/ die ich weyß.

¶ Wan du pfeiler an ein mawern machen die fürn  
streichlöchern steht/ so sollen pfeiler außwendig ste-  
hen fürn löchern/ dann sie hindern ann schiessen/  
Darumb so sollen sie inwendig stehn/ do cragen sie  
gleich so woll so sie anders recht gemacht seind/ als  
außwendig.

¶ Wan soll auch ein geschickten bawmeister haben  
die fleissig bei der arbeit sei vnd verstendig mit dem  
anstellen/ vnd ernst mit den arbeytern sei/ wan daß  
es nott ist vnd sie gewehnen/ daß sie in fürchtenn/  
Doch so will nit vnnott mit den leuthen gebollert  
oder gezürnet sein/ dann vmmex zürnen/ vnmüet  
macht vnwillig leuch vnd arbeytē nichts desto meh-  
darumb so soll zū seiner zeit ernstlich vnd gülich  
mit inen gehandelt sein/ vnd so sie recht haben/ soll  
man gantz gülich mit inen reden vnd handeln/  
Vnd so inen etwas mangelt/ soll einn bawmeyster  
inen fleissig helffen vnd rachen/ vnd hart bei inen  
halten/ so gewinnen sie inen lieb/ vnd seind im  
wol gehorsam/ auß lieb vnd auß forcht/ darnach soll  
sich ein bawmeyster halten/ güc vnd ernst sein nach  
gelegenheyt.

¶ Der bawmeyster soll haben ein bawschreiber der  
auff in warth/ rechnen vnd messen wol künd/ vnd  
auch fleissig bei den baw sein.

Darzu

vester bawe furzunemen sey.

¶ Darzū noch ein bawern knecht der bei den wägen sei vnd sehe das geschir vnd die wägen farhen / vnd sich halten / wie er das vom bawmeyster bescheyden wirt / auch allen gezeug auff hebe was zū dē geschirn gehört / vnd was daran zubricht / daß er im daß loß anzeygen vnd lieffern / das laß wider machen / vnd mit den handtwerckfleuten das anschneiden / vnd dem schreiber alle wochen bringe / daß er das in sein rechnung mach / Auch so soll er alles was vor gezeug auff den baw gehörig das dem herrn zūmachen gehört / dargeben bestellen zūmachen vnd wider auff heben vnd dem bawschreiber verrechen / daß alle wochen mit allen arbeytern werd abgerechnet vnd bezalt / vnd alle wochen die rechnung beschliessen / hin gelegt vnd wider ein ander gemacht auff die wochen vnd nit zwo oder drei in ein gerechent.

¶ Vnd bedunckt mich vast förderlich vnd güte sein / daß ein bawmeyster sich deß befließ vnd die sein / als bawschreiber vnd knecht dahin hielt / daß fleißig dar auff gesehen werd / vnd den abent gefrage was bei aller arbeyt den morgen sein müst / das nit do were / daß er das so gleich den abent verordent vnd verschaff so vil möglich / daß den morgen nit dar auff gewarth würd / dan es dregt sich vast vil zū / daß mann als vor dracht vnd alle ding vor bei die handt schaffe / wan mann das haben soll / daß es da sei / vnd nit daß die / die darmit arbeyten sollen / darnach dörfen fragen vnd müßig stehn / biß mann das aller erst bestell / dann als mit dem vorrath über trieben das geht von stadt.

¶ Es soll auch ein bawmeyster sein volck dahin halten / vnd

R

ten / vnd

## Eyn gesprech welcher massen eyn

vnd er damit/das alle ding in der zeit/wie oft dar-  
von gemelt/bestelt/vnd nach dem nach gelegenheyt  
geordent werd/desgleichen soll der bawmeyster allē  
abent bei sich fordern vnd an inen hōrē was er allen  
morgen mit den geschirn thun will/vnd warzū er  
ein iedes verordent hab/hat er die geordent nach sei-  
nem gefallen so laß er in bleiben/hat er aber dann  
etwas auff den baw gesehen/darzū er die geschir alle  
oder zūm theyl bedörffen ist/so sag er im daß er es or-  
den nach notturfft wie er weyß/dan es von nöten dē  
morgen sein will/Also für morgē darmit den sey wa-  
gen dorffen vnd souil desgleichen mit den karn/wie  
das die vrsach erfordert vnd haben will/Also thū er  
al sein dienern die vnder im seind/so gewehnt er sie  
daß sie fleissig auff ein ding acht haben/vnd auch dē  
vortheyl vnd geschicklichkeit nach dencken/dieweill  
sie sehen daß ir meyster alle mal ir ordnung wissen  
will/das treibt sie vñ macht sie geschickt/also thūnt  
sie dan fürthan den andern die vnder im seind/also  
treibt als eins das ander vnd geht für.

**¶** Darumb sag ich daß ein herrn der ein grossen  
baw machen will/vil an einem guten bawmeystere  
gelegen ist/vnd was er dem gibt/das ist behaltenn/  
vnd kombt mir dan zweyfach wider/vnd wirt auch  
alle ding förderlich vnd güt zū dē vnkosten gemacht.

**¶** Ist aber ein herr der den baw selbst versehen wil/  
vnd darbei sein kan ist so vill dest besser vñd es geht  
in warheyt in beisein eins herrn ernstlicher vñd  
gehorsamlicher zū/dann wann ein herr nit darbei  
ist/darbei ist aber auch zūdencken daß ein herr be-  
sonder ein grosser herr nitt allezeit bei seinem baw  
sein

## vester bawwe furzunemen sey.

sein kan auß andern seinen geschefften/ Darumb so ist in doch ein Bawmeyster von nöten/ so helt ein herr sein bawmeister doch bei sein arbeitern gewaltig ob er schon vnderweilē mit etwas fehlet/ vnd das selbig nit auß vndrewen oder sein vortheyl / sonder auß güter meynung im besten geschehē/ daß alßdan ein herr im nit vor den arbeytern vngenediglichenn an ließ noch strafft/ sonder das zwischen inē beiden geschehe/ vnnnd in bei den arbeytern im beuelch gebe was weiter des herrn meynung wer/ vnd in bei den arbeytern in des herrn bei sein auch mit inen schaffen vnd gewalten ließ / vnnnd was die arbeiter klage oder mangel hetten dardurch sie den herrn selbst ersüchtē/ daß der herr alßdan dasselbig ferner ließ mit inen durch den bawmeister hädeln / so sehen sie daß der herr den bawmeister wolt geworden lassen vnnnd handt haben/ so achten sie den für einen bawmeister vñ seind im gehorsam/ wo das aber die arbeiter merken daß sie an ein herrn als ein enderung herlangen/ so achten sie auff kein bawmeister vnd werden die bawmeister vnwillig / So sie aber zum herrn kommen in abwesen eines bawmeysters vnd begern etwas/ vnd ein herr sagt/ ich will mit dem bawmeister darvon reden/ vnd sein meynüg darauff hören/ bei dem solt ir bescheid findē / vnd läst in durch den bawmeister bescheidt gebenn/ so bleiben sie offc auß/ daß sie sunst vmbher lauffen vnd ansüchten / vnd so weyß auch ein bawmeister eines herrn beuelch/ dann die arbeiter strecken alwegen ein beuelch der in abwesens eines bawmeysters geschicht/ weiter zu irem vortheil dann er geschehen ist / Darumb will mit dem volck mit vortheil vnnnd vorsichtigkeit vmbgangen sein / besonder mit wall knechten.

## Eyn gesprech welcher massen eyn

Dises ist eyn kurtzer außzug vnd vberschlag  
eynen Bawe antzustellen vnd in eym Regimētē  
vnd Ordnung zūbringen/ mit denen/ die  
darauß mit aller arbeit sein  
werden.

**I**tem vor das erst / So soll einn bawe mit rath  
der verstendigē/ wie der gemacht sein soll/ vber  
schlagen/ geordnet/ vnd in visirung gestalt werden.

**I**tem so daß dann also inn ein gerechte visirung  
gerissen oder geschnittē ist/ So soll man vor das erst  
vberschlagen/ wie vil rüde mawern ein iede wehre/  
pforten/ oder was das vor ein ort oder stück ist / daß  
das mawrwerck an sich hat/ das sol gemessen vnd zū  
ruden zal gemacht werden.

**I**tem darnach/ so soll der rechnūg nach/ vberschla  
gen werden/ was das mawrwerck mit allem kosten  
wirt. Wie das getheilt vnd gerechnet werden soll/  
wirt hernach inn einem eygen Capittel mit vnder  
scheidungt angetzeigt werden.

**I**tem so dan daß also vberschlagenn ist/ So muß  
der Herr sagen/ ich wil dises iar nit mehr gelts ver  
bawen dan dise summa  $\text{N. gulden}$ / So soll man al  
les das rechnen/ messen/ vnd vberschlagen / was vor  
onkosten darauß gehn will/ vnd darnach so soll man  
der stück vil oder wenig vornemen zūmachen / dar  
nach sie groß oder kleyn seindt / daß ist ongenueulich  
die summa des gelts des sich der herr begeben hat/ er  
tragen möge/ es sei von mawrwerck oder erden/ wie  
sich das zūtragen will.

Oberschlag

vestet bawe furzunemen sey.

## Uberschlag des mawwercks.

¶ Item vor das erst/so soll vberschlagen werdē was von mawwerck sein wirt/vnd das sol also gerechnet werden/wie volgt.

¶ Item ein rüden mawern gerechnet/die soll einer rüden lang/einer rüden breit/eins schüchs/oder einer halben eln dick sein/Es sei die maw gleich hoch/nider/oder kurtz/wie das kompt/so soll es zusammen geschlagen werden/das sie sich vierdt/zü einer rüden ein gantz viertheil/oder halb viertheil/wie das kompt/Vnd so man dan also ein rüdē hat zusamen geschlagen/als oft dan dieselbig maw eins schüchs dick ist/so offte hat man ein rüdē mawern in 2zale.

¶ Item so man nün wissen wil wienil steyn vff ein rüden mawern gehen/so soll er lassen etlich wagern vol steyn fürhen bei einander/vnnd soll die doch nite lassen auff einen hauffen fürhen/sonder einen ieder wagen besonder legen/vnnd soll lassen machen einn stuck mawern/von einer halben rüden groß/vnd all wegen die steyn vonn einen hauffen nemen lassenn/vnd so ein hauff vermaort werth/alsdan von einen andern/So sicht mā was vermaort wirt/vnd was noch da bleibt/das zaichnet mann auff/vnd macht die gantz rechnung darnach/wie vil stein man haben muß auff hundert rüden mawern/was dan die rüden zal von mawwerck ist/darnach ordnet mann die fürh/vnd auff summa der wagen.

¶ Item so man dan also die summa der mawern hat vnd die summa der wagen zale dartzü/so muß

R ij man

## Eyn gesprech welcher massen eyn

man rechnen nach gelegenheyt des steynbruchs/ darnach die ferre/ oder darnach es gelegenn ist/ wie vill fñh: einer einem tag thun möge im sommer in den langen tagen/ vnd des winthers in den kurtzen / darnach muß er vil oder wenig wagen ordnenn/ die die summa der steyn vollig erfñren mögen/ vnd nit alleyn die steyn/ sondern auch den kalck vnd sandt dartzñ gehñrig/ wievil des auch sein muß/ kan mā auch probiren in dem stñck maurn da man die steyn probiert hat.

**¶** Nunne were wol zusagen/ man solte den winter kein wagen halten/ dan die tage weren kurtz kñnten nichts außgerichten/ wolten den sommer desten meh: halten/ Es ist war/ es hat aber disen mägell/ so man den sommer wolt ein groß stñck machen / vnd vill maurn anstellen/ ob die wagen kñndtenn gnñgsam zñfñren/ Siweil kein vorrach an steynen bei die arbeyt gefñrt were werden im winter/ dann ich weyß wie es zñgeht wan man der wagen auff ein mal zñ vil hat/ so kan man sie im steynbruch nit all wol fñrderlich geladen/ sondern muß da halten/ vnd einer auff den andern warten/ desgleichen auff die arbeyt im abladen/ dan so irer zñvil ist/ kñnnen sie nit bei die arbeyt einer vor den andern gefahren / sonder einer wirfft hie ab der ander da / also ligen die steynn weit von der arbeyt/ so muß mā dan dieselben weit holen/ da gehñren dan doppel leuch zñ / so stehnn die meurer vnd rñffen/ steyn hero/ so seindt die wagen nit da/ also geht doch der kost vnd verlorn zeit darauff. Dan in warheyt/ wan mā vorrach hat/ so gehet es von stat/ vnd werden die arbeyter getriben/ dann da sie sunst muessen fordern / das ligt inen doppel

## vester bawe furzünemen sey.

vor der handt das treibt vnd fürdert/dan man süchē allein vortheil daß nur die schwereste taghlöner nit muessig stehē/vnd were besser daß man dester mehꝛ taglöner vom gering taglohn hielte die die schwere taglöner mit der handtreyhung nit muessig stehn liessen.

¶ Item man soll im winter die steyn so an den baw gehören vnd gehawen sein sollen/hawen/ als schießlöcher/thürn/ ort/fenster/was dessen ist/daß mann will vnd müß gehawen haben / daß es den sommer am mawm nicht verhindere / dises ist allein vonn berck oder brechsteinen vberschlagen / Aber mit den gebacken steinen hat es ein kurtze rechnung.

¶ Item so ein gebacken stein eins schüchs lang ist vnd eins halben breyt / oder zwen so breit als einerr lang ist/vnd vier so dick als auch einerr lāg ist / daß ist die recht maß/so geend derselben 1024. auff einn rüden lang vnd breyt vnd schüchs dick / wiewil die kalck gebrauchen/müß man mit einer rüdē mawm versuchen/was die kosten zübrēnen oder zü kauffen/ das rechnet man dem tausent nach/deßgleichenn die fūhꝛ/ darnach die weit zuholen seindt.

¶ Item disen vorrath zübestellen vnd außzurichtē gebürt dem rechten bawmeyster/dartzü sol er haben einen steynmetzen als den werckman/ derselbig soll auch einen knecht haben der ime dartzü hilffe mitte züsehen auff die taglöner/die zübestellenn/an der arbeyt darauff züsehen/vnd zü ordnē wo die von nöten vnd was auff die arbeyt felet züuerschaffen/vnd züsehen daß die arbeyter zü irer gebürender stunde  
ab

## Eyn gesprech welcher massen eyn

ab/vnd angehen/vnd allen tag ausschneiden wie vill er meurer hat/ desgleichen von allen personē die zu irer arbeit gehören die ime züuersehen gepürt / vnd dasselbig soll er allen tag inn ein register oder tafell zeichnen/ wie die hernach mit der wochen vnd tagen vertzaichent ist/ vnd dasselbig alle wochen dem baw= schreiber oberliffern/ damit er allen samstage die ar beyter darauff abbezale vnnnd seine rechnung darnach mache vnd alle wochen ein mal schliesse/ Also machen sie die rechnung fein ordentlich vnder der hande selbst.

¶ Item wan einer hat zwentzig meurer die bedürff fen fünff speißmacher vnd fünff speißtrager / vnnnd zehen steintrager/ so es anderst etwas weit vnd hoch/ daß wil nün nach gelegenheit geordnet sein/ dan die speißmacher bedurffen einen vorigen wasser zütra= ger vnd dergleichen.

¶ Item so man hat zwanzig meurer/ deren einenn gebürt ein tag vier schilling / mache denn tag lxx. schilling/ daß seindt drei gulde viij. schilling Fräck furter wehrung / ie vier vnd zwentzig schilling vor einen gulden gerechnet/ daß tregt die wochen zwen= tzig gulden/ vnnnd den monat lxx. flor. obgemelter werung/ oder zu xxvij. albus.

¶ Also rechnet man auch alle taglöner/ erstlich den tag/ die wochen/ den monat / vnd volgēts die summa des gantzen iars.

¶ Desgleichen die steinbrecher auch.

¶ Item die wagen die man zum bawe bedarff/ der= einen angeschlagen das gantz iar mit iij. pferd vnd zweien knechten/ an ein hundert gulden / sonder die pferde schaden.

Maurex

vester bawe furzunemen sey

S Meurer/ Speißtrager/ Speißmach. Steintrag. Gemein taglō.  
 Sontag/ anfang der wochen darinn man den baw anfahet.

II	XX	v	v	X	///
III	XX	v	v	X	//
IIII	XXI	v	v	X	//
V	XXI	v	v	X	
VI	XXII	v	v	X	////
VII	XXII	v	v	X	///

Einē meurer ein tag. ij. torne obere iij. schilling chue i. schilling xvij. S

Ein speißtrager/ einen torne.

Ein speißmacher ein torne.

Ein stein trager/ einen torne.

Einem taglōner/ ein torne / Das seine xvij. pfen.

# Eyn gesprech welcher massen eyn

## Ordnung der Halknecht vnd Heinster.

Item es muß der Herr habē einen Halmeyster/  
der dem herrn gelobt vnd vnnnd geschworn sei vber  
dise folgende stück.

Item vor das erst/ daß er seinem herrn wol trew-  
lich dienen vnd die arbeyt mit allē seinem vermögē  
zü dem besten versehen vnd versorgē so ime möglich.

Item zü dem zweyten/ daß er mit keyner rotten  
wöll in geding sein.

Item züm dritten/ daß er wöll keyn meßgelt von  
keyner rotten nemen.

Item züm vierdten/ daß er wöll keyn meuterei  
vnder den knechten/ noch auff den gantzen bau ma-  
chen/ noch souil ime möglich leiden.

Item züm funffsten/ daß er keyner rotten keyn  
stück vor dem andern verdingen vmb haß oder ge-  
schenck/sonder frei stehn lassen/ es geschehe dan auß  
billichen vrsachen.

Item züm sechsten/ er soll auch fleissig vnd trew-  
lich außmessen/sonder einigs theils vortheyl / es sei  
gleich herr oder knecht.

Item züm sibenden / soll er allen tag mit einer  
rieden rotten anschneiden wievil knecht er allen tag  
inn der arbeyt hatt/ vnnnd dieselbige kerbenn soll er  
allen

## vester bawe furzunemen sey

soll er allen samstag/dem bawschreiber liffen/ daß er wisse den samstag einer ieden rotten darauß zugeben vnd sie die knecht erhalten/biß ein stück gar außgemacht vnd gemessen wirt vnd vleißig verhueten daß er keynen knecht mehr anschneide/dan er hat.

### Gedinge .

**D**em die erden soll nach gelegenheyt die fern oder hoch zufüren/inn die rüden zal verdinget werden/ dan es ist dem keyn maß zugeben / wie vill rüden vor einen gulden/dann man muß das nach gelegenheyt machen daß es die knecht können zu kommen/vnd der herr auch.

**I**tem so die erden nun also verdingt ist/vnd man der rüden zal eins worden/ so soll einer ieden rotten ein stück verdingt werden/ nach antzal er knecht hat vil oder wenig/doch kein stück zu groß/vñ alweg soll man ein stück verdingē vndē vnd oben gleich in ein verdinge/ daß also ein rüden vnden vnd oben/ so vil vnd so wenig kost wie die ander.

**I**tem so ein stück dan also verdinget ist/ so sol mā dem rottmeyster nit mehr auff die arbeyt geben/dan die wochen ein halben gulden auff einen knecht/damit er die knecht erhalten möge / das befindet man dan inn der kerben/da man allenn tag mit ime die personen angeschnitten hat/so aber sein stück gar zu grunde außgemacht ist/alßdan so sol mit ime außgemessen/vnd gar abbetzlet werden.

**I**tem die erden die soll inen im gedinge angetzigt  
L ij werden

Eyn gesprech welcher massen eyn  
werden/wohin sie die führen sollen/vnd nach geheß  
des walmeysters alles vnder der handt / wo ers be-  
durffen ist/sonder weigerung hinführen.

### Regiment der Knecht.

Item die knecht sollen gehorsam sein allen denen  
die der herr auff dē baw ordnet/ vnd beuelch vber sie  
gibt.

Item vor das erst/dem Bawmeyster.

Item dem bawschreiber.

Item vor das ander/den wallmeystern.

Item zum dritten/den knechten die der bawmey-  
ster inen nebē den andern darstellt/vnd besonder mit  
des herrn dienern die auff den baw geordnet seindt.

Item die knecht sollen frid vnder einander haltē/  
bei straff wie volgt.

Item so die knecht sich werdenn vnder einander  
schlagen/vnd sich zutrugen wurde daß einer möcht  
todschlag/blutige wunden bekommen/ daß soll dem  
herrn zu seinem willen zustraffen stehen.

Item werden sie sich schelten/daß einem sein ehz  
betreffe/vnd der sich wolt veranthurten / das soll  
auch vor des herrn beuelhabern geschehen.

item

## vester bawe furzunemen sey

¶ Item wurden sie stelen/ vnd was den halß belanget verwircken/ steht alles dem herrn zurichten zu.

¶ Item wurden sie sich aber vnder einander mit feusten schlagen vnd reyffen/ das sol den knechtenn vnder inen selbst zustraffen stehn.

¶ Item wurden sie sich mit einander schelten / fluchen vnd dergleichen gegen einader halten/ soll auch den knechten zustraffen stehn.

¶ Item so sie sich auff der arbeit mit scheltworten/ vnd wie sich des begeben möchte/ antasten würdē/ so sollen die nechsten dabei inen so bald frid bietenn/ wo sie dan nit so bald frid geben wolten / so sollē sie des nechst zu inen greiffen vnd frid machen/ vnd sie dan so bald nach irer ordnung straffen.

¶ Item die knecht sollen auch schuldig sein/ so ein rott ir stück außgemacht hett / vnd einander rott das ir noch nicht gemacht/ vnd were noch daß dasselbig auch fürderlich außgemacht wurde/ vnd der wal meyster hieß sie den andern helffen/ so sollen sie sonder weygerung inn dasselbig stück tretten vnd denen helffen vmb ire belonung/ so sollen auch die rotten sonder widerreden das leiden / die in denn stück stehen / also wurdenn alle stück fürderlich außgemacht.

¶ Item die Rotmeyster sollenn schuldig sein alle zeügl den man in liffert/ daß sie den wider liffern

℞ iij gantz

## Eyn gesprech welcher massen eyn

gätz oder die stück/wie sich das begibt. Were es aber sach daß ein knecht seinen zeug müetwillig zerbreche oder verlüre/daß soll ime an seinem lohn abgeschlagen werden.

¶ Item die Halknecht sollenn allen monat vnder inen machen einen Schültissen/der inen ire ordnüg vnd regiment versicht/ den sollē sie auch dafür halten/vnd ime gehorchen/laut irer ordnung.

## Die Ampter personen.

¶ Item ein Bawmeyster/ auff den sollen alle person des bawes bescheyden sein/vnd ime gehorchen/vñ alle ding mit dessen rath vnd vorwissen anstellen.

¶ Item ein Bawschreiber der die rechnung macht/ bezalt ab vnd außmüßt mit den knechten inn beisein des Bawmeysters.

¶ Item ein steynmetzen vor ein werckman.

¶ Item den steynmetzen einen knecht der ime hilfft die taglōner/vnd was züm baw züersehen vnd zübestellen von nöten sein will.

¶ Item ein Walmeyster.

¶ Item ein wasem setzer / der ist des wallmeysters knecht auff der arbeit.

¶ Item ein Geschirrmeyster/ der auff die wagenn bescheiden ist/der dieselben versicht/vnd anstellt/ der hat gnüg züchun/so er anders der wagen die menig hat

## vester bawwe furzunemen sey

hat/ oder ein grosser baw ist.

¶ Dises seindt nun die personen die vonnöten bei den baw seindt.

¶ Item/ es wil das gelt gewis verordnet sein das der Herr ein iar verbawen will/ wan der Baumeyster gelt bedarff/ das er das gewis finden möge / dan da wil keyn vertzug sein/ dann die knecht wöllenn alle wochen abbetzalet sein/ darnach man dann den baw wil fürderlich gemacht haben/ darnach muß mann vil leuch anstellen/ vnd nach summa derselbigē personen muß mann das gelt verordnen das es gewis sei/ dann wan einer mocht haben zwentzig meurer vnd zweihundert walknecht vnd were mit dem vorrath geschickt/ vnd hebe so bald nach Ostern an/ der kan den sommer ein grosse arbeit thun.

¶ Item so einer dan zwentzig meurer vnd zweihundert walknecht hatt/ mit sampt den hantreychern so sie bedürffen/ vnd die wägē was dartzu gehören wil/ wie das hie furan züüberschlagen angetzaigt ist / So ist demnach wol züüberschlagen wie vil gelts alle wochen darauß gehn wil/ darnach muß es geordnet sein.

¶ Item in kurtz beileufftig züüberschlagen wie vil rüden erden mit hundert knechten einen tag/ ein wochen/ ein monat zümachen ist / vnd wie ein groß stück das ist / so es züsamen gelegt ist inn ein stück walls/ demnach auch züüberschlagenn wen einer ein stück zümachen vorhat/ das er das meß/ wie lāg/ hoch/

## Eyn gesprech welcher massen eyn

hoch vnd dick/ vnd vberschlage das dā wie vil rüden  
das inn ime hat/ vnd rechen dan wie vil rüden hun-  
dert knecht die wochen vnd den monat machen kön-  
nen/ vnd wie vil zeit es dan mit hundert knechten  
anstellen/ darnach man es gern bald gemacht vnd  
gefertigt haben will.

**I**tem ich wil einen knecht zümachen geben einen  
tag ein halb rüden gemeynlich.

**I**tem zehen knecht machen ein tag funff rüden.

**I**tem funffzig knecht machen ein tag funff vnd  
zwentzig rüden.

**I**tem hundert knecht machen ein tag funffzig rü-  
den.

**I**tem zehen knecht machen die wochen vff vi. tage  
rechnet/ dreissig rüden.

**I**tem funffzig knecht machen die wochen hundert  
zwentzig funff rüden.

**I**tem hundert knechten machen die wochenn drei  
hundert rüden.

**I**tem zehen knecht machen den monat hunderte  
vnd zwentzig rüden.

**I**tem

vester bawe furzunemen sey

Item funffzig knecht machen den monat funff-  
hundert rüden.

Item hundert knecht/machen denn monat zwelff  
hundert rüden.

Besoldung der Knecht die Schichten/lauf-  
fen eyn wochen.

Item der Rottmeyster einer muß geben einem  
knecht die wochen ein halben gülden zu taglohne.

Item des tragen zehen knecht funff gülden einn  
wochen.

Item funffzig knecht funff vnd zwetzig gülden  
die wochen.

Item hundert knecht funffzig gülden die wochen.

Einen Monat.

Item zehen knecht tragen an der besoldung denn  
monat zwanzig gülden.

Item funffzig knecht tragen den monat hūdere  
gülden.

Item hundert knecht tragē den monat zwei hun-  
dert gülden.

Item/ so man einen wall oder damme die haupte  
mit wasem besetzen will/ als ich achtē allwegen güc  
sei/ es hab gleich vor einn erdenn/ was es wölle/

¶

so wil

## Eyn gesprech welcher massen eyn

so wil züuor ehe man den anschlag darauff macht/ besehen sein ob man auch in dem betzircck wasem bekommen kann oder nicht/vnnd es ligt nitt so hoch daran ob man schon nit wissen wasem hat / sonder gütt dries vnd heyden wasem/ seind auch nit böß/ dan so ein wissen wasem zü fett/ ist nit güc in der höhe/ dan so er in die höhe kompt in die lufft auß dē feuchten/ so dorret er vonn seiner vbermasse feistigkeit/ vnnd schwindt züuill sehr / also daß er fast kleyne wirt vor der andern erden hinder im wall/ Were aber die erden die züm wall kompt so fett wie der wasem/ vnd legen in einem grundt so were es güc / wan aber die wasem feist seindt vnd die erden darhinder mager/ oder sandt / so ist besser wasem die nitt so zü feist seindt/ so dorret es nit so weit vonn einander/ dann der wasem thüt nit meh: dan daß er dat erdtreich bei einander behelt daß es nit herab reite ehe dan es sich gesetzt hat vnd bewart helt/ dan wan es kein wasem hat/ so reit es herab inn den erden bis es sich gesetzt vnnd bewechst/ das verhelte nün der wasem bis dert wasem sich inn der lufft vertzeret vnnd vergeht / so ist die hinderst erden darhinder auff einander gesessen vnd bewachsen / wan der wasem schon daruonn dannen kompt.

**¶** So ist nün zürechnen/ wiewil rüden einer wasem bedarff auff einer wiesen oder driesch / daß ist dise rechnung/ so man macht einen wall oder damme/ vñ so offte der auff der seiten ein rüden lang vnd hoch ist vnd eins wasems dick besetzt ist/ das tregt im leger auff der wiesen drei rüde/ ist der wall aber mit zweien wasem hinder einander dick besetzt / daß ich dan vor besser vnd warhafftiger acht/ So muessens auff  
ein

## vester bawe furzunemen sey

ein rüden am wall sein sechs rüden platz / auff der  
wissen / dan ein wasem gehört sich zusteche / eins fuß  
lang vnd breit / vnd ongeuerlich drei wasem eins  
schüchs hoch oder dick / darnach wil auch besehen vnd  
gerechnet sein vnd gesücht inn wissen / drieschen / vnd  
in den wälden wo lachen seindt.

## Der iunge Hans Willig.

Geber heer Zeugmeister vnd mein besonder ver-  
wanter freunde / Ich hab von euch numehr so vilfal-  
tigen berichte gehört vnd empfangen warauff ein  
bawmeister gefast sein solle der sich eins solchen ge-  
waltigen bews vnderstehn will / vnd einem Fursten  
oder Herrn dartzu rathē wil / was derselbig verstehn  
soll vnd auß grunde er den baw nemen / bedencen /  
ordnen vnd machen soll vor das ein. Zum andern /  
mit was fürsichtigkeit er mit dem herrn vnd einer  
landtschafft handeln solle / mit solchē euuern erreig-  
nen vsachen / damit nit also ein baw möcht angefan-  
gen werden / daß solche rew vnd nachtheil wie ir er-  
zelet hayt / darauß entstehn möge / Welche ewz ange-  
zaigte vsachen ich hoch bei mir bedacht hab / vnd  
kan bei mir inn warheyt nit anders findenn / so ich  
mich vor wol bedenc / dan daß solch ewz vnderrichte  
recht vnd war ist / vnd weyß des gar kein einrede zu  
haben noch züsüchen / muß mich dessen gegen euch zu  
dem höchsten fründlichen bedanken / mit erbietung  
solcher trewer warnüg vnd vndricht / die zeit meins  
lebens / vmb euch züuerthienen. Siweil dann die  
sach ein solche ware gestalt hat / vnd ich befinde daß  
ich in dem in solchen wichtigen sachen sonder ver-  
stande vnd rath gangen bin / vnd mit mein herrn in  
Als ij gleichen

## Eyn gesprech welcher massen eyn

gleichen fall die sache zu end beschlossen/ auff vnser bedenccken furch zufaren / vnd in dem ewig berichte/ daß mein herr in solchen nachtheiligen schaden auch möge komen/ vnd so es mißriethe/ ich dessen bei dem herrn vnd der gemeinen ländtschafft mueste vngnad vnd straff gewarten/ vnd nitt/ so es so weit inn das werck komen wurt/ daß alsdan solcher schaden vnd nachtheil nit wider züerhalten/ vnd ich in solche not erwaschen wurde/ so hab ich bei mir gedacht daß ich mich in solche sachen nit ein lassen wölle/ vnd besser sein werde mein hern solches widerumb auff sagen in der zeit dweil noch kein vncosten darauß gangen ist/ dann besser ist diser kleiner vnwill gewaget vnd gelitten/ dan solche grosse gefahr züstehn/ vngnade/ schaden vnd spot zügewarten/ vnd will derhalbē euch als meinem vertrauten frunde bitten/ ir wöllet onbeschwert sein/ vnd mit mir zu meinem herrn gehn/ vnd ime solchs ewig bedenccken vnd reden/ so ir vnd ich mit einander derhalber gehapt vnd gethann haben antzaigen/ vnd mich gegē mein herrn helffen fürbitten daß er mich solches mit gnaden erlassenn wölle/ ime selber vnd meh̄ dann mir zu gutem mit erzelten vsachē/ so ir mir angetzaigt vnd vnderricht habt/ damit mein herr des auch ein berichte bekommen vnd haben möge/ was ime darā selber gelegen sein wölle/ damit ich mit gnaden vnd ehren daruon komen möge.

## Der alt Michel Gtt.

Gieber frunde ich hab dein bedenccken vnd bite an mich angehört/ als daß du bei dir befindest auff meinen berichte/ vnd trewe warnung so ich dir gethann hab

## vester bawe furzunemen sey

hab/das du disem hadel nit vor zu stehn wiffest/vñ  
dich nit vndernemen wilt mit hoher bitt/das ich  
wölle dir zu fruntlichen gefallen mit dir zu deinem  
hern gehn/die gelegēheyt vnd was du vnd ich derhal  
ber mit einander geredt haben/deinen hern alles be  
richten/mit allen bewegenen vsachen/damit du bei  
dein hernn mit ehren vñnd gnaden von diser last / so  
du vndernommen hast ab komen. Nun were ich woll  
gesennet dir inn dem vnd mehrem züchienen vñnd  
zūwilfaren/das ich aber also zu dein hern onerfor  
dere lauffen/vnd dich in ewz beider fürnemen straf  
fen/kanstu wol verstehn / wie mir das anstehn oder  
fuegen wölle/dieweil ich bei dein hern nit bekande  
bin/wurde mir gleich geachtet als wolt ich mich hin  
zu tringen.

## Der iung.

**E**geber herr Zeugmeyster helfft mir bedenccken/sol  
te ich also zu meinem hern gehn vnd ime also wider  
absagen/was er für ein gefallen daran haben wur  
de? vnd was er von mir haltenn wurde / soll ich ime  
dan sagen ir habt mirs gerathen/so will er die vsa  
chen wissen/so weyß ich ime die in warheyt nit also  
alle nach der leng vnd der notturfft zu ertzelen/wie  
ir mir die gesagt habt/sol ich dan so vngeschickt redē/  
so reymet es sich auch gar nicht/sunst ist's mein hern  
auch nit verstendelich von mir/vnd wurt sich gar v  
bel schicken/derhalbenn will ich euch noch auff das  
höchst bitten/ir wöllet mir gerathen seinn / wie ich  
möcht mit fügen von der sachē von mein herrn komē  
dā ich heet noch gantz keynē zweiucl/so ir mit mein  
herrn daruon reden wurdet/ mit dem bericht/wie ir

Als ij

mir

## Eyn gesprech welcher massen eyn

mir gethan habt/ Es solt mein herr wolgefallen/  
vnd mein herr wurde mit euch gar wol züfridē sein  
vnd gern bekent/ vnd zweiuelt mir nit/ so mein herr  
mit euch wurt/ er wurde euch vil vmb ine habenn/  
vnd im rath derhalben brauchen / solche sachenn ime  
helffen anzuschlagen.

### Der Alt.

**A**lles wirt sich nitt also schickenn wie du es an-  
schlegst/ aber darmit du züuerstehn habst daß ich dir  
gern helffen wolt/ so es mit fragen geschehen kündt/  
So hab ich auff den weg gedacht/ daß du hettest wi-  
der deinenn herrn gesagt / du habest mir ewz beider  
anschlag gesagt/ darauff hab ich dich gestrafft/ vnd  
die ander wege angetzaigt / so dein herr bawen wöl-  
te/ die fürzunemen sein solten / vnnnd ich habe mich  
gegen dir erbotten/ dich derhalben etwas schrifftlichs  
vnd gerissens sehen zülaffen/ wā ich wiste daß dein  
herr ernstlichen bawenn wolte / vnnnd ich wiste daß  
dein herr leiden möcht/ vnnnd ich die walstade da der  
baw sein solt/ sehen möchte/ so wolt ich dir helffenn  
ein visirung darüber machen / wurde dan dein herr  
sagen er möge daß leiden daß du mich den platz wei-  
fest/ vnd ich dir dartzü ein visirüg machē solle/ Aber  
er spreche/ er wolt selber mit mir redenn/ so were es  
güt/ so er dan mitt mir daruon reden wurde/ so wolt  
ich ime wol begegenn / wurde er aber sagenn / ia ich  
mag leiden daß er ein visirung darüber mache / so  
ist es auch güt/ So will ich dir wol eynn visirung  
darüber machenn/ die ir all beide nitt verstehn solt/  
vnnnd soll doch gerecht sein/ Auß dem so möchte auch  
volgenn daß ich euch darumb solt bericht gebenn /  
so

## vester batwe furzunemen sey

so queme es auch zureden/alsdan so wolt ich die vi-  
sierung der gestalt machen daß sie vil fragens vnnnd  
disputierens nemen wurch/dardurch wurde es dan  
zum handel komenn/ daß ich euch die notturfft sa-  
gen wurde/aber so eilende hinein zufallen / wil sich  
nit reymen/darauff magstu bedacht sein / vnnnd sol  
che wege furnemen/vnd was dir dan begegnet / das  
sag mir wider/so wollen wir dann weiter vonn der  
sach zureden.

## Der Junge.

Ich wil es versuchen/wil besehenn daß ich mein  
hernn die sach möge also vorbringen/ will alle wege  
suchen damit mein herr vnd ir zusamen komen mö-  
get vnd mit einander dessen beredet / dann ich kann  
es euch nit nachsagen/dan es reimpt sich nit recht/  
wan einer vonn einer sachen redt die er nit zu grōdt  
verstehet/dan es wil kein art an ime haben als vonn  
dem der es verstehet/ vnd stückweise eines nach dem  
andern mit gutem berichte vnd vnderscheidt zusagen  
weyß/vnd dartzwischen fragen einfallen / daß sich  
dann gewiß zutregt/ so kompt alsdan auff die fra-  
gen berichte von dem der es verstehet / dergestalt / daß  
darin zuuerstehn ist/daß er ein waren rechten grūdt  
hat/vnd woher es fleuße/dan es felet sich nit daß fra-  
gen widerreden bringet vnd doppel redē macht durch  
den berichte auff die frage/ daß sunstenn inn eynem  
stracken reden nicht wol sein kan/daß souil bestendi-  
ger berichte sich begeben können/als durch fragen ge-  
scheen mag/derhalben so weyß ich mich nit zuunder-  
stehn mit mein herrn daruonn zureden / inenn der  
sachen zu grundt berichten/dann so er mich vil wolt  
mit

## Eyn gesprech welcher massen eyn

mit vrsachen fragenn/ so wist ich nit wo hinaus / so stünden wir beide vor einander/ vnd wiste einer darvon souil züreden als der ander / vnnnd were nicht dar mit außgerichtet/ dan daß wir eināder beyde ir machen. Darumb lieber herr Zeugmeyster/ so will ich alle die wege süchen bei mein hern daß er sich selber mit euch darvon bereden wolle / darauff will ich kurtz mit im handeln/ vnd nit lang mit weitē vmbstenden vmbgehn/ vnd bitten euch als meinen vertrauten frundt/ so mein herr ewz begern wurde / ir wollet euch gütwillig finden lassen/ vnd nichts sparen/ dann ich kenne meinen herrn der gestalt/ daß er ein gefallens an euch haben wurt / dā er hörte fast gern von solchen dingē reden vnd frage fleissig nach.

### Der alt.

Nun inn Gottes namen/ ich bin züfriden/ So dein herr mein begert/ so wil ich mich in dem gütwillig finden lassen/ vnd so ich befinden daß er leiden mag daß ich mit ime reden möge die nochturfft/ so wil ich ine nit sparen/ er frag nur mich fast wol/ so verhoffen ich ine inn ein ander bedencken zübringen / daß er die sachen anders fürnemen soll/ so er bedacht ist oder sein wurt zübauen/ vnd in solcher handlūg reden vnd berichte/ die walstadt zübesehen/ die zü reche fertigen/ die gelegenheit derselbigen/ die leger züerkennen/ abzümessen/ zü wigen/ zü rechenn/ züüberschlagen alles was dan das haben will/ vnd die nochturfft in dem erfordern wurtch/ vnnnd dan in ein gerechte visirung züstellen / solches vnd dergleichenn wurt dich dann lernen vnd in einen verstandt bringen darmit du dester leichlicher hast es fürter anzunemen

## vester bawe für zunemen sey

nemen vnd darmit vmbgehn magst/denn in dem zu erkennen/wie vermeldet / wurdestu die hauptstück zu suchen/sehen vnd lernē daß du nitt so blinde hinein gehn darffst/Darumb laß ich mir gefallen/ daß du frei mit dein herrn handelst/darauff/dann es ist die warheit wie du dauon geredet hast/daß in den fragen die hauptstück muessen erklet werden/daß sich in ein schlechte für sich außen nit thun will lassen/darumb so fare furth.

## Der iunge.

Ich wil euch volgen/ vnd wil itzundt meinen abscheidt von euch nemen/vnd wil so bald zu meinem herrn vnd wil die sachen fürdern/dann die zeit geht daher daß er mich mit dem werckleuthenn himreck schicken/daß muß ich wendich machen inn der zeit/darumb lieber zeugmeister/so ziehē ich dahin/wil/wils Got/bald wider bei euch sein vnd zu meinem herrn holen/darumb bitten ich euch/ir wöllet mitler weil/euch geschickt machen / daß ir zu meinem herrn komen mögt/vnd was ir derhalber habē müst mit euch nemen/dann ich kenne meinen herrn der gestalt/daß er gar hart der sachen wurt anhangenn vnd euch nit sparen mit fragen.

## Der iung sagt seinem Herrn.

Gnediger herr/E. K. S. wissen sich zuerinneren was die mir auffgelegt haben mit dem baw/daß ich mich dann die zeit hab vndernomen / vnd das warlich nit anders/dā vndertheniger getrewer meynüg/so zu E. K. S. vnd dero lāde ich hab/vnd hab bei mir

## Eyn gesprech welcher massen eyn

nit anders vermeynt / Ich hab das gnügsam ver-  
stãdt vnd E. K. S. vnd dero landt / darinnen getreu-  
lichen vnd nutzlichen gedient haben / Binn also bei  
mir dem nach zügedencken in betrachtung gangen /  
wie die sachen mit rath vnd statlichen möcht ange-  
fangen sein / vnd ist mir zügefallen daß ich noch ein  
alten erfahren der bew / krigs / vnd was dartzü dien-  
lich sein mag / wol güten verstãdt hab vnd gebraucht  
ist / vnd der mir gar verdreulichen altzeit vnd frunt-  
lichen geweest / zü demselbigen hab ich mich verfuegt  
vnd ime inn vertrauen angetzaigt wie mit E. K. S.  
ich mich hab eingelassen der bawmeyster zü sein / vñ  
den baw also auff mich zünemē / zümachē vñdsteht  
vñnd inen dar inn als meinen vertrauten frunde /  
der dessen geübt vnd verstandt habe / mir darin gera-  
then zü sein / darmit ich E. K. S. den baw zü nutz  
vnd güte vnd mir zü ehren / vnd danck machen mögt  
vnd zü meinem besten so ich fönt hab mogen ange-  
zaigt / vnd wie gehört seinen trewen rath mir dar  
in mittzuthailen begert / vnd also nach meinem lan-  
gen ertzelen vnd vnderricht / So hat er mich gefragt  
ob ich schon E. K. S. den baw zümachen auff mein  
angeben hab zügesagt / vnd solches mich hab vnderno-  
men / darauff hab ich ime geantwurth / ia / mit der  
maß daß E. K. S. mir bewilliget habē etliche werck  
leuth die dartzü dienlich seien / mir züzegebenn / die  
mit mir reiten inn das Hellschlande / da die beruem-  
pte baw seindt / dieselbigen zübesichtigen / die abzū-  
malen / zü schneiden / vnd wie wir das mögen züwe-  
gen bringen E. K. S. deß mögen berichten / vnd die  
meyster deß auch ein verstandt mögen bekomē / nach  
aller leng wie E. K. S. wissen / daß derhalbenn die  
abrede vñnd abscheidt gewesenn ist / vñnd hab ver-  
meynt

## vester bawwe fur zünemen sey

meynnt ich hab ime gar wol beschlossen/ Er solte ime das haben gefallen lassen/ vnd ich hette das gar wol bedacht vnd ließ es darbei bleiben. Darauff so sagt er/ Ich befinden so vil inn deinem reden vnnnd berichte/ daß dein herr vnd du schon ewz sachen beschloffen haben/ wie kan ich aber nun dartzu reden oder rathen/ dieweil es beschloffen ist / hettestu mich aber zuuornt ehe dann ir beschloffen hette gerathfragt/ so wolt ich deinn herrn vnd dir nic gerathen haben/ daß ir die schwere sache so gar schlecht / wie ich von dir hören bedacht vnd beschloffen habē soltet / sonder anderr bedacht vnd fürgnommen / dan dises ist nitte ein schlecht werck/ als wan einer ein schon hauß bawet darin man wonet/ daran ist nitte gelegen/ wie das züwonen gebawen ist/ dann dem der dar inn wonet soll/ vnd landen vnd leuthen gar nitte/ sonder alleinn dem/ der dar in wonet/ der mache das wie das ime gefelt/ darbei bleibt es.

Aber ein fester baw/ dar auff steht land vnd leuth des herrn/ vnnnd irer allen verderben vnd wolfarth/ vnd nemlichen der gestalt/ so ein solcher gewaltiger baw sol gemacht werdenn/ so kost er vor das erst ein groß gelt / zü dem andern/ erfordert er ein stetig grosse hüte vnnnd verwarung/ züm drittē so muß er gemacht sein mit sein vortheil sterck vnnnd wehlichenn/ so die nocturfft erfordernt wurth/ daß man ine brauchen müeste / daß er dann könte vnd zügericht were/ darumb er für einenn festen baw da were/ vnd die/ so solchen baw inhabenn/ besetzen/ vnd sich zü der noch darauß wehren solten/ lande vnnnd leuth dardurch züerretten vnd beschützen/ daß sie in der gestalt in solcher maß zügerichte befinden mögen/ daß sie solches darauß thünn mögen/ vnd vrsach haben vnd finden/ daß sie ine wol be

## Eyn gesprech welcher massen eyn

behaltenn können vnnnd darinn bleiben mögen vnd  
kein vrsach anders mogenn verwerden / vnnnd ime  
schuldt geben vor das ein. Sollen sie aber denn  
baw der gestalt etwann gemacht finden / daß er vor  
eyner gewalt nit zübehalten sein möchte / als daß er  
vbel lege / daß er zü vberhöhen sein möchte / daß ime  
daß wasser zünemen were / aber zü grabē sein möch-  
te / aber were nit werlich gemacht mit streichē / Aber  
hette nit platz die groß gnüg zum geschütz werenn /  
daß solches seinen freien stande haben möchte / vnnnd  
zügebrauchen were / aber sunst nit freien stende zü  
dem kriegs volck hette / vnd was dergleichen inn ei-  
nen baw gehört vnd haben müeste / vnd der gestalt be-  
funden wurde daß sich die kriegsleuth darein nit be-  
geben woltenn / vnd konten des vrsachen antzaigen /  
vnd müeste also der baw inn der not stehn bleiben /  
vnd man hat sich darauff verlassen / das best hinein  
gefloget vnd solt dan also im fal der noch nicht sein /  
vnnnd also vbel zügehn / vnd aller onkosten vnnnd trost  
daran verlorren sein werde / wie bestunde dann einer  
der den gemacht hette vor sein hern / der landtschafft  
vnnnd vor meniglichen / darnach solle ich gedenccken  
was E. K. S. dero landt vnd leuthen / vnd mir dar-  
auff stehe / vnd in weittern reden so sich derhalben  
zwischen ime vnd mir zügetragen hat / die E. K. S.  
ich nit kan oder mag ertzelen / noch alle sagenn die  
er mir gesagt hat / die inn warheit alle beweglichen  
vnd hoch zübedencken seindt / da ich dan solches van  
ime vernomen / so hab ich mich aller der sachen er-  
kennenn müessen / daß ich vonn denen nichts gewist  
hab / auch nie nit also daruonn hören werden / noch  
gedancken gehapt / dieweil ich dann die sachen al-  
so wichtig vnd schwere angehört vnnnd befindenn / so  
hab

## vester bawe fürzunehmen sey

hab ich mich erinnert daß E. K. S. solches anzüg-  
zaigen mir gebüren wolle/ E. K. S. dem weitere  
notturfftig habe nachzudencken/ vnd die sachen mit  
andern bedacht vnd rath anzugreifen/dann er hatt  
mich der gestalt angriffen/das ich ann der sache vor  
mich anzünemē erkalt bin/ solches zu vndernemen  
darauß haben E. K. S. sich zu bedenckē auff einen  
andern weg/ dan diser wurt es warlichen nit thun.

## Der Heer.

Nun wolann lieber Hans Willig / ich hab deine be-  
schwerde so du hast inn diesem fall des baws ange-  
hört/nemen solchs von dir mit gnaden an/dann ich  
hab so vill in deinem berichte gehört / daß mein not-  
turfft wurt vnd wil erfordern/das ich dise dinge/wi  
du vnd ich das bedacht vnd furgenomen habenn/inn  
ruhe einstelle/ vnd die sache einem weitem rath ne-  
me/dann du hast mir vil nachdenckens gemacht/ vñ  
gar weißlichen vnd wol gethan/das du also dich wei-  
ter dann vnser bedencken vnd fürnemen gewest/inn  
weitere erfahrung geben hast/ vñnd mir solches ange-  
zaigt. Wie vermeynstu aber das numehr die sache  
fürgenomen/darmit mir solches alles inn einen gü-  
ten berichte komen/vñnd notturfftig berathen/ vñnd  
inn ordnung gebracht/darmit wir bestehn mögenn/  
vñnd solche gefarhde vorkomen vnd verhueten bleibe.

N ij

Hans

## Eyn gesprech welcher massen eyn

Hans Willig.

Werdiger Herr/damit E. K. S. kurtz zu diser sa-  
chen zu grundt vnnnd bestandt komen mögenn/so wil  
ich dero mein bedenccken antzaigen/vnd ist das mein  
bedenccken/vnd sichte mich vor den rechten vnd besten  
weg an/ daß E. K. S. hetten den altē zeugmeyster  
Nichel Gtten zu sich erfordert / vnd bitten lassenn/  
mit solcher antzaigung E. K. S. hettē fur mit rath  
irer landtschafft/etliche beuestigung inn iren Für-  
stenthumb zümachen / dieweil dann zu solchem  
schweren werck züuor guter rath vnnnd besichtigung  
von nöten/so were E. K. S. an ime gnedigs begern/  
Er wolt E. K. S. zu gefallen zu ir komen/ solche or-  
ter helffen besichtigen vnd weicher mitt beratschla-  
gen/als einer der solcher sachen versücht/ vnd erfa-  
ren were/ daß wolt sie sich also vnabschleglichen zu  
ime vertrösten/vnd mit gnaden wider erkennen etc.  
So zweuelte mir nit/wo daß er leibs halben komen  
kann/so wurch er nit aussen bleiben/vnd so er dann  
komen wurch/so hette E. K. S. vor das erst fur die  
handt zünemen/ daß er solche walstat vnd fleckenn  
besehen hette/auf dem so wurde E. K. S. alßdann  
weiter mit ime in den handel komenn / So halt ich  
gantzlichen darfur E. K. S. die werden inen der ge-  
stalt befinden daß er nichts verhalten wurt / mit  
solcher antzaig vnd vnderricht/darmit E. K. S. des  
ein gefallens vnnnd kurtzweil an ime habenn wurt/  
dan er hat sich gegen mir hoch erbotten vnd wunder-  
barlich ding vernemē lassen/daß ich weyß E. K. S.  
gern hören werden.

Der Heer.

Nun

## vester bawe furzunemen sey

Nun wolan/dieweil es dan auff dem steth / daß ich  
ine zu mir erfordern soll vnd du mich vertröstet / so  
wil ich dich derhalben zu ime abfertigen mit einer  
Credentz / die auff dein mundlich werbung oder an-  
zaigen stehn soll / so weyß ich dir auch nit weiter  
imme zusagen zubeuelhen / dann wie du selber an-  
zaist / warauff mit ime zu handeln sein solle / so soll  
dir dein credentz darauff gestalt werden / vnnnd zeug  
hin / vnd handelt mit ime zu dem bestenn darmit er  
komme.

## Hans Willig.

Gnediger Herr / ich wil also des meinen abscheide  
vonn E. K. S. nemen / vnd in der Cantzlei mein  
Credentz fordern / vnd dem negsten zu ime reitten /  
vnd mit ime handeln zu dem aller besten der tröstli-  
chen hoffnung / ich will ine in kurtzen tagen bringen

## Hans Willig kompt zu Michel Guten.

Gebet herr Zeugmeister vnd frunde / auff negst  
vnsern genommen abscheide / bin ich zu meinem herrn  
geritten / vnd wie ir vnd ich mit einander verlassen  
mit ime frei gehandelt / vnnnd zu meinem besten be-  
halt / alle sachen was mir begegnet ertzelett / der ge-  
stalt / daß er ein gefallens daran gehapt hat / vnd ge-  
sagt / er hab es gern gehört / vnd ich hab recht gethan  
daß ich der sachen bei den verstendigen weiter nach-  
gefragt habe / vnnnd ime solchen meinen vonn euch  
empfangenn bericht / ime habe angetzaigt / daß er  
befinde

## Eyn gesprech welcher massen eyn

befinde daß alles hoch zübedencken sei/ vnd in andere wege fürtzünemen sein wölle/ begert darauff daß ir wollen onbeschwert sein vnd seinen gnaden denn willen thun/ vnd zü ime komen/ die flecken helffen besehen/ ewin rath vnd bedencken mittheilenn/ daß wil er umb euch wider in gnadē bedencken/ vnd vergleichē/ So ist derhalber auch vor mich an euch mein fruntlichs bitten/ ir wollen nu mehꝛ das best thun vnd bald komen/ vnd die sache helffen in andere rechte wege richten/ damit ich auß solcher last mit gnaden komen möge/ vnd die sache der gestalt möge angefangenn werden/ daß züuerantwortensein möge/ vnd zü recht mit willen bei der landeschafft komen möge.

### Michel Gte

Nun die weil die sachē dan also stehn/ vnd sich noch zü recht schicken wölle/ so bin ich vrbüttig mitt dir auff züsitzen/ vnd zü deinem hernn züreiten/ vnd zü hören was er sich vernemen leßt/ darnach so wil ich mich auch mit ime haltē vnd einlassen/ vnd an mir nichts erwinne lassen/ was ich verstehe vnd was ich in dem thū daß thun ich dir zü gefallen vnd zü gutem/ darmit ich dir verhelffen möge / daß du die sachen recht für dich nimest/ vnd bestehn mögst vnd vorkomen/ sonst hab ich vor mich genomen gehapt daß ich mich niemants in solchen sachen weiter hab auffwegen lassen / dann es ist ein muesams handwerck/ da selten danck züuerthienē ist/ Aber dir wil ich helffen/ dann helffen zübesichtigen/ zü vnderrichten vnd anzustellen/ vnd daß du die arbeit thuest vñ lernest/ darauff reiten ich mit dir/ vnd weiter begeben ich mich nit.

Hans

vester bawe furzunemen sey

### Hans Willig

Gnediger Herr/ich bin wider alhie/vnd hab auff  
E. K. S. beuelch mit Michel Otten außgerichte/vnd  
bringen den mit/der ist also gantz güetwillig/mit ho-  
hem erbieten gegen E. K. S. daß ich enlichen ver-  
hoffen/E. K. S. die werden ein gefallen ann dem  
man habenn.

### Der Heer.

Ich hab gern gehört daß du ine bracht hast / laß  
ine inn der herberg biß morgen/ laß ine rühen/vnd  
schaff ime heinnacht güte vorsehung biß morgenn/so  
bring ine dann zu mir/ so wil ich mich mit ime be-  
kennen vnd alle sachen gantz notwendig mit ime ab-  
reden vnd beratschlagē/wie wir die furnemē wöllē.

Hans Willig bringe Michel Otten zu  
seinem herrn.

Der Herr thut Michel Otten empfahen/gibt ime  
die handt/danckt ime daß er ime auff sein erfordert  
also güetwillig erschienen ist.

### Michel Ott

Gnediger Kurfürst vnd herr / mein freunde Hans  
Willig alhie züentgegē hat mich E. K. S. erfordert/  
darauß ich dan gehorsam vnd willih erscheine mitt  
vnderthenigen erbieten/wartzu ich E. K. S. dienst-  
lich vnd nütz sein kan/mich inn dem meins vermö-  
gens/willig erfinden zelassen.

G

Der

## Eyn gesprech welcher massen eyn

### Der Heer.

Geber Zeugmeyster / es ist die warheit das ich euch durch meinen diener Hansen Willig hab zu mir erfordern lassen / vnd das bewegen mich diese vrsachen dartzu. Ich bin angesucht worden von meinen vnderthanen / nach gestalt der sachen diser geschwinder leuffen / das ich in meinē Fürstenthumb solte etliche beuestigung machen / zu errectē meiner landt vnd leuth / vnd das meine vnderthanen auch mit irem armüt möchten ein einflucht zūbewarenn desselbigen habē / damit sie nit so gar auff dem lādt geplündert werden mögen / desgleichen das ich selber mocht einem platz haben darinnen ich mit mein schatz / brieff / cleinoter / geschütz / vnnnd was das sein mag / bleiben könne / vnd nit von meinen landē vnd vnderthanen also weichē muesse / vnd verlassen / vnd dergleichen erheblichen vrsachen / ist beratschlacht / das ich etliche beuestigungen machen solle / dieweil dan an solchem vil gelegen sein wil / vnd gutes raths bedarff / vnnnd ir mir dar innen hoch beruempt / So hab ich nit wollen vnderlassen euch zu mir zūerfordern / darmit ich mich möge dessen beredē vnd eurn rathschlag vernemen / vnd der gestalt anfahen vnnnd machen / das es nit vergeblichen gemacht werden möge / dann es kost gar vil / vnd wurt zu trost / wie ir gehört / mir vnd meiner landtschafft gemacht / solte es dan vergeblichen sein / so were es nit allein schedlich / sonder auch spotlichenn / Darumb lieber herr Zeugmeyster / so hab ich mich eurs güten gemuets / so ir zu mir vnd meiner landtschafft in dem habet zūbedeneken / es soll auch von mir gegen euch in gna den bedacht werden / vnd ist derhalben noch an euch  
mein

## vester bawwe furzunemen sey

mein gnedigs begern vnd bitten / ir wollet euch der sachen beladen vnd bemuehen / vnd mit mir auff den platz vnd walstadt reiten / solches zubesichtigen / vnd eur gutbeduncken vnd rath darinnen mittheilen / so wil ich mit ewm rath vnd fürsschlag die sache anfa- hen / vnd so es müglichen sein möchte / daß ich euch darzu bewegen möchte / daß ir als der oberst Baw- meyster euch begebē wöltet / so solt ir dessen bei mir ein gute vnderhaltung wissen / dessen ich mich dann mit euch nach einen gefallen vergleichen will.

### Michel Gtt

Gnediger Fürst vnd herr / E. K. S. gnediges erbie- ten / vñ an mich begern / hab ich in aller vnderthenig- keit angehört / Thün gegen E. K. S. mich solcher gne- digen ertzaigung / mit dergleichen gnedigs ann mich begeren / vnd erbiettens / gantz vndertheniglichen zu dem höchsten bedancken / Erkennen gegen E. K. S. mich solches zuuerthienen schuldig / vñ wil mich hiemit vndertheniglichen erbottē haben / E. K. S. ich mit meinen armen diensten dienen kan / daß ich das vngesparrts fleiß gehorsamlischen vnd gern thün wil desgleichen dselbigen landtschafften. Aber S. furst vnd herr / souil E. K. S. gnediglichen an mich begert daß ich zu solchem E. K. S. vorhabenden baw mich als der oberster bawmeyster begeben vnd annemen solte. Gnediger Fürst vnd herr / solches wil mir nit anzunemen sein / dan vor das ein / so bin der Röm. Kon. Katest. ich vndertheniger diener vnd zeugmey- ster / daß ich derhalber nit abkomen kan / sond ich hab als einn alter last gnüg darmit / so vermag ich es leibs halber auch nit / darumb ist an E. K. S. mein gätz vnderthenige bit / sie wölle solche mein notwen

G ij dige

## Eyn gesprech welcher massen eyn

dige vnd ware entschuldigūge gnediglich annemen  
vnd mir zū gnadē haltē. Damit aber E. K. S. mein  
vnderthenigs gemuet so zū E. K. S. ich hab / so will  
mit E. K. S. wie sie begern / ich vff den platz od wal-  
stat reiten da E. K. S. zūbawen gesinnet ist / densel-  
bigen mit zū meinē besten verstandt helffen besichti-  
gen / vnd mein bedencken E. K. S. zū dē fleissigstē be-  
richten vnd weisen / auch in augenschein reissen / in  
grūdt legē / vnd so sie das habē wil vffgericht schnei-  
den lassen / vnd dar bei alles was daran ist / zū dem  
fleissigsten beschreiben / daß E. K. S. das eigentlichen  
sehen / vnd im verstandt nemen mögen / So hab ich  
nit vnderlassen / sond einen schreiner mit mir brache  
so E. K. S. das gefallen wolt / vnd begert / der es vonn  
holtz auffreissen / so ich gethan vnd in grunde gelegt  
hab / auffstenendt vā holtz schneiden / daß mögen dā  
E. K. S. ire landschafften vnd kriegsverstendigenn  
besehen lassen / Wurde dan etwas daruō ine zūbesse-  
ren bedacht / so laß E. K. S. solches zū dē fleissigstenn  
mit vrsachē ires bedenckens beschreibē / wil E. K. S.  
alsdan von mir haben vnd mich erfordern / so will  
ich dasselbig bedencken anhören / vnd das mein wiß  
darauff sagen / werden wir dan dessen mit einander  
eins vnd vergleichens / in den namen Gottes / so binn  
ich wider des vnderthenigen erbietēs / daß ich wil / so  
E. K. S. daß von mir begern / dasselbig helffen in das  
groß werck in grunde legen / wie das gemacht seinn  
soll / vnd mit allem bericht der anstellung. Vnd die  
weil E. K. S. diener mein frunde Hans Willig sich  
also zūuor / in solchen arbeit geben hat / mich des be-  
richtet vnd rachs darinn gehapt / vnd von mir also  
hart hat lassen einreden vnd auffgenommen / vnd sich  
also gueclichen berichten lassen / So wil ich ime sol-  
ches

## vester bawe furzunemen sey

ches alles helfen anheben/ mit allē fleiß zeigen vnd  
berichtē/ vnd dartzū alles was ich darvon weyß vnd  
hab in schriften vnd bericht/ zū dem fleißigsten mit  
etlichen abgerissenen patronen/ von allerley gattūg  
vnd rustung dartzū mittheilē/ wie ich ime das auch  
versprochen hab/ damit E. F. S. er dester statlicher  
vnd nützlicher dienen kan/ So hab ich keinen zwei-  
uel/ er wurt der sachen güc acht vnd fleiß nemē / vnd  
E. F. S. sachen treulichen vnd wol versehen/ daß er  
gnade vnd danck verthienen soll vmb E. F. S. vnd  
dero landtschafft.

## Der Herr.

Geber herr Zeugmeister ich hab ewr entschuldi-  
gung vnd veranthwurtung gnediglichen angehört/  
vnd wiewol so es hette sein mögen/ euch bei mir inn  
baw gern behaltē hette/ so muß ich doch mit ewr ent-  
schuldigung wol zufriden sein/ Ich nemen aber ewr  
weiter erbietens mit allen gnaden vnd dāck an/ vnd  
wil ich mich solches auch entlichen zū euch versehen  
vnd vertrösten/ so sollet ir mit mir auff die walstatt  
reiten/ da ich vermeynte für das erst zūbeuestigenn/  
dasselbig mir helfen besehen vnd züberathschlagen  
vnd sollet ewr schreiner oder abreisser mit euch ne-  
men/ so es euch dan zū bawen gefallen wolt/ so sollet  
ir solches so bald reißen vnd schneiden/ dā ich wil es  
gar gern sehen wie das reißen vnd abtheilen zūgeht.

## Zeugmeister

Gnediger furst vnd herr/ wie e. f. g. begern daß  
mit derselbigē ich reitē soll/ die befestigūgen helfen  
besehen/ vnd züberathschlagē/ zūreißen vñ zū schnei

G iij den

## Eyn gesprech welcher massen eyn

den/das wil ich gehorsamliehen vnd gern thun/doch  
S. herr/so wil die notturfft erfordern/das ich zuuor  
einen tag laß rustung bei einen schreiner machenn/  
als wogen/richtscheiter/quadranten/darmit ich die  
weiten der berg/leger/vnd hoegen vberschlagen/vnd  
messen möge.

### Der Herr.

**L**egeber zeugmeyster / laßt euch machen was ir be-  
durffen seit/so wil ich euch verschaffen das ir daran  
nit gesaumpt werdet/Vnd sei dir Hansen Billig be-  
uolhen/das du vff den zeugmeyster wartest/vnd al-  
le notturfft verschaffest.

### Zeugmeyster

**E**nediger Kurfurst vnd herr E. K. S. haben dē platz  
selber mit besichtigt/vnd meinen mangel so ich dar  
an gefonden/hab E. K. S. ich zu meinem besten ver-  
stande bericht das der baw wil getheilt werden/ auß  
ursachē das er also hangt gegen d wisen vnd wasser  
heraber/vnd vff d seite/so wissen E. K. S. auch die  
weite daman geschutz hin legen mag/ desgleichen  
wo die zwei leger ligen mögen/vnd wo sie den lauff  
auß dē leger zu d schantz haben muessen/vnd wo sie  
herauß zu dem wasser muessen/vnd das die seite ge-  
gen vnd am wasser wol sicher ist / vnd einer leichten  
befestigung bedarff/vnnd die zwei ronthel so ich ver-  
meynt an die beide ort an das wasser zulegen/die whe-  
ren den gantzen grundt auff der seiten des wassers/  
vnnd die zwei ronthel werdenn das wasser hinauff  
vnd das wasser hinab/ beide velder vnd grundte ein-  
nemenn/ Aber gnediger herr/oben gegen dem hohen  
veldt/ da muß ein sterck sein/von ein wall/vnd ein  
dieffen

## vester bawe furzunemen sey

dieffen graben/ vnd zu beiden theiln der zweier ort/  
an ein iedeß ein groß starck erden ronthel/ daß einn  
weite oben hab/ daß man güter karthauñe zwa auff  
eins stellen kan/ vnd zwo güte halbe notschlangenn/  
die nemē das hoch feldt hinder sich ein/ desgleichen  
auff beiden seiten die zwei hangende velder die her=  
ab gehn auff den weg auff der einen seiten/ vnd fort  
auff den Eleyen grundt hinauff/ die ander seiten  
auch das hangende veldt oben vom holtz heraber biß  
auff das klein wisen stücklin da das ein leger hinder  
hinauff ligen kan/ vnd da sie auß demselbigen leger  
zu dem wasser muessen/ Also nemen die zwei leger  
grossen ronthel die velder ein wie gehört/ Solcher o=  
berwal vnd die zwei ober erden ronthel die muessen  
wol starck sein. Fort zu den zweien rontelen so vn=  
den im grondt an dem wasser ligen werden/ soll zu  
ieder seiten einn wall getzogen werden/ doch nit zu  
starck/ vnd ein dieffen graben darfur. Die ober pfor=  
ten die soll ab vnd zügemaakt werdē/ durch den gros=  
sen wall/ daß also da die pfortē itzt vnd hinaus geht  
soll ein streichweh: in graben gesenckt werdenn die  
verdeckt wurt/ dann es bedarff keiner pfort hoch von  
nöten daselbst hinaus/ dan mann kan sie nit bedec=  
ken/ dieweil der bergk daselbst also hinder sich auff  
steigt.

Aber auff den zweien heraber hangenden seiten/  
soll auff ein iede seiten ein pfort inn die mitte ge=  
machtet werdenn/ die kan man gegē dem höhern veldt  
verdecken vnd formen vnder augen/ vnd heraber ge=  
gen dem wasser soll die farth heraus gebrochen vnd  
gewandt werdenn/ da bedarff es keines verdeckens/  
vnd in solche pforten sollen die seiten streichweh:in  
gemacht werden.

Vnden

## Eyn gesprech welcher massen eyn

Vnden gegen dem wasser soll mann auch einenn kleinen wal füren mit ein graben daruor mit wasser/ vnd in solche seiten gegenn dem wasser soll auch ein pforten gemacht werden auff beiden seiten mit verdeckten flügeln vnnnd streichen/ Solcher wasser graben der kan gefhürt werden langs der seiten bis auff die zwei vnderstē ort/ rontele herumb/ vnd fort die ander zwei seiten hinauff bis zu dē zweien pforten/ Die zwei vndersten erden rontele sollenn auff beiden seiten mit verdecktēstreichen die zusamenn raichen/ gemacht werden.

Die wäll sollen alle im gründt auff gemaurten fuessen stehn/ doch vber zwelff fueß nit/ vnnnd auff das meynst sechtzehen fueß/ das man sie aussen nit sehen noch erraichen könne noch möge.

Darumb soll ein vnderscheide mit den wehren vognomen werden mit der stercke masse vnnnd sorte alles nach gelegenheit der art/ lants/ vnd leger/ vnd nit also gerings herumb eins gemacht wie das ander/ Got geb es sei von nöten oder nit/ so soll es einn gleichen form haben/ wie ich sehe das es an vilen orten geschicht/ das es alles gleich sein muß/ dasselbig sicht gleich als der es geordnet hat/ er hab sich keiner leger noch schiessens verstandē/ oder wisse nur einen bossen/ od aber wölle seiner herschafft nichts sparn/ noch zu vortheil machen/ Darumb soll man solches alles nach notturfft vnnnd der gelegenheyt nach machen/ man kan ime doch wol ein gute art geben/ vnd die wehren recht wol auff einander ordnen/ dan ein Bawmeister der soll dē wehren/ so der grossen stercke nit bedurffen/ die vbermaß abbrechen/ vnd denen wehren so die sterck von nöten haben/ zugeben/ vnnnd also nach notturfft eintheilen.

Snediger

## vester bawe furzunemen sey

Gnediger Kurfurst vnd herr E. K. S. die habē nun  
meinen bericht/ so vil ich das verstehe von diser Fe-  
ste zumachenn/ gnediglich gehört / vnd so E. K. S.  
dan also mein bedenccken gefallen wil/ vnd an mich  
begern/ so wil ich solches mit ein weitem vnd bes-  
sern bericht inn schriften verfassen/ in grondt auff-  
reissen vnd schneiden lassen alles in sein gerechtig-  
keit wie es stehn soll/ zu dem fleissigsten.

## Der Heer.

Gebet herr Zeugmeister ich hab dises mein für-  
haben des baws mit euch besichtigt/ vnd des von euch  
einen guten gegründten bericht empfangē/ vnd laß  
mir ewz bedenccken gefallen/ weyß dē kein ander be-  
denccken zugeben/ dan ewz vrsachen vnd ordnung das  
hat gründt/ wiewol ich mich dessen nit verstehe als  
einer der mit keinem baw mehr vmbgāgen hat / So  
hab ich doch so vil von euch verstanden/ daß ich zufri-  
den bin/ vnd die warheit befinde/ Ist derhalben anit  
euch mein gnedigs begern vnd bitten/ ir wöllet sol-  
che mue vollende auff euch nemen / mir solches inn  
schriften vnd in visirung zustellen/ wie ir das selber  
fürgeschlagen hapt/ dan ich mueß es also habē/ vnd  
mich darinn ersehen vnd auch üben.

## Zeugmeister

Gnediger Herr E. K. S. an mich gnedigs begern  
dem wil ich also nachkomen / vnd Hansen Willig  
vnd meinen diener zu mir nemē/ vnd inen das auff-  
reissen zustellen/ verordnen vnd fürter zu schneidē/  
vnd darunder vñ mictler weil ich es auch in schriften

¶

darbei

## Eyn gesprech welcher massen eyn

darbei stellen. Gnediger herr/wan das E. K. S. etwan ein geschickten steinmetzen vnder sich hetten/ aber einen andern/ so sehe mich fur gut an / das E. K. S. denselben hetten mir zugebē/ das der bei dem reissen vnd schneidē mit dabei were/ darmit er der sachen solcher arbeit in bericht vnd verstādt queme/ so wolt ich mich mit ime aller schießlöcher zūmachen/ vergleichen/ vnd was gehawen sein solte/ so kōnte er das in mein beisein inn patronen verstecken/ vnd fort in das grof maß stellen vnd verbreidenn/ das bedeuht mich/ es solte furters so er arbeiten solte/ vil furtreglichen vnd furderlich sein.

## Der Herr.

Gieber Zeugmeister/ so ir das leidē möge das ein ander dabei ist/ so ist mirs ein guter will vnd gefallens/ ich hab es nit an euch begern dürffen/ ich hab einen vnder mir wonen der geschickt vnd gut ist/ den wil ich holen lassen/ vñ auff euch zūwartē bescheidē

## Zeugmeister

Gnediger Herr E. K. S. die sollen darann kein schew haben/sonder was sie der werckleuten vonn meystern hat/ die E. K. S. zū dem baw gebrauchenn will/ mögen sie mir zūschicken/ so wil ich mich mit inen aller sachen vnderreden/ dan E. K. S. die kōnnen gnediglich abnemen/ so der baw inn das wercken gehn solle/ das man die werckleuth dartzū haben muß das werck zū arbeiten/ So es dan inen also zūmachen doch in die hend kōmen muß/ so muß mann sie zū der zeit doch solches vnderrichten vnd  
zū

## vester bawwe furzunemen sey

zu dem besten anreisen sollen sie anderst arbeiten/  
So ist es gleich so gut vnd besser itzundt in der visirung sie gebraucht vnd vnderrichtet dā in dem rechten werck/ so können sie mitler weil in den visirung in verstande vnd geprauch vnd denckenn dem werck nach/ vnd werden das voller wissens/ das kompt den werckleuthen im werck hoch zu gutem/ vnd wissen auch was sie dartzu mit steinbrechen zu hawen ordnen sollen/ vñ zu richten vō aller irer gereydeschafft Desgleychen so kan man sie itzudt auch im reissen außlernen was ir verstände darauß sein wolle/ Wan möchte sie so ongeschickt befinden/ E. K. S. müesten nach andern verstendigern trachten inn der zeit/ damit E. K. S. versorgt werden.

## Der Herr.

Ich laß mir ewr vorschlege durchaus gefallen/ vnd sie seint notwendig vnd wol bedacht/ vnd es soll darbei bleiben/ vnd abscheidt sein/ vnd ich bedanck mich eurs guten getrewen vnderichts/ ich wil mich auch also gegen euch mit gnaden ertzaigenn / daß ir spüren solte/ daß ich eurs getrewen berichts ein gnediges gefallens hab.

## Michael Ott sagt zu Hansen Willig

Darumb lieber Hans Willig/ wöllest ie inn alle wege/ so du an solches ampt komen wurdest / dich zu dem höchsten besleissen/ daß du zeitlichē vnd vil auff der arbeit seiest bei dē arbeitern wo du die stehn hast in der arbeit/ es sei vff dem baw inn steinhütten/ in steinbruchen/ kalck brennen/ vnd mit allem was

P ij vnd

## Eyn gesprech welcher massen eyn

vnd wo das inn arbeit stehe/ vnd besich was inen mā  
gelt/ darinn biß inen behülfflichen/ vnd laß sie nitt  
fordern darmit sie sonder verhincknuß arbeitenn  
mögen/ vnd warte nit biß sie ein ding haben mues-  
sen/ sonder siehe altzeit vnd frag züuor was vonnö-  
ten sein wure/ daß bestell alles inne der zeit/ vnd be-  
frage sie alwegē was zübedurffen sein wil/ deßglei-  
chen so nim allen abent denn diener so du auff dem  
baw hast/ als oberster Wallmeyster/ Bawschreiber/  
Geschirmmeyster/ Steinmetzmeyster/ vnd was den  
baw mit züuersehē hat vor dich/ befrage sie was von  
nöten den morgen sein wil/ was sie dir dann antzai-  
gen/ das verschaff mit inen daß sie dasselbig ein ie-  
den nach den abent züthun beuelhen wöllen/ deßglei-  
chen dem Geschirmeyster/ was er mit seinen wagen  
thün solle/ vnd was du also verschaffes vnd ordnest/  
da biß du den morgen mit den ersten auff/ vnd sihe  
daß dem also nachgangen werde/ So sie daß von dir  
sehen werdenn das du also mit ernst dar auff sehenn  
würdest/ vnd mit den ersten bei der arbeit bist/ so ha-  
ben alle deine baw diener sorge vff iren beuelch/ wer-  
den fleißig/ vnd das baw oder arbeyt volck auch fleiß-  
siger/ forchten vnd gehorchen den bawdienern desten  
williger vnd mehr/ dan sie sehē daß solches von dem  
Bawmeyster herkompt/ vnd die bawdiener thün  
muessen/ Also thü ime so zeuchstu gütt leuch vnd  
geht dein werck fürth/ vnd würdstu auch darinn ge-  
übt/ vnd sich dein herr vnd die landeschafft daß du  
getreulichen mit den sachen umbgeht vnd verdienst  
gnade/ ehz/ danckh vnd gunst. Vnd in alle wege so  
laß dich nit vberreden daß du dich der rechnung vn-  
derwindest/ noch gelt außzügeben / dann es ist ein  
schweres vnd gefahrluchs ampt/ vnd ist verdecklich/  
vnd

## vester bawe fur zunemen sey

vnd in sonderheyt einen Bawmeyster / darumb so  
laß deinen herrn ein besonder person darüber hal-  
ten die solches verrichte vnnnd bezale / doch so sollen  
die rechnungen in deinen beisein gemacht werden/  
dann du solt alle wochen als den Sontag deinenn  
bawschreiber vnnnd bawdiener zu dir komen lassen  
mit iren kerphöltzen vnd so alle wochen deine Regi-  
ster machen vnd schliessen mit dem der die rechnüg-  
helt vnd zalt/vnnnd soltu ein behalten vnnnd dem zal-  
meyster eins geben / Desgleichen so soltu alle vier  
wochen oder monat/ ein rechnung zusamen schlies-  
sen was den monat is vffgangen / desgleichen das  
virtheil iars/das halp iar/vnd fürth das gantz iar/  
Also machen sich die rechnungen vnder der handt  
mit der zeit selber/vnnnd kan ein herr auch also mitt  
der zeit alwegen in seiner rechnungen ersehen / vnd  
so er mangel daran hat/aber ime zuuil oder zu we-  
nig auff gehn wolte/inn der zeit seinen bawmeyster  
vnnnd zalmeyster einreden/ vnd seinen baw darnach  
vil oder wenig / darnach sein gelegenheyt mit gelte  
vnd andern sein wil/ordnen vnd anstellen.

**I** Desgleichen so soltu de vnderscheide mit deinen  
Registern ordnen vnd halten / daß du dein Register  
in vil theil stellest/ als

i. Was auff die mewzer vnd steynmetz geht.

ij. Was auff die walknecht geht.

iiij. Was auff die steynbruch geht.

iiij. Was auff das schmiedtwerck geht.

¶ iiij Was

## Eyn gesprech welcher massen eyn

- v. Was auff holtz kauff geht.
- vi. Was auff die gemeyn taglõner geht.
- vij. Was auff den kalck geht.
- viiij. Was auff die fhür geht.
- ix. So du wurdest schiffarht haben/ was auff die die gieng gleicher gestalt.
- x. Was auff geding gieng/ so mann ein arbeit verdingen wurth.

Vnd also was dich bedeuht daß die notturfft erfordert/ das allein stehn solte/ das gibet güc ordenlich rechnung/ vnd ist bald zufinden so man nach einerr post sehen wil/ vil besser dann wan alle ding in ein büch durch einander gesüddelt ist/ solchen posten soll ein ieden ein eygen büch gehalten werden / von einn viertel iars/ vnd besonder eingeböden/ vnd sein tittel darauff mit seiner iartzal geschriben.

¶ Dises ist nün lieber Hãß mein vnderriht so vil ich dir dises mal geben kan/ darmit du deinen ersten anfang mögst geschicklich anfahen/ vff daß dein herr vnd ein landtschafft sehen mögen deinẽ trewen fleiß/ güte ordnung vnd anstellung. Darumb lieber Hans wolle dises mal mit disem vor güc nemen/ vnd dich in den namen Gots befleissen/ in dein anfang solcher güter ordnung/ so wil ich dir/ wie ich versprochen/ die allerley visirungen machenn vonn wällen/ mairn/ streichen/ pasteyen/ rontelen/ pfor-  
ten

## vester bawwe fur zunemen sey

ten aufffallen / vnd was mich bedunckt zu befestigung gehörte / daß soll alles eins anders sein dann das ander / ob sich ein jedes nit an alle ort schicken wolte / daß es sich an ein ander ort schickē wolte / vnd ob es sich schon ein solches stück nit gantz wolt schicken / so nim ein anders / sihe wie mann etwas dartzu mache oder darvon thū / darmit es sich in solchen platz schicken möge / dann warlichen solche werenn es sey pasteien / rontelen / wäll / oder streichwehren / die wöllen nach den platz vnd der gelegenheit nach dem veldt vnd legern geordnet sein / Darumb ist es inne der warheit nit schreiner / steynmetzen vnd moler werck wie ich sehe / die sich solches vndernemen zu ordnen / vnd inen ein last aufflegen / die sie nit verstehn / vnd zutrugen wissen / Es ist aber auch der herrn schulde wan daß einer kompt der wol darvon reden kann / Aber ein schreiner / steynmetz / moler / haben etwas gemolet / aber geschütz daß nür schon siche so meynen die herrn es sei schon güc ding / so muß d schon ein bawmeyster sein / vnd versteht weder herr noch meyster nichts darvon / ist in keyn gerechtigkeit als die maß vnd verüngen gestalt / vnd man sie darumb frage / so wissen sie nit vil darumb / ob daß zu groß oder zu kleyn / zu dick oder zu dün sei / noch muß es güc sein / Also machen die herrn meyster mit iren schaden / verderben der gebew / vnd geben ein schwere verlorn lehzgelt / darumb sol al ding mit rath geschehen durch die so solches verstehn / vnd gedencck wie du angelauffen werest wan ich dir nit eingeredt hett / vnd dich geworden lassen / Also ist es mit einander auch / darumb so thū ime wie ich dir gerathen hab / biß so lang ich dir das ander gemacht / dan ich will wils Got / mit fleiß machen / vnd dartzu fleißig vnd

¶ iij notturfft

## Eyn gesprech welcher massen eyn

notturfftiglich ein iedes stück/ warumb es also gemacht ist beschreiben / Darumb hab gedult / vnnnd brauch dich mitler zeit mit meinen gegebenen bericht wol/ vnnnd biß Got beuolhen/ der verliehe dir glück dartzü.

Dises ist kurtzlich der vnderricht den ich vn besehen eyns bawes geben kan / dan so ich eynn baw platz vnd alle gelegenheyt des gesehen vnd vnderricht hett/ wer destobas vnd geschicklicher dauō zü reden vnd zü ordnen.

**V**nd Dieweil in allen kunstreichen sachen so eygenlichen vnd verstetlichen durch schriften nimmer mehr als durch augenscheinliche auffreissung oder abschneidung mag gehandelt werden/ hab ich dir disen mein ratschlag zü güte vnd clareren verstande eynen rechten grundt mit sampt seinem auffzug vnd aller zugehörung eynes vesten bawes in vertüungüchten schüch auffgerissen vnd vertüungt dar auß eynen so bawen will noch gelegenheit des platz allerley nützlichs vnd dienstlichs nemen mag / vnd sich mögen auch darauff vnderricht nemen vnnnd gewarnet sein/ daß sie sich der sachen zü formt erfarn vnnnd geschickt werden/ vnd nit vngelernt oder vuerstandt meyster bestehn zü werdē/ Vnd züm höchsten die verstendigen zü bewegen daß sie dises mein vnderricht

61

vester bawe fürzunehmen sey

underricht wöllen bedencken / auß was vrsachenn  
ich wie oft gemelt / dises hab auß gehn lassen vnd  
mir inn dem zu hilff kotmen vnd besser zu gutem al-  
len den die bawen willen / vnd den guten gesellē die  
sich herinnen gern üben wolten / daß die den rechtē  
grundt süchen vnd finden künden vnd zu weern de-  
nen die nach irem eygenn kopff / vnd des keyn ver-  
standt haben sonder iren nütz vnd geitz darinnenn  
süchen / vnd nit nach des herrn besten die in darüber  
verdrawen / handeln. Darumb lieb Hans wöl-  
lest disen mein rathschlag dir nit verschmahen las-  
sen / vnd inen mit fleiß durch sehē in der beschreibūg  
vnd des gleichen in den visirūgen die ich dir darüber  
gemacht. Vnd so du das nūn ein verstandt habenn  
magst alßdan so magstu dester freier mit denē die  
des ein verstandt haben reden / vnd dich mit inen in  
disputaciones geben / vnd dein argumēt auff grūde  
füren / würdestu dan hören daß eyner neben grundt  
daruon redt / so ist nit noc daß du hart dich mit im in  
rede legest dieweil nichts an im zu holen ist / damit  
er dir nit abgewint dein grundt. Ist es aber einer d  
mit grundt vnd guten vrsachen dir begegnet / dē hör  
mit allem fleiß vnd heng im nach / damit du in dz  
hin brengen mögest daß er sich gegen dir offenbarr /  
vnd wo dich bedunckt daß er dir begegnet / Also daß  
wider dein fürnemen ist mit vrsachenn / das behalt  
vnd bereyt an fleißig vnd verdrewlich mit im / zeych  
en dir das dann so bald anff / reiß oder leg das inn  
grundt durch die verüungung gegen deiner meynūg  
so würdestu befindenn / was eins für den andern  
thün will / darnach hastu dan dich desto baß zu ge-  
brauchen / oder auß inen beyden zusamen etwas zu  
nemen / dan vil versücht vnd geübt / das lernt / dar-  
umb

## Eyn gesprech welcher massen eyn

umb/ biß deinn selbst meyster nümmer ( wie Gott  
sagt) man soll schnell sein zu hören / vnd lāgsam zu  
reden/ des biß alwegen gewarnet/ so du mit andern  
zu rath geforderst würdest / ist dirß möglich so laß  
die andern vor daruon reden so hastu irē rathschlag  
ist er dan dienlich/ so hastu dich mit dein rathschlag  
zu bessern vnd sie nit an dir/ wil man aber die erste  
rede von dir habē/ vnd du die thun müst/ so thū dein  
best vnd biß geschickt vnd bedacht mit guten vsachē  
war auß dein rathschlag fleußt/ vnd so dir wirt dein  
rathschlag disputiert/ daß du wiffest dē zūbegegnen/  
wirt er dir aber mit grundt widerlegt/ so bleib nit  
auff deiner weißheyt/ sonder volg dem besten vnd  
stehe mit güt von deinem rath ab/ vnd behalt den sel  
bigen rathschlag bei dir vnd besser dich/ vnd verachte  
keynen bau leichtlich/ sonder sage dein vbel daran  
wie du es verstehst/ Vnd so du in hettest machen sol  
len/ wie du den wöllest gemacht haben/ vnd du dein  
vsachen mit dar/ ist dan dein meynung besser / so  
werden die vsachen in selbst straffen/ dan es ist ein  
alt sprich wort/ das werck lobt dē meyster / vnd es ist  
keyner alleyn meyster dan Gott lest als ein werden  
-meyster bei dem andern / Also muß einer lernen  
die weil er lebt/ vnd keyner wirt auß lernen  
biß er wirt der erden geliebert.

Gott sei gepreiset in dem vnd allem.

¶ Gedruckt tzo Quiffeldorff durch Jacob Baethen/  
im iar/ M. D. Lvi.



...maßten ey  
...immer (wie Sie  
...und lägen zu  
...du mit andern  
...möglich so laß  
...rathschlag  
...rathschlag  
...aber die erste  
...so thut dir  
...vorn rathsch  
...mit dir  
...so bist mit  
...dem besten und  
...und behalt den sel  
...und verachtet  
...den adel darant  
...nicht machen sol  
...und du dein  
...ung bötz / so  
...du es ist ein  
...und es ist  
...als ein wedel  
...sich lernen  
...aus lernen  
...leben

...den allen.

Jacob Bamber

flüchtiges Glycerin 4.37 1/4  
Fingerring

755

1056

